

**NATIONAL ASSEMBLY OF  
SEYCHELLES**

*Friday 25<sup>th</sup> November, 2022*

*The Assembly met at 0902am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour Manm Onorab. Bonzour nou bann zofisye Lasanble, e nou piblik telespektater ek oditer ki pe swiv nou. Byenveni pou sa travay sa lazournen.

Nou annan en pti *item* avan nou al lo travay lo Bidze. Me mon ti ava kontan Madanm raporter i fer antre delegasyon Minis la pou nou komanse.

Byenveni Minis ek ou delegasyon. Nou ava fer bann lentrodiksyon apre. Pou komanse mon pou envit *Chairperson Women Caucus* Onorab Esparon pou partaz en pti mesaz lo sa sinifikasyon sa pti rozet oranz ki nou tou nou pe mete ozordi.

E pou sa mon'n envit Minis ek son delegasyon pou partaz sa moman avek nou. Onorab Esparon?

**HON REGINA ESPARON**

Mersi Mr Speaker. Bonzour Minis ek ou delegasyon. Bonzour tou dimoun a lekout.

Mr Speaker pou sa voyaz nou pou donn loner Onorab Bastienne pou partaz sa mesaz avek nou, pou mark komansman sa sel zour ki ganny dedye par Nasyon-z Ini pou lalit kont vyolans domestik. Mersi.

**MR SPEAKER**

Mersi. Onorab Bastienne ou annan laparol.

**HON DESHEILA BASTIENNE**

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou Manm Onorab e en gran bonzour pou tou dimoun a lekout espesyalman zabitan Perseverance.

Mr Speaker les mon konmanse par dir mersi *Caucus* Madanm pou donn mwan sa loportinite sa lannen, pou pas sa mesaz ozordi a lokazyon komansman sa 16 zour ki lemonn i dedye ki komemor sa lalit kont vyolans domestik.

Sa lokazyon i ganny marke par kouler oranz ki nou apel *Orange Days*. E ki demar ozordi 25 Novanm e i ale ziska

le 10 Desanm, i mark lazournen Drwa Imen.

Sa lannen sa lokazyon pe deroul anba tenm '*Orange the world generation equality stands against rape*'. Theme swazir par Nasyon-z Ini. E isi Sesel, sa letap de deroul anba tenm 'Ini pou en lafen avek vyolans kont bann madanm ek zenn fir'.

Mr Speaker, orizinalman dapre Nasyon-z Ini *Orange Day* i sipoze ganny selebre tou le 25 sak mwan. I plito konpanyi ki Nasyon-z Ini li menm ti komanse an 2008 anba tenm 'Annou ini pou aret vyolans kont madanm ek zenn fir'.

Sa zour nou pe dir non a okenn form vyolans kont madanm e zenn fir san oubliy bann msye osi.

Statistik i montre ki bokou madanm ek zenn fir pe sibir vyolans dan lavi toulezour. Statistik resan i montre nou severite sa sityasyon isi Sesel.

Oktob 2021 83 madanm ek 16 zonn ti raport vyolans domestik ant fanm ek zonn. E 55 madanm ek 22 msye ti raport vyolans famiyal lo en nivo pli larz ki enkli zanfan e lezot manm fanmir.

Ki fer en total 176 zis pou mwan Oktob lannen pase. Ki sif pli o ki ti ganny anrezistre. E zis pou premye kar 2022, i

annan 184 ka ki'n ganny raporte.

Mr Speaker, mon oule fer resorti ki devan Tribinal Lafanmir depi Me 2021 ziska Me 2022, in annan 734 ka ki'n ganny *protective order*.

E ladan 48 ka vyolans seksyel ki devan Lakour Mazistra, zis 17 ka ki'n fini. Lezot ka i ankor *pending*.

Sa i montre severite sa sityasyon e nesosite bann Lalwa pou protez nou popilasyon kont vyolans.

Mr Speaker, vyolans i kapab vin dan diferan form;-fizik, seksyel, emosyonnel e konmela menm atraver medya sosyal.

Mr Speaker, Sesel nou reste angaze. E koman en Gouvernman responsab nou pou kontinyen ranforsi bann Lalwa ek Polisi ki an plas, pou adres sa size vyolans domestic, parske pli gran vyolasyon Drwa Imen se vyolans dan nenport ki laform.

Sa sityasyon i afekte madanm ek zenn fir diferan laz, lorizin e osi lo nenport ki nivo dan sosyete.

I enportan ki nou ankouraz bann viktim pou briz sa silans otour nenport form vyolans ki zot sibir.

Fodre ki nou realize ki vyolans napa plas dan nou lavi.

E ki i pa sipoze vin par nou lavi kot nou dir ki sa i zis en pti ka. Naryen pa ok otour okenn sityasyon vyolans.

Fodre pa ki nou fer li vin en tabou dan nou kiltir. Fodre pa ki nou onte pou dil avek sa bann tel sityasyon e pou kasyet deryer bann leskiz tek ki ou stati dan lasosyete, ki fanmir ou sorti ladan e menm ki travay ki ou pe fer.

Sa bann tel leskiz pa pou fer ou dibyen. E la ou pou fini par detri ou prop lavi. Letan ou swazir pou viv dan linyorans e ou pa oule koze, ou kapab vin en viktim depresyon, maladi mantal ouswa menm ou pou fini par swiside.

Bokou nou ler nou war bokou aksyon vyolans ki pe arrive, oubyen nou pe menm eksperyans sa bann labi, nou prefere pa ger naryen e ni koz lo la pou diferan rezon.

Nou kanmi, nou onte lo ki dimoun pou dir. Non, nou bezwen lev-e e denons nou bann abizer ozordi menm. Akoz demen i kapab tro tar.

Nou bezwen double nou zefor ansanm avek lezot partner pou edik dimoun lo vyolans ek son lefe. I enportan ki nou tou nou konnen kote pou ale letan nou war nou pe komans vin viktim sa fleo.

Mr Speaker, fodre ki nou vin konsyan ki nou lavi i presye. Ki nou bezwen prezerv li a tou moman e fodre ki nou aksepte ki lemoman en dimoun i komans abiz nou e mank respe pou nou, i kriy avek ou an servan bann term vilger, e dek ki i lev son lanmen e i menas ou, ou bezwen pran konsyans pou aret li avan i eskale, akoz i kapab kout ou lavi.

Pa esper demen. Lev-e ozordi e al rod led. Annou aret li o pli vitman posibil. Nou sosyete napa plas pou bann abizer. E i pe depan lo nou bann madanm ek zenn fir ki for, dinamik, an bonn sante e ranpli avek zwa de viv pou ede dan sa lalit.

Ansanm annou ini pou met en lafen avek vyolans kont madanm ek nou bann zenn fir! Annou fer sa premye pa ozordi. E pa les personn briz nou lavenir!

Avek sa de mo, mon remersye ou Mr Speaker.

**MR SPEAKER**

Mersi.

***(APPLAUSE)***

**MR SPEAKER**

Mersi Onorab Bastienne. E mon azout sipor. Mon asire mon

azout sipor tou Manm Lasanble pou lapel ki zot in fer lo sa size.

## **DEPARTMENT OF TOURISM**

### **MR SPEAKER**

Nou aprezan pas dan Staz Komite pou nou komans nou travay lo Bidze e avek sa mon ava swet labyenveni ankor Minis Sylvestre Radegonde Minis pou Zafer Etranzer e Tourizm, e dan son delegasyon Mrs Sherin Francis ki Sekreter Prensipal pou *Tourism*, Mr Terence Max Direkter *Tourism Academy*, Mrs Jenifer Sinon Direkter Zeneral *Human Resources and Administration* e Mr Don Julie, *Senior Administrative Officer*.

E lo kote Minister Finans nou annan ankor Mrs Astride Tamatave, *Comptroller General* e Mrs Agnes Madeleine, *Finance Analyst*. Mersi zot tou pou zot partisipasyon.

Minis nou komans travay lo Bidze *Department of Tourism* ki lo paz 419 ziska 427 pou en total R201milyon940mil. Nou komans avek ou lentrodiksyon lo sa Bidze silvouple.

### **MINISTER SYLVESTRE RADEGONDE**

Mersi e bonzour Mr Chair. Onorab *Leader* Lopozisyon, Onorab *Leader* Zafer

Gouvernman, tou bann Onorab e bann dimoun ki a lekout.

Pou komanse Mr Speaker, permet mwan asosye mwan avek konsern e santiman ki Onorab in eksprimen dan sa *statement*, konsernan vyolans kont madanm ek bann fir. E mon azoute osi bann garson ek zonn.

Mr Chairman i en plezir pou mwan prezant avek Lasanble propozisyon Bidze pou Departman Touris pou lannen 2023.

Swivan sa 2 dernyen lannen pandemik avek son defi e lensertitid, nou'n finalman war nou lendistri ki pe dousman, dousman me sertennman retourn normal.

O komansman sa lannen nou ti'n fikse nou en target R258mil viziter. Ler mon pe adres zot bomaten la, mon kontan pou anonse ki nou'n depas 300mil touris!

**(APPLAUSE)**

### **MINISTER SYLVESTRE RADEGONDE**

Sa i plis ki 42mil touris ki nou ti pe espekte. E i keksoz, si napa en dezas kelkonk ki arrive, mon krwar nou kapab dir avek preske sertitid, ki nou

pou termin lannen avek plis ki 330mil viziter.

Statistik osi ki nou annan ziska mwan Oktob, i montre ki reset pei atraver tourizm in environ 823milyon Dolar Ameriken. Swa 40 pousan lo reset lannen pase.

Sa rezilta ki nou pe gannyen dan nonm touris, dan nonm reset, i pa en zafer ki'n ariv par laverti. In annan en kantite travay deryer.

E mon oule profit sa lokazyon pou mwan remersye tou bann, nou bann partner isi Sesel e aletranze e osi remersye mon *staff* anba direksyon PS pou travay ekselan ki zot in fer pou donn nou sa rezilta.

Mr Chairman i touzour posib pou nou fer pli byen. Nou devret fer pli byen. E mon langazman avek langazman mon *staff* se ki nou pou kontinyen fer pli byen dan sa nouvo lannen ki vini.

Tourizm, Departman Tourizm i annan en *staff* 100 dimoun. E ladan i annan 2 ki baze aletranze. Akoz en kantite bann travay ki nou fer aletranze, nou fer atraver bann *service contracts* ki nou donn bann konpany aletranze pou fer, pou reprezant nou. E nou annan 12 sa diferan Kontra atraver lemond.

Mon pa koz lo sa 100 *staff* ki mon koze, mon pa pe koz lo *staff* ki STA ki separe, li i annan environ 64 *staff*.

Avan ler mon kontinyen Mr Chair, zis en pti apersi pou mwan dir bann keksoz ki nou'n kapab fer sa lannen. E ki nou regarde avek serten fyerte, malgre parey mon dir, i annan lespas pou nou fer pli byen.

Boner sa lannen, nou ti lans nou program 'Lospitalite lafyerte Sesel'. E avek sa i ti pa selman en program, en konpany pou sansibiliz dimoun ki dan en fason ou en lot i asosye avek Lendistri Touris, me osi ankouraz nou bann zenn marmay dan lekol, pou regroupe dan bann *tourism clubs* atraver nou pei.

Mon kontan pou dir bomaten ki lamazorite nou lekol ozordi - si pa preske tou - i annan en klib touris. E bann ki'n swiv bann program, diferan program lo televizyon zot war ki kantite leksitasyon i annan avek sa bann zenn ki pe konpran kisisa sa lendistri, son lenportans dan lekonomi nou pei.

Ki nou le evantelman pa selman sa, sansibiliz zot lo lenportans tourizm. Me nou espere ki zot grandi e lekel ki konnen gard sa koman en posibilite en lanplwa a lavenir.

Nou'n koz en kantite lo *cultural tourism*, lo tourizm kominoter ki nou le fer. E mon kontan pou dir ki malgre nou pa'n fer sa kantite progre a la vites ki nou ti oule, nou'n komanse. E nou ti komans avek en 'Bazar La Digue e sa ti en sikse.

E avek kolaborasyon Lenstiti pou Kiltir, nou ti kapab en pe semenn pase fer sa 'Bazar Domaine a lokazyon Festival Kreol. I annan plizyer keksoz aktivite ki nou pe fer dan sa domenn.

Nou'n konplet en odit kiltirel dan 7 distrik. Sa i pou bann endividi, bann posibilite ki i annan dan distrik dan bann sa 7 distrik, ki nou kapab targete pou komans serten aktivite. E sa nou le komans li boner lannen ki vini.

Lakademi Tourizm lo son kote, in reisi ouver restoran *Helvetia* koman en restoran komersyal, dan sans ki i pa selman donn *training on the job* nou bann etidyan ki laba, me i osi en posibilite pou zot ranmas en pe reveni dan en restoran ki baze parey nenport ki restoran komersyal.

Ozordi nou pe siny en Lakor avek Leritaz Kiltirel Sesel an sa ki konsern Vye Marmite, pou Lakademi *run* sa koman en restoran osi, ki ava donn ankor

en lot mwayen nou bann etidyan ganny posibilite *run*; konpran kisisa *run* en biznes e agrandi zot leksperyans, zot konesans.

Mon kapab osi mansyonnen briyevman sa *mentorship program* ki nou'n re *revamp*, pou fer sir ki nou bann marmay sirtou la nou *focus* en kantite sa preske 100 etidyan ki sorti *Shannon – Revamp*, adres bann *issues* ki annan en mannyer ki zot kapab ankouraz zot pou reste dan sa lendistri.

I annan kantite defi ek lobstak, loportinite petet adres zot dan bann kestyon ki zot ava demann mwan. E mon le petet a se pwen aret la e bann lezot pwen ava sorti mon espere dan kestyon. Mersi Mr Chair.

### **MR SPEAKER**

Mersi Minis. Bann Manm mon rapel zot pou nou donn sans otan Manm ki posib demann zot kestyon. Mon pou demann zot pou limit zot kestyon pou 2 pwen pou komanse.

E osi *panel* mon demann zot pou adres kestyon ki'n ganny demande, pou nou kapab fer lekonomi letan.

Nou a komans - *sorry* mon'n pran preski tou non an menm tan, eksepte Onorab Gill ki mon rapel ti lev lanmen

premye. Mon a komans avek li apre i ava vin nenport.

**HON CHURCHILL GILL**

Mersi Mr Chair. Bonzour Minis ek ou delegasyon. Bonzour tou Manm e tou dimoun ki pe ekout nou.

Minis dan lanons Bidze Minis Finans, i annan serten lanons ki tous lo lendistri, sa se sa *levy* pou lanvironnman er sa 2poursan *tax*.

Mon kestyon, sa 2 poursan *tax* lo reveni, mon kestyon se eski vi ki *Tourism* i *advertise the destination*, eski sa bann lenformasyon in ganny pase avek nou bann partner aletranze?

E si in ganny pase ki zot reaksyon? Oubyen sa bann lenformasyon, si i pa'n ganny pase, si zot espekte ki bann diferan letablisman zot ki pas sa bann lenformasyon?

E an menm tan lo sa 2 poursan la, dapre Minis i dir *medium* avek *large hotels* ki pou pey sa 2poursan. Si ou annan sa lenformasyon pou dir nou, ler nou dir *medium hotels*, ki kantite lasanm ki nou pe koze - en mannyer pou bann dimoun ki dan sa bann kategori pou zot konnen swa zot tonm pou peye swa tonm zot pa pou peye.

Mon dezyenm kestyon se, ou'n koz lo *enhancement of*

*products* dan ou *strategic priorities*. E osi nou konnen poudir Sesel ozordi, nou annan en pe konsern kot *minimum standard* i konsernen.

E ozordi i annan serten letablisman ki nou'n vwar dan visit, ki kliyan i ankor pe pey €50, €60, ki en destinasyon parey Sesel mon krwar nou devret fini pase sa.

Eski ou kapab eksplik nou ki ou Minister i anvizaze fer konsernan *minimum standard* pou letablisman dan Sesel? Mersi.

**MR SPEAKER**

Mersi. Minis ou repons?

**MINISTER SYLVESTRE RADEGONDE**

Mr Chair, Onorab mersi pou ou kestyon. Mon pa pou fer komanter lo sa 2 poursan *tax*, sa mon les avek SRC, Minister Finans.

Mon ava komant plito lo sa en *environmental levy* ki konsern direktman petet mon Minister. Pou reponn ou kestyon direktman, non napa okenn konsern.

Mon fek sorti WTO Langleter 2 semenn pase, napa okenn konsern. Sa ki mon bezwen dir e mon krwar nou - anfen petet nou devret konsyan ki deplizanpli bann vwayazer i

oule, zot oule swazir bann destinasyon ki protez lanvironnman.

E se sa enn nou bann atou Sesel, ki fer ki lo bann lezot destinasyon ki parey nou, nou annan en pti pe sa *edge*. Donk i pa en problem, mon pa war li en problem. La mon pe koz ou koman mon pe koz ek ou a sa pwen, mon pa ankor tande.

Ou'n demann konsiltasyon ensidswit. Petet nou ti kapab fer en pe plis konsiltasyon lokal. Me bon *lesson learned* pou lavenir.

An sa ki konsern *minimum standard*, nou annan en kantite *challenge* Onorab ou konnen ou menm. Ou'n avek mwan ler mon al fer letour serten letablisman dan ou distrik. Parey dan distrik serten lezot Onorab - i annan en kantite *challenge*.

I annan letablisman ki a mon avi zot pa devret dan biznes ozordi. Akoz *minimum* i vremen *minimum*. E sa i en *issue* ki nou konsyan, nou bezwen adrese lannen ki vini.

Akoz ler nou pe regarde ozordi sa bann kategori lasanm ki pe sarz €100, i bokou plis lasanm dan sa kategori ki dan bann gran lotel. E reveni i dan gran lotel.

Wi sa bann pti lotel i donn en mwayen viv Seselwa. Me pou

pei, lekonomi pei i pa anmenn bokou. So pou adres sa zafer *minimum standard*, nou pou bezwen fer en travay serye ki nou'n deza komanse. E nou pou akseler-e dan lannen ki vini. Mersi.

### **MR SPEAKER**

Mersi. Ms Tamatave, eski ou pou kapab adres briyevman sa pwen lo 2poursan *tax*?

### **COMPTROLLER GENERAL ASTRIDE TAMATAVE**

Mersi Mr Chair. Bonzour Mr Chair. Bonzour tou Manm Onorab. Kestyon *in terms of* konsiltasyon, si konsiltasyon in ganny fer - si mon ganny ou byen Onorab? Lo 2poursan *tax*?

### **MR SPEAKER**

Vitman Onorab, wi?

### **HON CHURCHILL GILL**

Non, dan ladres Minis i ti dir *medium* avek *large hotels*. Mwan mon le ganny li kler pou an-term kantite lasanm ki nou kategoriz *medium*? Pou bann dimoun ki dan sa bann kategori pou konnen lekel ki sipoze peye, lekel ki pa sipoze peye. Mersi.

### **MR SPEAKER**

Sa i en kestyon SRC. Yes, Ms Tamatave vitman silvouple.



**COMPTROLLER GENERAL  
ASTRIDE TAMATAVE**

Ok Mr Chair. Mr Chair bann pti lotel i bann 24 lasanm e pli ba, pti lotel. Bann mwayen lotel i ant 25 a 50 lasanm. E bann gran lotel ki son pri i R100 pou sak nwit, li i 50 lasanm an montan.

Sak kategori i annan en *fee*. Pou bann pti lotel 24 lasanm e pli ba, i R25 pou sak nwit par lasanm.

Pou mwayenn 25 a 50 lasanm, R75 pou sak nwit.

E gran lotel 50 lasanm, i pou R100. Mersi Mr Chair.

**MR SPEAKER**

Mersi. Mon ava sey ganny enn, de bann Manm ki'n lev lanmen. Premye Onorab Mondon.

**HON TERENCE MONDON**

Mersi Mr Chairman. Bonzour Minis avek ou delegasyon. Mr Chairman mon premye kestyon i relye avek defi Departman Tourizm. E sa se *digital footprint*.

E kot zot dir ki operater lokal pa pe maksimiz loportinite ki pe ganny ofer atraver bann rezo dizital. E ki fer ki konteni oubyen prezans *online* i limite.

Pou mwan sa i toutafe vre e mon rekonnèt e apresye osi ki enn zot priyorite stratezik, se

pou devlop en Sekter Tourizm ki modern e kapab maksimiz potansyel sa monn *digital*.

Mon premye kestyon, eski departman in fer provizyon dan sa Bidze, pou adres mankman dan konesans parmi operater lokal, pou zot kapab realiz potansyel en servis *online* ki efektiv?

Petet mon sizere annan anmenn bann operater lokal ansanm avek bann spesyalis dan domenn *ICT* e *marketing*, dan en sesyon travay pou adres sa size.

Mon dezyenm kestyon i relye avek latib 8 lo 'endikater performans pou devlop en lafors travayer konpetan pou ou Lendistri Tourizm.'

E ler mon get zot latib mon vwar ki zot annan endikater poursantaz etidyan ki antre dan lendistri e sa sif aktyel pou 2021 ti 50poursan ki antre. E target 2022 ti 82poursan. Par kont, target 2023 in redwir in vin 58poursan ki'n desann ki tre ba.

E bann endikater ki kontribye ver sa *outcome* i annan poursantaz etidyan ki *enroll* kot Lakademi. Epi poursantaz etidyan ki vreman *graduate*. E la ler mon pe get zot sif aktyel mon vwar ki an 2021 ti annan 238 etidyan ki

*enroll* e 71poursan i *graduate*. Alor i kalifye.

Aprezan 50poursan ki antre dan lendistri, savedir i fer sir dan 169 etidyan ki kalifye zis 85 etidyan ki antre dan lendistri baze lo 50poursan ki zot mete ki aktyel.

E ler mon get zot target pou 2023 e zot met *enrollment* sa etidyan ki *enroll* 310 etidyan. E zot target 73poursan *graduates*.

E sa i fer ki 223 etidyan dan sa 310 ki kalifye e baze lo 58poursan ki antre lendistri, zis 131 etidyan ki antre dan lendistri.

Alor mon problemn aprezan Mr Chairman, si nou pran sa *enrollment* 310 etidyan e selman 42poursan reisit ki antre dan lendistri. Ki vedir sa *investment* ki nou pe mete kot Lakademi, si nou pe ganny zis 42poursan ladan, i tro ba.

E ler nou pe get sa nivo lenvestisman dan Bidze. *allowance* pou *part-time lecture* in sorti 47mil in vin 524mil. Ki'n mont par 477mil pou Bidze lannen prosenn.

*Tourism Hospitality Training* Bidze lannen pase ti 35milyon69mil e la i 41milyon673 - 6.6milyon an plis.

*Hotel School Management* i sorti 10milyon512mil, lannen prosenn i 15milyon284.

### **MR SPEAKER**

Onorab pa tro long silvouple, *get to the question*.

### **HON TERENCE MONDON**

Mon anvi ilistre Mr Speaker, ki sa kantite investisman nou pe mete apartir lannen prosenn. E ler mon pe get bann target ki mon konnen i reflekte aktyalite. Be selman mwan mon anvi konnen aprezan ki bann travay an plis ki bezwen ganny fer, pou kapab *breach* sa *gap*?

Pou nou kapab si nou pe dir 310 etidyan, nou kapab ganny preski 100poursan etidyan ki *graduate*, pa 73poursan.

Pou fer sir apre pou nou travay avek Departman Lanplwa, pou nou fer sir ki sa bann etidyan i vreman antre dan sa lendistri.

Ki bann travay ki zot pe anvizaze fer pou vreman, konmsi pou nou kapab maksimiz sa lenvestisman ki nou pe fer e ki annan sa nesesite ki nou fer nou Seselwa antre dan sa lendistri?

Sa ti mon pwen. Mersi pou lendilzans Mr Chairman.

### **MR SPEAKER**

Mersi. Minis ou ava reponn oubyen diriz ou delegasyon. *Go ahead.*

**MINISTER SYLVESTRE RADEGONDE**

Mr Chair, Onorab mersi pou ou kestyon. Premye kestyon mon ava pas avek PS pou reponn. E ou dezyenm kestyon Direkter Lakademi Touris. Mersi.

**MR SPEAKER**

Mersi. *PS please.*

**PS SHERIN FRANCIS**

Mersi Chair. Mersi Onorab pou ou kestyon. Lo kote *digital marketing*, wi dan pou lannen ki pe vini, nou annan plan pou nou angaz plis nou bann otelye. Sirtou nou bann ptipti otelye an-term *training*.

Nou pou rekomans nou bann *training* dan *digital marketing*. E nou osi annan plan pou nou organiz - parey ou'n mansyonnen Onorab en *digital fair*, nou ti fer li an 2018 ki ti en sikse. E nou ti annan plan pou fer li dan bann 2020 osi tou ki nou pa'n kapab.

Me selman nou pou rekomanse aköz vre i enportan ki nou kapab konekte nou bann otelyer avek bann profesyonnel dan lendistri, ki kapab ed zot. Si zot pa kapab zot menm, i kapab ed zot pou zot pou zot

ganny serten lasistans pou met zot *at par* parey kwa ki lemonn pe demande ozordi.

Me selman i osi enportan ki nou mansyonnen, poudir atraver nou *website* ofisyel - *Seychelles.com* - i annan en *platform free of charge* ki nou donn tou nou bann operater dan lendistri. Zot annan zis pou *register*.

E pou sa nou pe fer en kantite avertisman. Nou menm pe sorti dan lofis pou al kot zot dan zot landrwa, nou fer *open days*, pou donn zot lasistans. Pou ed zot *with the registration* osi tou.

Me selman i en legzersis ki pe pas vremen dousman. *Seychelles.com* i *website* ki ganny pli vizite dan Sesel. E nou menm donn zot loportinite pou *convert any visit* ki ganny fer si sa dimoun i enterese pou boukte.

As *long* ki zot, zot rod en *booking site* ki zot travay avek. I kapab en *booking site* lokal pou *power* zot paz ki zot kapab *convert*.

So nou annan en plan an-term ki mannyer nou ed nou bann - sirtou nou bann pti letablisman pou zot *maximize* zot vizibilite *online*. E nou ti ava kontan ki zot angaze avek nou osi tou. Mersi.

**MR SPEAKER**

*Thank you.* Nou ava pas kot Direkter *Tourism Academy*. Silvouple pa repas lo tou bann sif, me reponn sa kestyon prensipal ki mannyer pou ogmant rannman *returns*.

**DIRECTOR STA TERENCE MAX**

Bonzour Mr Chair. Bonzour tou Manm Onorab e tou bann dimoun a lekout. Konsernan ki mannyer nou pe travay pou nou re stabiliz en pti pe nou *retention rate* dan lotel?

Nou'n deza komanse depi lannen pase bann proze kot nou'n *involve*, nou pe *involve* en pe bokou plis bann *GM* e bann sirtou bann *HR* dan lotel, pou nou kapab *track* en pti pe ki mannyer zot pe kontinyen devlop sa bann etidyan ler zot sorti *STA* pou ankadre zot pou zot kapab - pa zis reste - me devlop zot pou zot pran bann pozisyon ki bokou fwa la nou war pe ganny okipe par bann *expatriate*.

Lo nou kote nou'n devlop par egzanp sa ki nou apel *Industry Advisory Committee*. Nou annan en nouvo *Board* avek en Chairman, ki vreman proaktiv kot zot deza bann dimoun ki dan bokou letablisman touristik. E nou pe

fer sa zefor pou nou al pli pre avek lotel.

Zis pou koz lo sa sif ki ou'n donnen, sa sif i petet la ki mon annan enn ki pli *update*. Dan sa 200 marmay ki'n *graduate* nou annan nou a pepre 110 marmay la pou lemoman ki nou konnen *updated*, ki deza dan lanplwa dan lendistri.

So ki nou pe sey fer avek bann *HR*? Nou pe etabli en platform avek *STA* an traver *alumni*, kot nou kapab *capture* tou sa bann marmay zot bann mouvman dan lotel.

Problenm se ki la nou napa en sistenm kot nou kapab *track* tou sa bann marmay ki'n *graduate there and then* kot zot ete. Si nou napa zot limero telefonn;- par egzanp nou pa konnen kot zot ete *whether* zot dan lendistri *or not*. So-

Me selman nou konnen Departman *Tourism*, pe vin avek en aplikasyon - en *software* ki pou donn bann *HR there and then*, sa fasilite pou zot *update in terms of zot staff movements*. En mannyer nou ava pli kapab donn en *chiffre* pli egzakt an-term nou *retention rate*.

Me nou, nou konnen i annan, nou'n komanse i annan bokou ki nou kapab fer. E nou i enn parey mon'n dir nou *success story* se, ogmant

kantite marmay ki reste dan lotel. E sa nou pe travay fortman avek bann lotel an traver nou *Board* pou nou kapab rektifye sa sityasyon. Mersi Onorab.

**MR SPEAKER**

*Thank you, Director.* Onorab Uranie ou kestyon.

**HON ROCKY URANIE**

Mersi Mr Chair. Bonzour Minis avek ou delegasyon. Tou koleg Onorab. E byensir tou zabitan Zil Pros ki a lekout.

Minis ou'n mansyonnen ki ti napa vreman bokou konsiltasyon an relasyon avek sa *levy* pou lanvironnman.

Eski zot pe antisip okenn reaksyon negativ an relasyon avek sa *levy*, sirtou lo mon zil La Digue ki nou annan bokou sa bann pti letablisman touristik?

Mon dezyenm kestyon i zot ti fer sa lansman randevou Digwa lo La Digue e mon ti le zis konnen si sa pou kontinyen lo en baz anyel? E si i annan larzan dan Bidze pou sa? Mersi.

**MR SPEAKER**

Mersi. Mon ava zis note ki *levy* i pa size Bidze Minister *Tourism*. I en size *tax* kot Minister Finans.

So annou pa pas bokou letan lo la. Minis ou ava adrese *as fast as possible*.

**MINISTER SYLVESTRE RADEGONDE**

Mersi Mr Chair. Onorab Mersi pou ou kestyon. *Short answer* pou ou premye kestyon, eski nou pe antisip reaksyon negativ? Pa vreman.

En viziter ki'n pey en vakans pou vin Sesel, si i pe reste dan plizyer sa bann pti *guesthouse* ki La Digue par egzanp i annan en kantite, ki'n pey en pasaz pou vin sa zistans pou li pey R25 par zour, par nwit. Ordinerman zot reste 4 nwit La Digue - 5. R100 an plis lo zot *bill* lotel, mon krwar pa si i pou fer vreman en lenpak. So non, mon pa pe espekte okenn reaksyon negativ.

Bazar ki nou pe apel Bazar Digwa aprezan, mon krwar se sa non ki nou'n donn li, 'Randevou Digwa' ki nou ti fer an Septanm L'Union. Wi nou plan se kontinyen avek sa.

Me ki nou ti ava kontan parey bann lezot linisyativ ki nou pran, nou ti ava voudre prezan ki Onorab ou menm avek Ladministrasyon Distrik e bann partner La Digue prezan, i pran sa zot tay avek.

Nou, nou pou *take a step back*. Nou'n inisyé, prezan zot

ale. Be nou ti ava voudre war li kontinyen. Mersi.

**MR SPEAKER**

Mersi. Bann Manm sey fraz zot kestyon pou kourt. *Ok* klarifikasyon, klarifikasyon silvouple al lo pwen dan en fraz.

**HON ROCKY URANIE**

Mersi Mr Chair. *Minister* eski zot anvizaze petet vin zwenn sa bann pti letablisman, petet pou eksplik zot en pe plis lo la? Kekfwa ou ava ganny sans tann zot osi.

Akoz i annan ki'n vin anver mwan ki'n eksprim serten dezapwentman e mekontantman sirtou avek sa lanons. Mersi.

**MR SPEAKER**

Mersi. Minis ava not sa komanter. Onorab Monthy?

**HON PHILIP MONTHY**

Mersi Mr Chair. Bonzour Minis ek ou delegasyon. Kestyon i pou *STA*. *Challenge* ki zot pe fer fas avek lo nivo lenfrastriktir, ki sa Bidze ki la pe prevwar pou zot?

Akoz mon konnen, mon aprann ki Departman Lasante in ferm *mess hall*, en restoran en lakwizin ki ti pe ganny servi pou *practical* osi.

So ki kontrent sa pe koze pou zot lo nivo lenfrastriktir? E ki sa Bidze pe prevwar pou ede soulaz sa sityasyon?

E apre mon vwar en logmantasyon lo lekipman pou lakwizin avek *laundry*, sorti 15mil pou al 560mil.

E mon konnen ki dan dezyenm faz nouvo lekol, ti annan serten sonm lekipman, kantite lekipman ki ti'n ganny aste. E ki'n arive ek sa lekipman? Akoz sa bann lekipman akoz mon war en gran logmantasyon la pou *purchase* nouvo lekipman? Mersi.

**MR SPEAKER**

Direkter ki pou pran? Mersi Minis.

**DIRECTOR STA TERENCE MAX**

Mersi Mr Chair. Mersi Onorab Monthy. Premye kestyon, konsernan lenfrastriktir parey toultan mon dir i en *challenge STA*. E ler ou pe koz sa *mess hall* parey sa bann Onorab ki'n vizit *STA*, zot in war poudir en batiman ki vye, ki'n la depi lepok bann Meriken.

Nou, nou sey fer nou mye pou maintain li. Me par kont avek laz nou'n komans santi i anna en bon pe *challenge*. So ti annan en proze pou *part* ki nou apel *part of phase 2* pou

rekonstri par egzanp restoran, *demo kitchen, Wellness and Spa, front office*, laklas avek bann *demo rooms, laundry* osi tou dan sa proze.

Ki ler nou ti *submit* anba *PSIP* lannen pase ti tonm environ 36.5mil. Me nou'n ganny dan Bidze la *for the next 3 years* 16milyon.5. - 16.5milyon, ki fer ki nou pou bezwen re vizite, re priyoritiz sa bann proze.

E pou lannen prosen par egzanp nou'n ganny 3milyon. Nou deza annan bann konversasyon avek *SIA*. *In fact*, zot ki pe diriz nou, pe gid nou anba zot sipervizyon pou nou vwar ki priyorite.

E la nou'n *agree* dapre zot ki *second half of next year*, nou ava komans en bout sa proze ki annan pou fer avek restoran ek lakwizin. Pou kapab remet li o nivo.

Zis an pasan poudir sa sityasyon ek Lasante in fini ganny rezourd. Yer bomaten zot in vini nou'n reganny nou *license*, me selman nou annan en pe bann pti louvraz, *maintenance* ki nou pe kontinyelman fer, pou nou kapab re aranze antretan ki nou kapab ganny sa bann redevlopman. Sa i kestyon limero 1.

Kestyon limero 2 bann lekipman - ler mon ti antre lofis lannen pase wi ti annan en kantite lekipman ki ti'n ganny *purchase*, ki ti sipoze pou sa *phase 2* en bon pe lannen avan.

Me nou ti *call in* Minister Finans, akoz mon ti war i annan bokou sa bann lekipman son leta nou ti nepli kapab servi.

So, Minister *Finance* ti vini ti'n fer odit. So tou bann lekipman ki nou ti kapab servi, nou ti ganny laprouvasyon pou nou redistribye.

Me i annan bokou lekipman osi ki nou'n bezwen *unfortunately discard*.

Nou'n met dan sa Bidze pou nou aste bann lekipman. Se akoz bokou bann lekipman ki nou annan la i vye. E nou ganny bokou difikilte sirtou avek bann four, *calendar* dan *laundry*.

So se sa ki ou'n war nou met sa larzan la, pou nou kapab re investir dan sa bann lekipman. Ki bokou fwa ennler sirtou lakwizin i kapab koz risk osi tou, ki sa nou pe pran o serye.

So vwala. Mersi Onorab.

### **MR SPEAKER**

Mersi. Klarifikasyon dann en fraz silvouple Onorab.

**HON PHILIP MONTHY**

Wi rapidman Mr Speaker. Zis en pti *follow-up*. Eski Minister Finans i kapab dir nou valer sa bann lekiman ki'n ganny zete, ki'n ganny *discard*?

Ki kantite, ki sonm larzan an-term lekiman ki'n perdi? Mersi.

**MR SPEAKER**

Mersi. Minister Finans, eski ou annan sa detay?

**COMPTROLLER GENERAL  
ASTRIDE TAMATAVE**

Mr Chair la mon napa sa lenformasyon. Selman nou kapab rode e fer Lasanble ganny sa lenformasyon. Mersi.

**MR SPEAKER**

Mersi. Onorab Cosgrow ou kestyon?

**HON WALLACE COSGROW**

Bonzour Mr Chair. Mersi Mr Chair. Bonzour Minis, delegasyon. Bonzour tou dimoun ki pe ekoute.

Mr Chair mon premye kestyon i an se ki konsern en kestyon Polisi. Minis in dir nou ki i annan apepre 300 - nou pou annan apepre 330mil touris ki vin Sesel si tou i mars byen lafen lannen.

Mon krwar ki sa i en sif ankourazan - *given* sipor ki

Sekter Tourizm i gannyen sirtou pandan bann letan COVID, ki zot in kapab tenir debout. E zot in kapab rebranler marse i re ouver.

Now Minis mon anvi ou dir mwan lo kestyon Polisi, eski Gouvernman pe mazin met en *cap* lo la kantite touris ki vin Sesel?

E ki bann letablisman ki zot pe ankouraze, bann nivo letablisman si pti, si mwayen ou si gro, ki zot pe ankouraze pou kapab *maintain* sa nivo touris ki nou anvi?

Dezyenm i an se ki konsern sa *tax* lo bann pti lotel. Mon konnen ou'n koz lo la, lo bann lotel an zeneral, mon konnen ou'n koz lo la.

Be Minis mwan mon santi ki poudir okenn desizyon ki annan pou fer avek en keksoz i afekte *the trade has to be - the trade has to be part of it* - en?

Mon senserman krwar *the trade has to be part of it*. E mon swe se ki *next time* i annan en desizyon *comme* tel, mon konnen i annan en retonbe ekonomik an-term reveni ki antre Sesel.

Me i posibleman ki dan *trade* osi pa ti ankor pare akoz parey mon ti tann Mrs Cardon si mon pa tronpe lo televizyon. I dir zot in fini fer zot bann *booking*, fini fer zot bann zafer



ki zot bezwen sanze ankor dan detrwa mwan ki zot pou al refer.

So i afekte the *trade* an-term ki mannyer zot aziste zot lozistikman. So eski ou anvizaze met sa devan Minister Finans, e fer sir ki Minister Finans i konsilte zot avan i annan sa bann sanzman?

E trwazyenm Minis,

**MR SPEAKER**

Silvouple nou pe adres 2 pwen Onorab.

**HON WALLACE COSGROW**

En senp pti pwen Mr Speaker.

**MR SPEAKER**

Nou pe adres 2 pwen Onorab, sansan mon pa pou ganny sans donn tou dimoun zot kestyon. Mersi mon ava les *Minister*.

**HON WALLACE COSGROW**

I konsern serten *issues* dan kominote Mr Speaker.

**MR SPEAKER**

Nou ava les Minister *Tourism* reponn silvouple. E lo Polisi Minis lareg ki mon'n etabli, nou adres Polisi an koneksyon avek Bidze. Silvouple i annan en pwen spesifik ki in demande lo Polisi, annou pa etal li pli lwen, zis repons pou sa kestyon.

**MINISTER SYLVESTRE RADEGONDE**

Mersi Mr Chair. Onorab mersi pou ou kestyon. Ou demann mwan lo kantite touris dabor ki Sesel i kapab resevwar?

Regarde sa i en letid ki nou bezwen fer. Mwan mon annan en lopinyon personnel dapre lenformasyon ki i annan la konmela. Me nou bezwen al en pti pe pli dan fon.

Mwan mon krwar 400 - 450mil a mon avi dapre lenformasyon ki nou annan la, i devret *cap* ki nou devret aret lo la. I annan i panse nou kapab al 500mil. A diskite nou ava kontinyen sa diskisyon ki nou pe fer.

Kategori lotel, pou konmela nou annan deza en *cap* lo konstriksyon bann gran lotel. Travay ki nou bezwen fer Onorab e sa mon toultan dir. Se ki nou devret dan bann lasanm ki nou annan la, dan bann lotel, dan *guesthouse*, dan *self-catering*, nou devret lev standar.

E se la kot nou *challenge* i ete. lev standar. I annan parey Onorab Gill in mansyonnen pli boner ki pe sarz €50, €60.

Avek en pe travay lev nivo zot akomodasyon fizikman, lev servis. I annan posibilite pou zot fer plis larzan avek sa menm lasanm. So se sa travay ki nou

bezwen fer e se sa nou'n komanse avek nou program *Small Establishment and Development Program* pou nou donn sipor prensipalman sa bann pti letablisman pou lev zot standar.

An sa ki konsern konsiltasyon, *tax*, i annan 2 keksoz e fodre pa nou anfen mon krwar pa Onorab si ou pe melanz tou lede.

I annan sa *tax* lo bann lotel ki Minis Finans in anonse, apre i annan sa *levy* ki viziter i peye dapre kategori lotel ki zot reste ladan.

Konsiltasyon wi in annan en serten degre konsiltasyon. Me mwan mon ava aksepte ki nou pa'n petet al ase lwen ladan. E se sa enn dan bann rezon osi se ki lenplimantasyon *tax*, mon krwar Minis Finans in deza anonse ki sa i pran lefe an April.

Pou donn letan bann operater, bann partner dan *trade*, pou zot diskite, negosye dan zot *next pricing*.

So mon pran kont ou konsern ou komanter. Wi i annan lespas pou nou fer pli byen a lavenir, nou ava fer pli byen. Mersi.

### **MR SPEAKER**

Mersi. Onorab Hoareau, kestyon.

### **HON JOHN HOAREAU**

Mersi Mr Chair. Bonzour tou dimoun ki a lekout. Mr Chair mon kestyon i baze en pti pe lo bann lensidan sekirite lo lans, ki mon krwar i form parti zot bann, sa ki zot in dekrir koman bann *challenges - risk and security bullet point* ki zot in mete.

Nou pe vwar poudir plizanpli i annan bann dimoun ki vin par egzantp lo lans Beau Vallon ki vin vann solisit en lavant koko lo lans ler touris pe dormi, oubyen ler touris pe pran son ben soley.

E tou resaman - yer menm - zis mon le partaz sa avek Minis, ki i annan enn ki'n pran larzan touris ou konnen ler touris fek vini i annan bann biye R500. In pran larzan pou koko an prometan pou li rann larestan larzan pli tar, apre in al net.

Ler sa touris in vwar li in retir son portre e in *corner* li, li in pran en koko in tap sa touris avek dan leren, in lev en gro plak ble.

So sa bann lensidan koumsa ki nou pa oule *tarnish* nou repitasyon touris. E osi si ou kapab adres size bann *cultural tourism* dan bann *track*, bann landrwa kot bann touris i al marse dan lafore. Akoz nou'n

vwar en kantite lensidan ki'n arive tou resaman lo sa size.

Mr Chair mon ti ava kontan osi ki Minis i adres lefe ki son *other uses of goods and services* anba latab 5, in monte sorti 14milyon pou al 23milyon. Mon pa'n tann ou mansyonn sa dan ou *introduction*. So si ou kapab donn nou en pti kontrandi akoz sa?

E osi sa *satellite account, tourism satellite account* ki lannen pase zot ti'n dir nou koumsa poudir zot ti'n met larzan dan *consultancy* pou fer sa arive, pou fer sa *tool setup*.

Me nou pa'n vwar ni *mention* dan zot *major achievement* oubyen zot *current challenges*. So mon ti le konnen ki pe arrive avek sa? Mersi.

### **MR SPEAKER**

Mersi. Onorab mon pa ni sir konbyen kestyon ou demande. I annan plizyer pwen, ou ava *stick* pou 2 pwen. Minis ou repons silvouple.

Mon krwar i annan serten kestyon ki lye alor-

### **MINISTER SYLVESTRE RADEGONDE**

Mersi Mr Chair. Mersi Onorab pou ou kestyon. Onorab nou konnen nou tou sekirite ki swa sa lo lans, dan lotel, dan

*guesthouse*, lo bann *trails* i en gro konsern.

Beau Vallon i enn sa bann latet fermal. Mon'n vini mon menm personnelman mon'n vin marse lo lans Beau Vallon en bout ou ti la. En bout lans a lot pou nou kapab demann *challenge* ki annan, ki nou bezwen adrese.

E nou devret mon krwar arete koze, nou devret azir. Mwan mon portfey mwan i *Foreign Affairs* avek *Tourism*. Mon idantifye en problem, mon depan lo en kantite lezot Lazans, lezot partner pou apre zot tou fer zot bout.

E se sa mon dir touris i pa en zafer Minis Departman Touris. *Tourism* sa lendistri ki vital, i devret zafer konsern tou dimoun. Ki dan Gouvernman, ki pa dan Gouvernman. Nou tou nou bezwen fer nou rol.

E sa dimoun ki'n vole eske i pa premye ka. Ki'n vole e plis ki sa in agres en touris. Mon krwar i oubliye ki domaz i fer. En lensidan koumsa *ripple effect* ki i annan e ki fer ki repitasyon Sesel i gate.

Donk tou sa travay ki nou, nou fer, tou sa tanbour ki nou bate pou anmenn touris, avek en aksyon pou en koko lo lans Beau Vallon, i gat tousala.

So mon pa konnen ki mon pou dir ou espekte ki nou

bezwen azir. E nou'n ganny plizyer konversasyon avek bann lezot Lazans poudir azir ler nou azir, i bezwen vit. E si i en zafer ki konsern Lakour i bezwen vit sa *case* i ganny al Ankour.

E Lakour osi san ki nou enterfer ki santans Lakour i donnen. Me i annan Lalwa ki prevwar en serten *minimum sentence*, fodre ki Lakour i donn sa santans ki i devret donnen, pou donn legzanp tou dimoun.

So vwala ki mon kapab dir ou lo la.

### **MR SPEAKER**

Byen nou ava al lo lot pwen silvouple. Ou pe pas avek *PS*? *PS please*.

### **PS SHERIN FRANCIS**

Mersi Chair. Mersi Onorab. *Other use of goods and services* sa gran logmantasyon, ki ou'n war i senpleman en re klasifikasyon bann *subscription* pou *market intelligence* ki ti dan *marketing cost*, ki nou'n bouz li la dan program 1.

E *software* osi ki nou ti pe servi pou nou *digital marketing* osi ki ti dan *marketing cost* ki nou'n rebouz li la. Se pou sa rezon ki ou war sa logmantasyon.

Ou lot kestyon lo *tourism satellite account*, anfet i dan nou lalis bann *achievement* si

ou'n lir nou premye paz, nou ti konplet li Septanm sa lannen. E la nou lo faz lenplimantasyon.

Nou pe travay tre pros avek *National Bureau of Statistics* akoz zot ki pou *the implementing agency*. I annan *the exit survey* par egzanp ki i en konponan dan sa *satellite account* ki pou rekomanse osi tou.

E rezilta sa program ou pou kapab war li petet dan en lannen ler nou'n revwar fason koleksyon lenformasyon pou *Tourism*, la ki nou pou kapab war diferans ant nou statistik ki nou ti annan avan e statistik ki nou pou annan apre. Mersi.

### **MR SPEAKER**

Mersi. Onorab Gabriel silvouple?

### **HON CONRAD GABRIEL**

Mersi Mr Chair. *Welcome* Minis ek ou delegasyon. Direkteman lo *P4* lo zot *destination marketing*.

Minis dir nou ki mannyer zot pou *monitor* sa bann larzan pou ganny mete dan *destination marketing*, ki tonm pres 107milyon?

La osi mon ti oule konnen ki sa bann *other service agreements* ki lamazorite i tonm par lao 1milyon pou sa bann destinasyon?

E osi Minis anba zot '*other goods and services specialized expenses*' nou war zis en *Code pou marketing cost*.

Nou konnen poudir dan lepase *STB* in ganny pa mal difikilte pou *submit* zot *statement of accounts* pou odit. Zis petet donn nou en pe detay lo la silvouple?

*And then* Minis en pti pwen ankor Mr Speaker, ou'n nonm rikord *Tourism* Sesel. Vi ki Point Larue nou tonm lo *Airport*, nou pa kapab fer naryen *about this*. Zis ou lopinyon petet personnelman ou osi ou'n grandi Point Larue, ou'n la.

Zabitan in dir mwan petet pas sa pti mesaz. Vi ki nou soufer ek sa tapaz konmsi. Petet pou benefis kominote *STB* napa en plan petet met en pti zafer akote, R5 par touris i tonm 1.5milyon, i pa ti ava mal pou al dan bann proze kot Gouvernman pe ganny difikilte, drenaz, *sewage* lot, lot. Mersi Minis.

### **MR SPEAKER**

Mersi. Mon pe tret sa 2 premye pwen *marketing* koman en kestyon ki mon krwar i merit en repons.

Lo dezyenm mon demann Minis zis pou pran ou rekomandasyon. Nou pa

bezwen adres sa kestyon. Mersi.

### **MINISTER SYLVESTRE RADEGONDE**

Mr Chair mersi. Mersi Onorab pou ou kestyon. Zis anpasan mon ava dir nou pe ganny problemm avek sa R25 *environment*. Si ou demann ankor R5 pou al, nou pe azout problemm ki nou deza annan. *Anyway ...*

Lo *destination marketing*, mon ava pas laparol avek *PS* en pti moman. Me zis pou mwan dir ki depi nou fer sa restriktirasyon kot *STB* in vin anba Departman *Tourism*, nou'n fer en kantite *saving actually* dan *marketing*, dan depans ki nou fer pou *market* Sesel.

E sa *PS* i ava eksplike ki mannyer in arive. E i ava osi donn bann lesplikasyon lo sa bann diferan *contracts service agreement* ki nou annan avek nou bann partner aletranze.

*PS* osi ou ava kouver poursantaz Bidze ki nou depanse lo *marketing* pou nou ganny sa kantite touris ki mon pe gannyen. Mersi.

### **MR SPEAKER**

*Thank you. PS* lo *marketing*.

### **PS SHERIN FRANCIS**

Mersi Onorab pou ou kestyon. Lo kote *destination marketing* li menm, parey Minis in masyonnen - 40 pousan nou Bidze nou depanse lo *marketing cost* pli prezizeman.

E sa *figure* ki ou'n war la i pa zis *marketing cost* ki ladan osi tou. I osi enkli sa ki parey ou'n masyonnen *other service agreements*.

Sa bann Kontra i bann Kontra bann *staff* deor ek bann reprezantasyon. An tou nou annan 12 Kontra e in bokou redwir konpare avek kantite Kontra osi nou ti annan oparavan.

Minis in masyonnen ki manner nou'n kapab ekonomiz lo kote nou loperasyon *marketing* sirtou deor.

Apepre 2an pase nou kou loperasyon *overseas* ti anviron R15milyon. Me avek restriktirasyon ki nou'n fer nou kou loperasyon in desann R1.5milyon dan en lespas 2an.

Ou'n demann kestyon osi lo ki manner nou mezire pou fer sir ki sa larzan pe ganny depans byen.

Parey ou'n war dan latab limero 10 Onorab, nou annan nou bann *KPIs* la. E tou aktivite *marketing* ki ganny fer i bezwen ganny mezire dan sa bann form.

Aktivite i bezwen annan sa ki ou apel *call to action*;- savedir ki i bezwen par egzamp, si nou fer en aktivite ki nou pe viz ver konsonmater nou bezwen rod en fason ki i vizit nou *website* pou nou konnen sa aktivite in efektiv.

E nou mezir li atraver nou bann *social media platform* ek bann diferan form langazman ki nou gannyen, atraver nou bann aktivite. E sa ki nou servi pou nou mezir lefikasite nou bann aktivite.

Ou'n osi masyonnen *in terms of statement of accounts*. Nou ganny odite;- ozordi *Tourism Department* nou ganny odite par Oditer Zeneral. E pou lemoman tou sa ki nou'n ganny demande pou fer nou'n *comply*. E *of course* nou *welcome* zot *for*, Oditer Zeneral *for the next audit*.

Mersi pou ou kestyon.

### **MR SPEAKER**

Mersi. Onorab Woodcock.

### **HON WAVEL WOODCOCK**

Mersi Mr Chairman. Bonzour Minis ou lekip, tou Manm e tou dimoun a lekout.

Mr Speaker mon kestyon i lo sa nouvo *levy* anba Lalwa Proteksyon Lanvironnman ki pou ganny sarze lo bann touris,

pou sak lannwit ki zot reste Sesel.

Parey ou'n dir Minis i pou vin an fors an Avril. Mwan mon kestyon, eski sa i *the right* modalite pou kolekte sa *tax*?

Eski wi prozeksyon zot in prozekte pou anmas R162milyon. Me mon kestyon i ozordi bokou bann lotel pe *under declare* - vreman kantite lasanm ki zot pe vann, i annan *transfer pricing*, eski nou pou vreman kapab anmas larzan lo sak lasanm parey nou merit anmase?

Ou petet nou ti kapab konsider lot fason parey kolekte *tax* lo *Airport* ouswa lo tiket? Konmsi zis mon pe demande si vreman zot pou anmas larzan - sa kantite larzan ki zot merite atraver sa *levy* lo lavant bann lasanm lotel?

E dezyenmman mon lot kestyon i baze lo proze anba *PSIP* pou *STA*. Annefe vre nou fek fer en vizit pa bokou letan pase *MYCC* kot *STA*, kot sa Lakademi.

E en konsern ki ti ganny souleve e nou'n war nou menm leta ki sa kantin, sa *mess* kot sa *demo kitchen* i ete kot kantin i ete, i vreman dan en move leta.

E non selman sa, kot sa *Spa* osi sa 2 batiman zot leta i vreman ou konnen pa'n ganny fer en bon travay lo la.

E sa alokasyon R7milyon ki mon pe war pou, ki pou restoran avek sa *demo kitchen*, ki kalite travay vreman zot pe fer?

Eski in *the long term* lentansyon osi pou kraz sa *building* re fer enn nouvo, enkli sa enn anba? Konmsi ki sa alokasyon 16.5milyon ki bann travay vreman ki pe al ganny antreprann lo la?

E si zos reparasyon *is the way to go* ouswa petet konpletman re fer sa 2 *building* kot sa kantin i ete e osi kot *Spa* i ete anba? Mersi.

### **MR SPEAKER**

Mersi. Parey mon'n dir kestyon *levy* i en kestyon *tax* ek Minister Finans. Minis ou ava reponn briyevman lo ki mannyer i afekte ou Minister si i nesaser.

Nou a prosede?

### **MINISTER SYLVESTRE RADEGONDE**

Mr Chair, mersi. Mersi Onorab pou ou kestyon. Onorab ou ava eski mwan, mon annan en *flu* e avek sa i blok mon zorey. So mon pa tro konpran. Me mon'n konpran *levy*.

Mon konpran ou annan en lopinyon, mon krwar i annan pou fer avek koleksyon. Ou konnen sakenn i annan en

lopinyon ki manner ti devret fer.

Nou ler ti pe diskite sa dan *Cabinet* osi ti annan plizyer lopinyon lo ki manner nou devret prosede. *So yours is another one.* E mon kapab met ki koumsa koman en lopinyon.

Lo travay ki nou bezwen fer - *STA* wi. *STA* i dan en leta. *You know* apard bann laklas ki'n parey ou'n war ki tenir debout byen solid. I annan tou sa parti kote anler i dan en letan enpitwayab.

So wi 17milyon pa pou anmenn nou en gran distans, me mon ava les Direkter adres partikilyerman spesifikman sa.

### **MR SPEAKER**

Mersi wi. Direkter ou a eksplike?

### **DIRECTOR STA TERENCE MAX**

Mersi Mr Chair. Onorab mersi pou ou kestyon. Parey mon ti pe dir avan nou ti'n bidzete dapre sa konsepsyon *design* ki ti annan avek *QS* ki ti'n re vizite, sa proze pou kraz antye sa *building* pou refer baze lo sa plan ki ti annan, ti pou tonm apepre en 36milyon.

Me par kont parey nou ti pe dir nou'n ganny nou la *for until 2025* en sonm apepre 16.5milyon. Ki ler nou'n

konsilte parey mon pe dir ansanm avek *SIA* zot ki'n re fer sa legzersis reevalyasyon. Zot ki pe *lead* nou dan sa proze. E nou'n vwar poudir nou'n ganny 3milyon pou lannen prosenn.

*So the idea* la se ki nou anvi, idealman nou ti ava anvi konstri sa proze dapre sa *design*, ki ti pou enkli departman, en *demo* pou *front office*, *Wellness and Spa*, *classrooms*, *demo kitchen*, restoran, *laundry*, eksetera.

Me avek sa sonm ki nou'n gannyen, nou'n bezwen re pre otizm li. E diskisyon ki nou'n gannyen avek Departman *SIA*, se ki lannen prosenn nou pou komans avek sa restoran ek sa lakwizin.

Sa lakwizin, *mess hall* ek sa restoran, ki nou pou bezwen demoli, byensir zot ava vin avek zot fason, zot pli konn en pti pe sa bann teknik manner pou fer.

Demoli, rekonstri li. Met li lo en oter - en standar ki nou ti ava anvi vwar *STA*. Sa apre pou son lot faz ki nou ava annan 5milyon. E la *SIA* ankor ava gid nou, kwa ki nou kapab gannyen de bon *in terms of new building* avek sa 16.5milyon.

*And I hope* kekfwa a lavenir lan, 2an zot kapab rekonsidere, ki nou kapab re enplimant sa proze lo son pli



gran lanpler. E donn nou sa fasilite lo sa standar lo sa nivo, ki nou krwar *STA* i *deserve*. Mersi Onorab.

**MR SPEAKER**

Mersi Direkter. Onorab Loze. Onorab Loze in sorti, fotespere i annan en bon leskiz. Mon a pran Onorab Ernesta.

**HON PAUL ERNESTA**

Mersi Mr Chair. Minis ek ou delegasyon, bann koleg Onorab e tou dimoun a lekout bonzour.

Mr Chair mon premye kestyon i annan pou fer lo program 1. Kot mon war i annan en logmantasyon ase signifikan lo kote *license fees* pou bann *software*.

Petet Minis i kapab donn nou en pe klarifikasyon aköz sa, eski zot pe sans nouvo *softwares* swa zot pe renouvle? Konmsi donn nou en pe plis detay lo la.

Aprè mon dezyenm kestyon i annan pou fer avek program 3, ki annan pou fer ek *training*. Minis boner in koz nouvo restoran ki zot pe al antreprann lannen prosenn. Eski sa pou annan lenpak? Nou konnen ozordi i annan sa *STA annex* ki kot marmay i *Coast Guard*.

Eski sa pou annan lenpak ek marmay kot *training*? Eski

zot pey marmay pou *training* kot *Coast Guard* e osi pou al dan sa nouvo restoran?

Ki nouvo laranzman ki annan pou fer aköz mon vwar i annan en pti pe osi sanzman, varyasyon lo zot *training fees*? Petet en pe plis lesplikasyon lo la. Meri Mr Chair.

**MR SPEAKER**

Mersi. *Sorry* mon krwar Minis in endik *PS*. Si *PS* in pare.

**PS SHERIN FRANCIS**

Onorab Mersi pou ou kestyon. Sa logmantasyon ki ou war lo kote *software* e ki i pou aparet osi kot *subscription*, i pa en logmantasyon me plito i en re klasifikasyon pou sa bann depans i ti ganny mete dan en lot *Code*.

I ti pe ganny tire dan *marketing* e i relye avek nou bann aktivite *marketing*, ki la nou pe re klasifye li nou met li dan *program 1 -governance*. Mersi.

**MR SPEAKER**

Direkter pou kontinyen.

**DIRECTOR STA TERENCE MAX**

Mersi Mr Chair. Mersi Onorab pou ou kestyon. Konsernan nou bann *modality of training*. Byensir parey ou'n endike

nou'n bezwen revisit nou kalandriye;- setadir nou *academic calendar* an antye, pou nou kapab enplimant sa bann *new training modalities* ki nou'n met an plas.

Byensir in en legzersis ki en pti pe difisil, akoz nou annan diferan group marmay lan ziskan 3an. Diferan program.

Me parkont nou'n kapab avek nou *Academic Department* tonm lo en konklizyon, kot nou kapab *fit in* tou sa bann program, sa bann *training models*.

Nide par deryer tousala parey Minis in mansyonnen o komansman, se pou donn marmay pou *broaden* sa loportinite *in terms of training and exposure*.

E sa en rezon par egzantp akoz nou'n nou pou siny sa Lakor avek *NHF*. Pou nou kapab donn marmay i annan sa posibilite, pou nou kapab met marmay ekspoz zot dan en diferan *mode of training*. Kot la zot ava ganny ekspoze avek sa ki nou dir *real guest*. Setadir touris menm dan lakominote.

Me selman zot pe rode osi pe ed zot pou develop *the business mindset*. Setadir par egzantp bann marmay ki fer *Management*, pou zot kapab konpran en pti pe ki mannyer loperasyon i marse.

So tousala ek nide se pou *beef up* en pe nou *quality of training*. Me wi nou'n tonm lo en bon laranzman nou'n konnen byen ki mannyer pou organize. Ki nou kapab *fit in* tousala.

So *basically* marmay ler zot pe fer zot 'Pratik', par egzantp restoran oubyen lakwizin *instead of* sepa fer *STA*, zot a fer *STA* en zour en lot zour zot al Vye Marmit koumsa. Mersi Onorab.

### **MR SPEAKER**

Mersi Direkter. Onorab William?

### **HON WAVEN WILLIAM**

Mersi Mr Chairman. Bonzour Minis avek ou delegasyon. Mr Chairman mon ti ava kontan demann en kestyon an relasyon avek stratezi.

Wi lo kote stratezi, Minis par lefe ki tou bann destinasyon la in ouver, malgre ki nou annan serten *trace of Covid* ki pe ravaz lemonn.

Mon anvii konnen avek ou si dan sa promosyon pou promouvwar *bullet point* anba stratezi, si zot annan en *Inter Agency Committee* ki'n ganny formen, pou kapab vreman fer sir ki nou maksimiz reveni koleksyon reveni dan Lendistri Touris?

Akoz mon'n ekout koze plizyer fwa e ki mon dakor avek ou bann entervansyon ki ou fer, se ki nou pa pe maksimiz sa lakantite touris ki vin dan pei, reveni ki pe antre, nou pa pe maksimiz ase lokalman.

So mon anvi konnen si zot annan, ou annan sa Komite ki ou kapab lyez avek tou bann parti prenan?

An menm tan mon le felisit ou Minister avek Departman *Tourism* pou travay ki zot in fer panda sa 2an, ki ozordi la nou pe rekolte sa benefis dan Departman *Tourism*.

An menm tan remersye Direkter Lekol Otelyer, pou koperasyon ki i donn avek distrik Grand Anse Mahe.

E finalman Mr Speaker, mon anvi ki Minis i dir avek nou si, mon dakor sa program zot in lanse dan lekol. Akoz vre ou bezwen komans dan lekol pou kapab devlop sa kiltir pou bann travayer dan le fitir dan Lendistri Tourizm.

Mon anvi konnen si zot annan en *follow-up* pre ant Minister Ledikasyon, Lekol Otelyer avek Departman *Tourism* li menm li?

Akoz si napa sa bon kordinasyon- Dan lepase nenport *Tom, Dick and Harry* menm si grad pa ti bon, nou ti fer antre.

Me nou bezwen lev nivo ki mon dakor avek ou. So mon anvi konnen si i annan sa kordinasyon? Akoz si napa kordinasyon menm si sa bann groupman pe ganny kre dan lekol, me si napa swivi i pa pou vremen ganny sa kalite mendev dan Sekter Tourizm ki nou anvi. Mersi.

**MR SPEAKER**

Mersi. Minis nou annan 2 pwen la pou adrese.

**MINISTER SYLVESTRE RADEGONDE**

Mersi Mr Chair. Onorab mersi pou ou kestyon. E mersi pou ou mo lankourazman.

Eski nou pe travay an kolaborasyon, nou annan en Komite? Wi nou annan en *Diversification Committee* ki regard tou bann *panoply*, kan mannyer nou kapab annan bokou plis aktivite, divers prodwir pou nou ganny touris pou depans lo la.

E an plis ki sa parey ou ava petet swiv dan medya osi, mon regilyerman zwenn avek bann diferan *entities*; - ki sa swa *taxi, yacht, divers* ensidswit. Pou fer le pwen ki mannyer nou kapab zener plis - anfen donn en servis ki a laoter ki nou kapab zener plis reveni, sa travay i bezwen kontinyen.

E Onorab mon dir ou mon'n al *World Travel Market Londres 2* semenn pase, e mon enkyet an menm tan ki mon ankouraze pou Sesel.

Mon enkyet parske lemond in ouver e la laport i gran ouver. E ler mon regard konpetisyon ki Sesel i annan i fer ou per, i fer ou per.

E nou bezwen nou toultan an avans lo nou *game*. Nou bezwen e sa mon pa pou arete repete. Nou pou bezwen sorti dan sa *comfort zone* ki nou krwar akoz nou zoli, nou annan zoli lans, zoli lanmer ensidswit touris pou vini nenport kwa ki nou fer, ou kwa ki nou pa fer. I pa le ka ditou. I pa le ka ditou.

Mon regard zis dan nou rezyon, dan nou sou rezyon Losean Endyen konpetisyon ki annan - i enkrwayab - i enkrwayab. So nou bezwen *ahead of our game*. Nou, nou pe kontinyen fer sa ki nou devret fer, pou nou fer sir ki nou donn en servis ki a laoter.

Annan prodwi, annan plizyer keksoz ki permet touris depanse e kit larzan dan lekonomi.

Nou'n komans travay lo en Polisi *cruise ship* akoz ziska konmela dezole petet mon pou ofans serten dimuon - nou'n ganny sa bann *cruise ship* ki vini devers mil ekek pasaze, ki

debarke ganny pran met dan en bis al lo en lans aste en boutey delo retournen al manze lo bato. Deryer ki zot kite se prensipalman salte.

E lekel ki benefisye dan sa biznes? Mon pa dir personn pa benefisye, serten dimoun i benefisye me pa tou.

Mon ti ava voudre war ki benefis ki nou gannyen dan *cruise ship* - koman en legzanp i bokou plis ki sa ki nou pe gannyen. E i annan en Komite ki sirplas la pou nou zisteman annan bann keksoz pou viziter depans lo la.

Ler mon'n sorti *Londres* semenn pase mon ti *Tunisie* e pou zot konmela zot pe ouver avek *Covid* tou dousman. E zot osi zot ganny en kantite *cruise ship*. E zot biznes ki zot gannyen en *cruise ship* se lartizana.

E sa ki vreman pe *sustain* zot lekonomi en kantite konmela. Se ki kantite lartizana ki zot pe met devan touris pou aste. Nou devret regard sa bann posibilite osi.

Lo kestyon korperasyon avek Minister Ledikasyon, wi koman Direkter i responsab pou Lakademi, etidyan ki nou resevwar Lakademi mon ava pa laparol avek li. Mersi.

**MR SPEAKER**

Yes, Direkter nou ava termin lo la.

**DIRECTOR STA TERENCE MAX**

Mersi Mr Chair. Mersi Onorab e mersi pou mo lankourazman osi. E sa *partnership* ki nou annan avek Grand Anse Mahe.

Wi konsernan *partnership* ki nou annan avek Minister Ledikasyon, wi Lakademi i pa zis i annan en kote lebra kot *tourism* ki *of course* nou *report to them directly*. Me selman osi nou annan en gran rol pou zwe ledikasyon.

*At the end of the day* nou, *we are an education institution*. So nou travay etrwatman avek Minister Ledikasyon e mon *attend bann meeting, bann forum*.

Seleksyon i ganny fer par egzant par Minister Ledikasyon ki nou osi nou bezwen partisip ladan. E la dan konteks seleksyon e se sa pwen kekfwa ki ou ti pe fer resorti. Nou idealman nou ti ava kontan annan bann zenn i vin kot Lakademi aköz i zot swa. E aköz zot in pas dan serten program, ki'n ed zot sansibiliz zot pou devlop oubyen sa pasyon, ki zot ler zot deside pou vin kot Lakademi, zot in fer en *informed decision* e zot konnen kote zot anvi ale.

I pa neserman le ka la. I annan sa sityasyon kekfwa kot en zenn zis i deside, be mwan mon al *STA* mon ganny en *allowance*, oubyen apre mon fer 2an apre ou pa war zot. E sa pou mwan i en gro konsern aköz sanmenm sa ki *determine our retention rate* dan lotel. E en keksoz ki nou bezwen adrese.

So ki mannyer nou pe fer sa? Nou pe travay etrwatman avek Minister Ledikasyon kot nou al fer *school talks* dan lekol. La nou'n met en serten propozisyon devan ki nou ankor pe diskite lo la, ki annan posibilite en kontinyasyon dan sa program 'Lospitalite' ki'n ganny lanse.

Petet *PS* i kapab koz en pti pe plis lo la. Be mon osi dan sa program 'Lospitalite' par kont mon form par. Mon en *Chairperson* dan en *sub* komite ki annan pou fer ek ledikasyon dan 'Lospitalite'.

E byensir i annan bann lezot partner ki sorti kot Minister Ledikasyon ki dan sa Komite Lospitalite.

So nou, nou ti ava anvi idealman vwar en sityasyon kot en program *Tourism* oubyen 2, oubyen 3 i ganny entegre dan *curriculum* lekol segonder.

So i ava fer ki ler nou'n komans ek lospitalite en zenn ler in fini10an ek lospitalite, i

antre dan *S1* ziskan *S5*, i annan en program dan *curriculum* ki pe *teach Tourism and Hospitality*. Parey nou dir sa i nou *bread and butter*. I pa *appear* dan *curriculum*.

So nou'n deza met sa diskisyon devan *Minister of Education* e i *very for that idea*. E nou pe gete ki *manner* nou kapab anmenn sa devan. *How long it will take*. Mon pa konnen selman i annan konversasyon, diskisyon ki pe ganny fer.

E Minister byento in deza pe ganny inisye lo kote Departman osi tou. So ki fer ki *hopefully* nou ava ganny zenn *STA* ki enterese e ki evantelman zot a reste dan lendistri. Mersi.

### **MR SPEAKER**

Mersi Minis nou a pas lo lot kestonn avek ou konprenezon. Onorab Lemiel.

### **HON SYLVANNE LEMIEL**

Mersi Mr Chair. Bonzour Minis avek ou delegasyon. Minis parey ou konnen Anse Royale i en distrik ki de pli an pli ou pe vwar logmantasyon. Par egzamp dan *guesthouse*, nou annan en nouvo lotel ki pe ganny konstri, byento pou ouver.

Mon pe regarde ki konponan dan ou Bidze 2023, ki ou pe annan petet pou ou

travay pli pros avek sa bann - mon konnen nou'n fer vizit, nou ale. Me ki konponan petet ki ou pou annan la, pou nou kontinyen annan sa travay pros avek sa bann pti letablisman dan distrik e an menm tan sa nouvo lotel ki pou ouver? Pou ki zot kapab kontinyen fer byen e menm reisir dan zot biznes.

Dezyenm pwen, ou'n nonm lo kote bann nouvo linisyativ. Sa i byen, mwan mon pe regarde dan ou Bidze 2023, wi sa bann nouvo linisyativ ki Departman Touris pe vin avek, ki kalite sa bann aktivite petet ou pe mazine?

Akoz mon santi ki vre i annan serten sa bann aktivite ki merit ganny desantralize, ki i ava kapab annan plis en pti pe partisipasyon dimoun dan kominote e ki i ava vin *en win-win* kot dimoun dan lakominote li menm, i kapab montre en pti pe nou kiltir, kwa ki nou pe fer, vann zot bann pti prodwi. E touris osi i ava kapab konpran ki *manner* nou dan kominote nou, nou pe viv.

Sa osi petet ki konponan dan ou Bidze 2023 ou pe mete, pou ou kapab desantraliz en pti pe sa bann aktivite lo nivo Mahe la? La Digue ou'n koz lo la, Praslin - Mahe. Mersi.

### **MR SPEAKER**

Mersi Onorab. Minis 2 pwen pou adrese.

**MINISTER SYLVESTRE RADEGONDE**

Mr Chair Mersi. Mersi Onorab pou ou kestyon. Onorab nou'n fer letour ou distrik nou pa'n fini. Nou'n fer en premye seri vizit dan ou distrik, kot i annan en kantite bann prodwir bann pti letablisman ki tre onivo.

E sa mon felisit ou e bann dimoun ki dan sa biznes dan ou distrik. Zot pe fer en travay fantastik. I annan lezot ki nou ava kontinyen vizite.

Ki nou pe fer? I parey en remark ki mon'n fer pli boner. Bann letablisman ki deza bon, nou le travay avek zot pou fer zot pli bon. Mon krwar i ankor annan lespas pou ogmant standar bann pti letablisman.

E avek lev standar kapab osi anmenn en reveni an plis par larzan ki zot sarze par lasanm. I annan en kantite le ka selman dan ou distrik Anse Royale kantite landrwa ki nou ale, annandler bann bon prodwi, bon landrwa. Mon soke par pri ki zot sarze, i *peanuts* pou sa kalite prodwi.

E i montre ki - e sa i partou lo nou bann zil - en kantite dimoun ki pe fer sa biznes ozordi i pa vreman dimoun ki'n ganny en

konesans, en *training* ki mannyer *run* en biznes touris, konpran *pricing*;- kan ou fer monte ou pri, kan ou fer desann. Annandler ou bezwen zwe avek ou pri dapre sezon.

So bann travay ki nou'n komanse e nou pou kontinyen. E *PS* petet i ava adres si i annan Bidze. Wi nou pe met resours ladan. Mwan an partikilye mon pasyonnen avek sa bann pti lotel. E ler mon koze petet mon en pe *bias* ki mon pa devret. Mon ankouraz dimoun al dan bann pti lotel, parske se la ki ou war sa Sesel otantik.

Pa selman donn lavi nou bann dimoun pou nou. Me ou war sa Sesel otantik, ou pe viv kiltir, ou pe viv avek en fanmir Seselwa souvan. So sa i en soz pou nou kontinyen.

*PS* i ava kapab koz lo bann diferan aktivite ki nou pe fer, pou nou desantralize. I enportan ki nou desantralize.

Malerezman Onorab ki mwan mon pe trouve, annandler si *Tourism* pa *step in* pou komans en program, pou pouse ki i annan en aktivite, napa personn ki fer li.

Nou pe war nou al en pti pe annandler sorti an deor lankadrem sa ki pirman nou manda. Nou pe al organiz *fair*, nou pe organiz - ou konpran?

Mon ti ava voudre ki bann Lotorite Distrik par egzantp, ti pran sa ban aktivite pran linisyativ. Nou sipote nou vin deryer, nou sipote pou fer *run*.

Pou Semenn Lagrikiltir nou ti al anler Val Den Dor ou ti la. Ti fantastic – fantastic! E sa mon'n dir avek *MNA* Baie Lazare i en zafer ki nou devret kapab, annou eseye tou le mwan.

Nou ki nou fer *Tourism*, nou ava garanti ki nou fer touris vin Val Den Dor tou le mwan.

Be kot ou Anse Royale parey lezot distrik i kapab annan lezot aktivite, pou dimoun kit lans al dan vilaz en nouvo leksperyans pou zot. E en posibilite pou sa dimoun dan sa kominote benefisyè direkteman avek *tourism*. So vwala, mersi.

### **MR SPEAKER**

So *PS*. *PS* si ou pou azout keksoz? Briyevman silvouple.

### **PS SHERIN FRANCIS**

Wi briyevman mon ava elabor lo larepons Minis. Wi nou'n mete larzan dan Bidze pou nou kapab kontinyen avek bann linisyativ sirtou kiltirel, sa ki nou apel *Community Based Tourism*.

Me selman parey Minis in mansyonnen in agree nou pou napa sifizaman larzan pou nou fer an tou distrik, parey nou'n komanse La Digue.

E me selman si nou kapab ganny sipor avek distrik, si nou kapab ganny sipor petet avek bann biznes ki dan distrik, avek bann diferan partner, napa naryen i enposib.

Nou'n devlop en *brand* pou nou *market* sa bann leksperyans anba la, '*The Cultural Rendezvous*'. E sak distrik i kapab adapte li parey en *rendezvous* Anse Royale. E nou annan bann *guidelines* ki si par egzantp Anse Royale i anvi *partner* avek nou, i annan bann *guidelines* ki nou fer ki i pou en aktivite ki diferan avek petet sa bann bazar ki nou war tou le mwan distrik i fer.

Akoz si nou pe target touris, i annan serten *minimum* ki nou bezwen agree. Par egzantp ki nou prodwi ki pe ganny vann i otantik. Nou pe vremen pous lakominote. Nou pa pe vin vann bann prodwir enporte. Zis mon pe donn detrwa legzanp.

I annan osi sa bann lodit ki nou'n fer dan en aktivite ki *by the way*, nou pa ankor fer Anse Royale me selman nou pou vini. E ki ler moman apropiye nou



pou *involve* tou bann *MNA* dan bann diferan distrik osi tou.

Kot la ankor nou bezwen travay ek sa bann diferan dimoun ki nou'n idantifye, pou kapab fer sa bann aktivite ki nou'n idantifye, fer li vin en realite.

I annan serten lankadreman ki nou bezwen met sa bann dimoun ladan pou li ki i kapab *operate* byen. I bezwen annan en sistenm rezervasyon par egzanp. E ki mannyer nou ed li avek son *marketing* osi tou, avan nou lanse.

E pou sa ki in pran nou en pe letan, me selman i pe vini dan program mon kapab reasir ou Onorab. Mersi.

### **MR SPEAKER**

Mersi. Onorab Henrie kestyon.

### **HON GERVAIS HENRIE**

Mersi Mr Chair. Bonzour tou dimoun. Mon krwar mon kestyon in tonm byen zis apre pou Onorab Lemiel. Akoz kestyon ki mon ti anvi demande se, mwan mon enterese ler mon'n lir zot dokiman *community tourism*, diversifikasyon prodwi avek cultural *tourism*.

Mon'n ekout zot larepons avek bokou lentere. Solman mon krwar in mank detay an-

term poursantaz Bidze, akoz Mrs Francis in dir i annan larzan. So mwan mon anvi konnen par egzanp poursantaz Bidze avek aksyon konkret pou promouvwar sa trwa konseps.

Akoz vwala kot mwan mon anvi vwar ki mannyer mon distrik Mont Buxton i kapab benefisye direkteman. So si zot deza annan en lide lo bann aksyon konkret ki zot kapab pran, i ti ava vremen satisfere mwan si mon ganny en larepons.

Dezyenmman Mr Chair i en kestyon en pe pli zeneral. Parske si *Tourism is the No.1 industry* dan Sesel - prezan la mon mazin sa zafer tourizm i nou biznes. Konmsi mon anvi pran sa vremen aker mwan.

Akoz ki mannyer Minister Tourizm i kapab travay avek bann lezot antite, pou ki zot pouse ki i annan bann devlopman ki arrive, pou ki pei prezan nou vwar sa transformasyon.

Mon ava donn en legzanp. Si nou kapab target sa ant 400 a 500 mil touris pou vini, nou pa kapab zis les zot vini e aksepte nou zoli, lanvironnman, soley. Me nou bezwen annan bann en standar devlopman ki akseptab pou mazorite sa bann touris ki vini, prensipalman Eropeen.

Ler i al dan nou laboutik i prop. Lizyenn, bann bin *site* i prop, sekirite, napa lisyen eran, lalimyer, ou sezi mon Minis? Konmsi i annan en devlopman ki pe arive lo nivo nasyonal, ki Minister Tourizm i kapab pouse pou dir be si touris pe vini *this is what we expect*.

Sa nivo devlopman, lapropte, sekirite. Ki mannyer nou kapab an traver sa Bidze la travay avek tou sa bann antite, ki i annan sa kalite devlopman? E ki *at the end of the day* akoz *Tourism* Sesel i devlope e nou war nou pe viv dan en pei ki byen annord e prop. E nou Nasyon i santi li zwaye.

Mwan sa ki mon anvi. Mon anvi nou Sesel i vin bokou pli zwaye ankor ki nou ete ozordi. Mersi.

### **MR SPEAKER**

Mersi. Minis i annan 2 pwen sibstansyel la ki pou pran en kantite letan pou detaye. Me annou sey *summarize* silvouple.

### **MINISTER SYLVESTRE RADEGONDE**

Mr Chair mersi. Mersi Onorab pou ou kestyon. Mon ava les premye kestyon pou *PS*. Mon a pran dezyenm.

Ou konnen Onorab ou konnen ou menm pa tou keksoz ki neserman ou bezwen Bidze

a sak fwa. Sa ki ou pe dir pwen ki ou'n fer ou deryer, dezyenm pwen i tre valab. E se sa ki mon'n eseye fer depi sa deryer 2an.

Me annandler ou parey en vye rikord granmofonn ki'n reye. Anfen, ...granmofonn ti mon zenerasyon pa neserman zenerasyon en kantite dan sa lasal, ou an deor. Ou parey ou'n reye. Ou konnen sa travay biznes i zafer, touris i biznes tou dimoun. Nou dir li koman en slogan me fer sa enkilke rantre dan nou fason viv dan ou fason et i en lot zafer.

Lisyen eran i en gro *challenge*. I parey voler, i parey dimoun ki *harass*. Lapropte bin ki bomaten - 9er bomaten bin in fini plen, salte in ganny met ater lanmenm. Salte dan bor semen.

Tousala i bann *challenge*. E parey mon'n dir an komansman nou an konpetisyon avek lezot pei. Ler dimoun i swazir pou al son destinasyon, i annan plizyer konsiderasyon ki zot met dan sa pannyen avan ler zot pran desizyon.

E pri pa neserman enn. Annandler en dimoun ki'n deside pou al vakans, i pare pou met '*le paquet*' parey Franse i dir *provided* i annan lezot, "*all the ducks are in a row*" parey

Angle in dir. Lezot keksoz i tonm byen. I prop, i an sekirite, i pa pe ganny *harass* ensidswit, ensidswit. I en travay kolektiv.

E sa parey mon'n dir avan i pa kapab zis en responsabilite en travay Departman Touris. I bezwen tou lazans Gouvernman tou. Me i osi bezwen en zafer sak Seselwa *regardless* ki son travay.

Sa dimoun ki netway nou semen, i osi i annan son rol pou zwe dan sa stratezi ki nou pe koz lo la.

So vwala an *summary* Onorab nou ava kapab koz longman lo sa size. Pase vin pran en kafe ennler nou ava koz lo la. E ankor ganny en pe ou nide osi. Me an *summary* se sa ki mon le dir. Mon ava pas laparol avek PS. Mersi.

### **MR SPEAKER**

PS silvouple lot pwen.

### **PS SHERIN FRANCIS**

Mersi Onorab pou ou keston. Mon konnen ou pe esper nou vin dan Mont Buxton. Anfet nou Bidze pou - nou annan 4poursan nou Bidze ki nou'n *allocate* pou *product diversification* and *enhancement* osi. E separeman mon pa'n met li an-term poursantaz, me selman i annan 3milyon ki nou'n met dan en lot

vot dan *marketing*, pou sa ki nou apel *local marketing*.

Akoz nou pou bezwen pou nou pous sa bann aktivite lokalman osi pou donn sipor *marketing*, pou sa bann diferan leksperyans ki nou pou pe lanse.

An-term aktivite - mon konnen ou anvi war en pe plis legzanp konkret, kwa ki nou petet pe war vini pou 2023. I annan par egzanp sa bann bazar ki nou pou *brand* li 'rendezvous' - 'The Cultural Rendezvous'.

Nou pe anvizaze ki nou pou annan enn par *quarter* lo La Digue. Nou pe anvizaze pou komanse 2 pou lannen 2023 lo Praslin. E petet 4 lo Mahe pou komanse.

An menm tan ansanm avek Lenstiti Lar e Kiltir, *Heritage Foundation* to be more *precise*. I annan Bazar Domaine ki'n komanse. Nou'n donn zot bokou sipor pou kapab komans sa bann bazar ki pe ganny fer *monthly*.

Anfet dezyenm edisyon sa bazar pou ganny fer sa Sanmdi, demen. E i pou annan en lot an Desanm osi tou.

E parey si nou ganny bann sipor koumsa, i vedir nou kapab *stretch* nou resours e nou kapab kekfw fer plis dan

bann larestan distrik parey mon'n dir Onorab Lemiel.

I annan bann - an rezilta sa bann lodit kiltirel ki nou pe fer dan bann distrik, i annan loportinite i annan en kantite ki nou'n idantifye. Plis ki en santenn an tou. Me selman ou bezwen kategoriz li lo ki i pou bezwen pou li met an plas pou komanse. Lo nivo difikilte, nivo lenvestisman ki bezwen.

I annan ki pou pran plis letan, i annan ki ou kapab di bann *low hanging fruits*. I annan 10 an se moman la ki nou pe travay avek pou ankadre zot.

Anfet lo nou plan pou Desanm la avan lannen fini, nou anvi envit serten nou bann *stakeholders* ki bann dimoun dan lendistri ki vann, ki konpran ki mannyer en prodwi i sipoze ganny ankadre.

E petet la dan sa legzersis osi nou ava envit *DA* avek *MNA* osi, ki sa distrik ki i pou ladan, pou fer en vizit ansanm avek nou pou sa bann aktivite, pou zis regarde an-term sa ki nou pe komanse *in term* of son lankadremman si i ase, si i annan ankor keksoz ki bezwen ganny fer, avan nou lanse. Zis pou fer sir i en prodwi ki pou en sikse.

Nou pa pe zis fer li zis pou *tick the box* me nou anvi i en

sikse. E nou anvi ki viziter i angaze.

E mon kapab donn ou legzanp par egzanp bann ki'n ganny idantifye la nou annan ladans tradisyonnèl, nou annan *craft making*, nou annan lakwizin tradisyonnèl, nou annan bann artis, nou annan vizit laferm osi tou dan sa dizenn ki nou pou komans avek tre byento. Mersi.

### **MR SPEAKER**

Mersi. Bon nou an deor an retar lo nou *schedule*. Mon annan ankor 6 Manm ki'n lev lanmen. Mon krwar mon ava pran poz la, mon pou demann tou pou sey annou al pli vit ler nou rebran. Mersi.

Nou ava pran poz nou ava rebran, nou ava donn 25 minit, 11.05. Mersi.

***(BREAK)***

### **DEPARTMENT OF TOURISM** **(cont)**

### **MR SPEAKER**

Byen, mersi. Nou a sey al en pti pe pli vit pou terminen. E zot a konpran si mon donn en pti *push* lo akselerater tanzantan. Onorab Aglae.

### **HON EGBERT AGLAE**

Mersi Mr Speaker. Minis ek ou delegasyon, PS, bonzour. Minis mon anvè antre lo kot i konsèrn ou *rent*. Minis, eski ou Minister i annan en diskisyon kot i konsèrn sa *rent* 11milyon ki mon war pe peye a lannen, pou zot kapab... Akoz ler ou pe regarde dan 2an ou 3an, zot ti kapab fer zot prop *building* ek sa larzan? Eski i annan demars ki zot pe fer pou STB kapab ganny son prop batiman? Sa i enn.

E Minister *Tourism*, sorry. Osi lo sa menm, mon war pou dir i annan en *building insurance*. Sey eksplik nou ki sa *building insurance* 25mil i vèdir? Akoz si mon, mon pe lwe ou *building*, selman ki sipoze pey *insurance*, akoz i annan sa *insurance*? Mersi.

### **MR SPEAKER**

Se tou? Mersi. PS pou pran? Minis pou konmanse.

### **MINISTER SYLVESTRE RADEGONDE**

Mr Chair, mersi. Mersi Onorab pou ou kestyon. Wi mon dakor avèk ou. *Rental* ki nou pe peye pour biro i bokou - i egzorbitan. *You know*, i pa eskize lefe ki nou partaz sa biro avèk Minister Transpor. I annan en parti i Sekretarya Minis li menm, avèk en bout Departman Transpor ki

baze dan sa *building*, *although* responsabilite *rent* i tonm lo *tourism*. Wi i ser.

Pandan sa koran lannen la, nou'n regard bann posibilite pou *relocate*, e parey ou konnen, difisil trouv landrwa pour *accommodate* sa kantite *staff* ki annan e ganny en landrwa ki apropiye.

Wi Gouvernman i donn sa legzersis. Parey ou konnen inisyaman ti annan sa program ki en Gouvernman etranze ti pou *fund* en *Government Complex* pa lwen avèk isi, Avèk nide pour kapab donn akomodasyon pou tou bann Minister Gouvernman ouswa mazorite. I pa paret mwan ki sa proze pou materyalize;- an tou ka pa byento.

So, i pou neser pou nou regard lot alternativ. E sa diskisyon in deza konmanse o nivo Gouvernman pou regard posibilite pou nou, nou menm nou fer konstriksyon nou prop biro pou bann diferan antite. Lo kestyon lasirans mon a pas avèk PS.

### **MR SPEAKER**

*PS please.*

### **PS SHERIN FRANCIS**

Sa lasirans ki ou war dan Bidze i pou nou lofis La Digue, nou

*building* La Digue. E i pa kouver zis pou *building*, me i osi kouver pou bann konteni dan sa *building*. I tonm apepre 25mil. Mersi.

**MR SPEAKER**

Mersi, *ok*, tre byen. Onorab Labonte?

**HON ANDY LABONTE**

Mersi Mr Chair. Bonzour Minis avek ou delegasyon. Tou Manm Onorab e tou dimoun ki a lekout. Mr Chair, mon kestyon i plizoumwèn ler mon pe get Bidze *tourism* an zeneral, i annan 4 seksyon.

I annan *Governance, Management and Administration; Destination Planning and Development; Tourism and Hospitality Training* apre *Destination Marketing*.

Parey PS li menm li in dir, pli gro porsyon i pli zou mwèn al kot *Destination Marketing* ki 40poursan apepre. Ki an zeneral mon vremen apresye ki nou bezwen fer *marketing* pou nou ganny touris pou vin Sesel. E mon apresye osi sa travay ki zot pe fer, sirtou sa lospitalite lafyerte Sesel ki vremen enportan e esansyel.

Me ler mon pe get zot, zot *challenges*, Minis in dir pou dir li i santi li per, be mwan mon

vremen konsernen ler mon pe get zot *challenges*.

Premyerman se *challenges* nimerò 2 kot '*shortage quality of skill and competence professional human resources*'. Apre ler mon pe get 7 ek 8, '*poor intake due to low interest shown by student*', apre '*inadequate of STA campus*.'

So, an zeneral ler mon pe get zot stratezi priyorite, mon pa war naryen ki'n ganny mete pou adres sa sityasyon. E mwan koman en profesyonnel dan *tourism* ki mon'n toultan konsernen, e mon leker i ankor dan *tourism*. Ler mon pe get poursantaz ki ganny *allocate* avek *Tourism* ek *hospitality training* li menm li, mon war i selman 41milyon ki'n ganny *allocate* pou sa lekol.

So, eski zot pe mazin al ver bann program parey mon konnen pou dir *Constance Hotel* ti pe fer dan lepase, atraver Mr Marc Marivel, kot sa bann dimoun ki pe plizoumwèn sa bann lenvestiser, ou bann letablisman zot menm zot ki zot, zot bezwen travayer kalifye pou travay dan zot letablisman.

Me ki en program atraver *private public partnership*, ki zot kapab zot osi rod en fason pou enzekte - pa direktman - finansyerman petet dan en lot fason pou kapab ed sa

Lakademi pou nou kapab ganny bann manrmay pli konpetan ki vreman i kapab ed nou lendistri? Mersi.

**MR SPEAKER**

Mersi. Minis ou a diriz larepons. Direkter i ava adrese?

**DIRECTOR STA TERENCE MAX**

Mersi Mr Chair, mersi Onorab pou ou kestyon. Enn konsernan bann *challenges* ki ou'n met devan, *intake showing low interest*. Wi, parey mon ti pe dir pli boner, i enn nou konsern akoz par lefe ki nou annan bokou etidyan ki vin kot Lakademi zis akoz zot anvi antre dan en lekol possegonder.

Mon krwar sa in en realite ki toultan in la. Me nou, nou anvi redres sa sityasyon. E se sa ki mon ti pe dir. Enn bann lanfaz ki nou pe mete par egzanzp la, byensir avek *Covid* ti annan en pe difikilte. Nou'n re konmans *school talks* dan bann lekol, kot nou kapab sansibiliz bann manrmay, pou fer sir ki zot fer bann swa byen enformen avan ki zot decide pou vin kot Lakademi.

Osi ki nou fer, menm si ler manrmay zot in decide pou pran Lakademi koman enn zot swa, avan ki nou anrezistre zot

kot Lakademi, nou fer sir nou *call* zot dan en *forum* ansanm ek zot paran, kot nou eksplik zot tou sa ki annan pou fer avek *STA from A to Z*.

Kote ki nou bezwen zot komikman? Ki mannyer nou, nou pou komik nou lekor? E la si zot dakor, zot ganny en semenn pou zot fer zot nide, e la zot agree pou zot vin *STA*.

So dan sa letan savedir nou pe donn bann manrmay en dezyenm sans pou gete, dir be bon, si mon pe vin zis *STA* akoz mon anvi ganny en possegonder, alor mon ava decide fer en lot swa.

Aprè parey mon pe dir, ki nou pe fer, nou pe sey travay etrwatman avek Minister Ledikasyon, pou war ki mannyer nou kapab met en *curriculum* dan segonder kot kapab kontinyen sansibiliz manrmay e *by S5* nou a konnen nou ganny bann manrmay ki bann bon kalite, bann bon eleman, ki nou, nou kapab kontinyen devlop zot pou vin bann bon talan.

*In terms of partnership*, mon pa pou kapab tro al dan sa konteks, dan son term teknik. Selman mon konnen ki nou'n deza sey fer lesey. Nou'n deza fer serten diskisyon, ganny serten, *seek for serten advice*.

Me i annan serten bann envestiser ki'n vini.

E byensir nou annan kantite osi nou bann *partner* lotel ki travay etrwatman avek nou, tanzantan zot prezan kot STA dan nenport ki fason. Swa pou vin fer en *talk*, oubyen pou vin gete ki mannyer zot kapab siporte.

Me *still* nou pa ankor kapab konkretiz en desizyon, *whether* nou kapab antre dan en *partnership* pou zot kapab *invest* STA, akoz i annan bann lezot lozistik ki vin avek.

Enn ki petet ki mon konsyan se ki konman en lenstitisyon, Lakademi *basically*, anba nou *charter*, nenport ki, ki pare pou *invest* dan okenn *building* STA, nou pa kapab *afford*, oubyen nou pa annan drwa pey okenn *dividends or whatever*.

So *basically*, *it's a deterrent* pou en dimoun ki pou vin *invest* apre i pa pou ganny son *return or investment*. E vwala.

Me selman parey mon pe dir, mon pa tro, tro neserman annan ekspertiz ladan. Nou ava kontinyen fer sa diskisyon ansanm petet avek departman osi tou ki ava get nou en pti pe. Mersi Onorab.

### **MR SPEAKER**

*Thank you* Direkter. Onorab Pillay, kestyon?

### **HON SEBASTIEN PILLAY**

Mersi Mr Chairman. Bonzour Minis ek ou delegasyon, e bonzour tou dimoun ki a lekout. Mr Chairman mon ti a kontan demann Minis pou ed nou pour klarifye serten keksoz.

Ler mon regard nou depans antye pou sa Minister, i reprezant en depans apepre R553mil par zour, an relasyon ek en Bidze R201milyon ki nou pe depanse lo Departman Tourizm.

Prezan ler nou regard bann kou ladan, kou pli sibstansyel se sa *marketing* ki li i reprezant 52poursan. Ler mon fer kalkil e nou regard ki nou pe depanse dan *destination marketing*, i tonm apepre R293mil par zour pou fer *marketing tourist, tourism* pour Sesel; ki enkli pey *staff*, fer son bann depans *marketing* eksetera.

Prezan mon'n tann ou koz lo lakantite touris ki pe vini. Me mon'n osi ekout bann prezantasyon ki'n ganny fer par Minister Finans, an relasyon ek *yield* lo lakantite touris ki pe vini.

So kestyon ki mon annan pou demann ou, lefe ki nou pe



depans R293mil par zour pou fer *marketing*, petet ou kapab demann lasistans Minister Finans pou reponn sa - eski sa *yield* ki nou pe gannyen lo la kantite touris ki pe vini, i proporsyonnel ek sa lakantite touris?

Savedir eski sa larzan ki nou pe sipoze anmase, i proporsyonnel avek sa kantite touris? Oubyen i annan larzan ki *still* pa pe antre dan lekonomi, atraver sa zefor ki nou pe mete pou anmenn sa kantite touris, apre ki sa kantite touris in vin Sesel? Sa i mon premye kestyon.

Mon dezyenm kestyon, ou'n koz lo *carrying capacity*, e resaman mon krwar lannen pase an Out, ou ti fer serten *statement* vizavi *carrying capacity* lo La Digue. Mon ti a kontan demann ou, prenon kont ki ou'n koz lo *carrying capacity* Sesel, nou bann 3 zil, e ki mon krwar 2019 ti annan en letid ki ti etabli apepre 380mil touris ki ti'n vin Sesel an 2019 e ki nou *carrying capacity* i devret *around* sa. E nou ti annan nou apepre 45- 44mil touris ki ti'n vini atraver *cruise*, mon ti a kontan demann ou eski anba Bidze - mon vwar plizyer provizyon pou *consultancy*;

Eski i annan okenn provizyon anba '*consultancy*' pou fer en letid *carrying capacity* pou vwar ki kantite touris nou kapab pran e *still* gard nou prodwi a en oter ki sa bann touris pou retournen? E ki pa afekte sa kalite prodwi ki nou pe donn sa bann touris? Mersi Mr Chair.

### **MR SPEAKER**

Mersi. *PS. PS go ahead.*

### **PS SHERIN FRANCIS**

*Ok*, mersi Onorab pou ou kestyon. Mon a pran dernyen kestyon avan lo kote *carrying capacity*. Wi i annan en letid ki ti konplete lannen pase, ki ti kouver tou le de pou Mahe, Praslin, La Digue.

Pou La Digue bann rekomandasyon i annan serten ki'n ganny konmans enplimante. Pour Mahe in annan plis konsiltasyon ki nou'n fer atraver sa lannen. Zis pou nou fer sir ki nou *refine* sa bann rekomandasyon.

Dan sa *study* i pa donn ou en *ceiling absolute* ki dir ou pou dir ler i ariv 500mil, viziter fodre, i en cap, nou pa ariv pli o. Akoz *carrying capacity* i ganny war koman - i toultan relatif avek en lot keksoz.

I kantite touris nou kapab pran an relatif avek nou

degradasyon dan lanvironnman. E kantite touris ou kapab pran an relasyon avek ou bann lenfrastruktir ki ou annan, ou bann *productive infrastructure*.

An relasyon avek kantite lasanm lotel ou annan, ki kalite lasanm lotel ou annan? So, pou sa rezon ki dan sa letid i pa donn nou en *absolute number* ki'n dir ou ler ou ariv 500mil *this is your absolute* kapasite, me i toultan an relasyon avek *something else*.

Me selman i enn bann rekomandasyon ki nou pe pran kont pou lannen prosenn, pou nou kabab fer sa letid. I dan Bidze. Se ki *once* nou'n adopte rekomandasyon, par egzanp, pour Mahe, Praslin i annan en letid ki nou pou bezwen fer ki apel *Establishments Strategic Development Plan*.

E sa enn li i pou al en pti pe pli a profon pou etabli *what is the number of visitors in terms of absolute numbers* ki nou krwar a sa pwen nou kapab pran? An term lasanm lotel par egzanp, si nou pou kontinyelman annan, ki kategori? Ki kategori lasanm? Kwa ki nou ti ava anvi war ler nou met... ?

Toultan pe met *sustainability* par deryer, tou nou desizyon ek nou

rezonnman. Ki kalite lasanm lotel *or* lakomodasyon nou ti a kontan war pou le fitir? Sa i en *study* ki i pou arive. I pou konmanse ler nou'n fini swiv tou prosedir an 2023.

Pou La Digue an prezizeman, vi ki bann rekomandasyon in fini konmans ganny enplimante, sa letid *Establishment Strategic Development Plan*, sa letid la li i pe al konmanse la, kot nou ti'n bezwen swiv bann prosedir *procurement and everything*, - i pe konmanse la.

E nou'n deza donn parol nou bann dimoun lo La Digue, ki par lannen prosenn, Mars ou Avril, nou pou retourn lo zil.

Nou pou annan en *blueprint* ki nou pou kapab prezant devan zot pou diskite, si nou pou kontinyelman par egzanp agrandi lotel - pa lotel - lasanm lo La Digue, ki mannyer nou ti a kontan vwar sa. Dan ki kategori nou ti a kontan war, e ki kalite lasanm nou ti a kontan war sa lagrandisman ki nou pou prezant avek bann dimoun La Digue *once* sa legzersis i fini.

Ler nou pe koz *carrying capacity* osi tou, i annan en lot letid an *parallel* ki pe konmanse la, i apel *Visitor Use Management Plan*. I osi - akoz sa osi i reponn ou kestyon *carrying capacity*. Ou kapab

petet ou kapasite i kapab monte si ou konnen ki mannyer ou *manage* sa touris, ler i lo ou zil.

Par egzanp letid *already* in montre, poudir en kantite nou touris i tant pou konsantre dan menm landrwa, par egzanp lans i enn. Anse Source d'Argent par egzanp lo La Digue i en landrwa kot laplipar touris i konsantre. E sa enn letid li i *basically* pou adres *the visitor flow* lo zil. E i vin *hand-in-hand* avek nou stratezi e nou program pou *product diversification*.

Akoz si ou anvi fer, *reengineer your flow of visitors* lo zil, i bezwen vin avek lezot aktivite, ki pou tir touris lo lans pou anmenn zot dan bann lezot landrwa. So sa - mon kapab zis dir poudir pou sa bann letid, i annan larzan ki'n ganny mete dan *consultancy*, pou nou kapab antreprann li an 2023.

Lo kote *yield*, sa Bidze parey Onorab ou'n fer ou kalkilasyon, mon pou fer referans avek *figures tourism earnings per head*, fason kalkilasyon avan, ki ti tonm apepre \$1500 par latet viziter, e ki lannen pase nou'n war in mont par \$200. I tonm apepre \$1700 par latet viziter.

E mon konnen *Central Bank* in re aranz son *methodology of calculation*, ki la ozordi i reflekte 3mil dolar par

latet viziter. E nou stratezi li menm, sirtou pou *marketing*, ou pou war dan enn nou bann lobzektif, se ki nou anvi ki nou bann aktivite i osi viz pou nou anmenn en diferan kalite touris osi tou.

Sirtou bann marse an deor Lerop la, nou stratezi i vremen pou nou anmenn *premium visitors* lo sa bann marse. Lerop li menm li, vi ki nou ganny *in terms of volume*, i fer ki, par egzanp ler nou get zot kantite depans;- parey ler nou ganny akse avek *data, visa card data*, nou war pou dir Lafrans *is the number one in terms of spending* lo *visa*. Mon pa konnen si mon'n reponn ou kekyon?

### **MR SPEAKER**

Mon krwar ou repons in ase detaye. Ou klarifikasyon dan en fraz silvouple, Onorab.

### **HON SEBASTIEN PILLAY**

Mersi Mr Chairman. Klarifikasyon dan en fraz. Mon ti a kontan ganny klarifikasyon avek Minister Finans, si lo *tourism earnings* i reflekte lo la kantite viziter, aköz zot ki ti prezant *supplementary budget* avek nou. E ler nou ti regard *Mid-year Review*, nou ti vwar pou dir baze lo *earnings* e la

kantite viziter i ti *disproportionate*.

Prezan ler mon pran largiman ki ou'n avanse vizavi kalite *tourism* ki ou pe ogmante e E mon bezwen vin lo en pwen ki Minis ou pa'n, ou'n dir nou i en pwen *tax* bomaten, me ki mon, mon konsernen avek. Sa size pou entrodwi sa R25 lo bann pti letablisman. E konversasyon ki ou pe fer avek nou, eski Minis ou pa krwar ti'n devret annan plis konsiltasyon avek sa kategori letablisman?

E pou kwa pa nou pozisyon lo nou kote latab nou santi pou dir, an sa ki konsern bann pti letablisman, moman la i pa apropiye pou entrodwir en lot *burden* lo zot, me plito ed zot pou travay pou ariv lo sa lot nivo. Apre nou ava en entrodwir sa demann finansyel an plis lo zot ki nou pe mete.

Eski ou pa krwar pou dir sa ti ava meyer e ti ava pli *in line* avek stratezi ki ou menm ou ou'n *sort of* devlope, an relasyon ek bann diskisyon ki ou'n fer avek medya oubyen avek bann diferan parti prenan, ler mon pe lir bann keksoz ki ou'n dir?

Akoz *otherwise then* nou pe met sa bann letablisman dan en pozisyon kot zot bezwen al pey en keksoz an plis la, e nou pe demann zot pou elev zot standar, ki pou kout zot larzan

pou fer - ki mon krwar pou dir i pa vreman *fair* a sa moman ki nou eksperyans en *tourism boom*.

Petet *allow* zot pou fer en pe larzan *and then* zot a remet sa larzan dan sa devlopman pou ariv sa nivo ki petet ou le arive. Mon ti a kontan petet si Minis ti a kapab klarifye sa *from* son perspektiv. Mersi Mr Chairman.

### **MR SPEAKER**

Mersi. Minister Finans - Minis, lekel ki a pran premye? Annou sey al vit lo klarifikasyon.

### **MINISTER SYLVESTRE RADEGONDE**

Mr Chair, mersi. Mersi Onorab pou sa dernyen remark ki mon adrese. Regard mwan, sakenn antre nou pou annan son pwennvi. Mannyer sa *levy* i pou ganny aplike - be la Minister Finans i a koriz mwan - mannyer sa *levy* i pou ganny aplike, ki mwan mon'n partisip dan bann diskisyon, i pa pou dan pri lotel.

Donk i pa pou afekte pri ki sa pti *guest house*, ouswa en lot *medium size hotel* pou bezwen fer pou sanz son pri. I parey dan bann gran lavil annandler nou war bann *city tax*. Setadir ou pey ou lasanm menm pri, pa sanz naryen. Ou pey tou ou *bill*.

A lafen, pou sak nwit ki ou'n reste, ou pey sa *levy*. Donk i separe avek pri lotel.

Ler mon pe koz avek ou la Onorab, amwen ki annan keksoz ki vreman mon'n rate, mon pa war vreman sa i en problemn. Mon pa kapab garanti pa pou en problemn me la ler mon pe koz ek ou, mon pa war li en problemn.

I pa prezant mwan koman en problemn si en dimoun, par egzanz si mon pran en pti lotel, La Digue par egzanz, kot en touris i pran en *average* 4 nwit - R100 pou li peye an plis, mon pa krwar vreman i en gro sarz. Mersi.

### **MR SPEAKER**

Mersi. Ms Tamatave ou pou adres sa pwen *yield*? Si ou kapab.

### **COMPTROLLER GENERAL ASTRIDE TAMATAVE**

Mersi Mr Chair. Mr Chair bann laliny reveni ki tous *tourism*, son prozeksyon pou 2023 i *increase* par rapor avek *revised tourism arrival* pou 2023. So nou pou war *tourism arrival* pour 2023 son prozeksyon i apepre 10poursan *increase*.

E si nou pou get bann laliny reveni, par egzanz VAT lo *tourism services* in mont par 10poursan. Si nou get *tourism*

*marketing tax* i osi en laliny reveni ki'n mont par 10poursan. So i annan sa kou relasyon ant sa de. Mersi Mr Chair.

### **MR SPEAKER**

Mersi. Onorab Romain.?

### **HON GEORGES ROMAIN**

Mesi Mr Speaker. Minis bonzour ek ou delegasyon. Premyerman mon ti a kontan felisit Minis ek son delegasyon pour sa bon travay ki zot pe fer. Kontinyen sa bon travay Minis.

Enn mon kestyon in fini reponn Mr Speaker, so mon pou annan zis en kestyon Mr Chair. PS in konmans touse sa kestyon, be selman mon ti a kontan si ou PS i kapab donn plis lesplikasyon.

Dan sa Bidze, mazorite mon bann koleg pe dir ki i annan bokou larzan kote *marketing, which is*, i vre. E nou bezwen vreman fer *marketing* akoz sa ki nou'n pase dan letan *Covid* nou bezwen *market* Sesel plis ki si en ka, i ariv en sityasyon, *at least* kekfwa i pa ava ariv parey avan. So, mon siporte sa.

Me selman mon ti a kontan demann PS, ki vreman zot stratezi pou 2023 lo kote *marketing*, an vi ki nou konnen la nou kapab vwayaze. Nou

kapab fer *marketing online*. Nou pe al lo *digital*. So, mon ti a kontan si ou *PS* ti kapab eksplik nou en pti pe pli detaye lo kote zot stratezi pou *marketing*. Mersi Mr Chair.

**MR SPEAKER**

Mersi *PS*. Wi, detaye me pa tro en?

**PS SHERIN FRANCIS**

Wi. *Marketing* mon kapab koz en ta letan me selman mon pou vremen briyev an term nou stratezi. Nou pou kontinyelman konsolid nou pozisyon lo nou bann marse tradisyonnèl. Akoz sa i kot nou mazorite nou viziter i vin lo la.

Me selman nou reste rekonesan pou dir ki Lerop i annan difikilte ki kapab vini, ki kapab afekte nou performans. Ki fer ki nou pe osi ranforsi nou zefor lo bann marse an deor Lerop, ki nou kapab ganny retour pli vit, e ki nou kapab garanti depans par latet viziter pli o.

So, nou pe mazin la parey mon'n reponn o paravan, '*premium clients from markets outside Europe*.' E i annan travay ki nou'n deza fini konmanse lo sa bann marse. I pa bann marse nouvo pou nou. I bann travay ki nou pou kontinyen.

Me selman nou pou bezwen fer sir ki si i annan serten nou marse Eropeen ki ganny afekte, akoz *geopolitical situation*, lenflasyon, ensidswit, nou annan lezot marse pou re tonm lo la.

E sa travay etrwat kolaborasyon avek nou bann *partner* dan lendistri ek nou bann *airline partner*. I enportan ki sa bann marse an deor Lerop osi, nou kapab devlop koneksyon aeryen.

E enn parti nou travay i kontinyelman reste angaze avek bann lakonpanyen aeryen ki deservi, ki kapab konekte nou direk ek sa bann marse. Akoz si nou anvi *perform* lo sa bann *market*, nou pou bezwen annan koneksyon aeryen.

An term aktivite *digital* i reste enn nou stratezi, kot menm dan bann aktivite tradisyonnèl ki nou fer ozordi, i toultan annan en konponan, en eleman *digital*. E nou pou reste angaze ek nou bann *partner* lokal osi tou pou nou fer ki zot osi zot kapab sezi bann loportinite *digital*. Mon'n sey briyevman eksplike. Mersi.

**MR SPEAKER**

Mersi. Mon a revin lo Onorab Loze.

**HON JOHAN LOZE**

Mr Speaker, mon ti'n endik ou ki ou retir mon kestyon silvouple.

**MR SPEAKER**

Sorry mon pa'n konpran ou. Ou kestyon i ok?

**HON JOHAN LOZE**

Mon ti'n endik ou boner pou retir mon kestyon. Mon pe retir mon kestyon silvouple. Mon pe sed mon...

**MR SPEAKER**

Ou pe retir ou kestyon, tre byen. Mersi. Mon'n konpran ou. E dernyen entervenans, Onorab Larue.

**HON FLORY LARUE**

Bonzour Mr Speaker. Mersi Mr Chair. Bonzour Minis ek ou delegasyon. Mon ti a kontan *focus* lo program 2. Dan sa Bidze *tourism* antye, i R201milyon940mil. Me sa program 2 i enn bann pli pti program, avek, pou R15milyon150mil son Bidze. I *focus* direktman lo *destination planning and development*.

E mon kestyon i swiv en pe lo ton ki Onorab Henrie in pran. Me solman olye parey Minis ti reponn in dir pe *focus* lo tou dimoun ki dan sekter - aköz biznes i, *tourism* i biznes tou dimoun.

Mon ti pe demande si atraver sa program, Departman ti annan nide pou anmenn lezot sekter ansanm *through some kind of committee*. En pe parey *Platinum Committee*, kot nou kapab get bann servis nasyonal ki siport sa lendistri.

E la mon pe koz bann lenfrastruktir nasyonal parey *The Inter Island Quay, taxi stand, pavement, lalimyer, polisyon tapaz e lisyen eran*, ki bann keksoz ki bezwen ganny *sort out* lo kote Gouvernman - nasyonal.

Akoz Minis in dir nou e in dir Seselwa ki sa i responsabilite tou dimoun.

Alor mon krwar ki nou ekspekte ki annan en solisyon pou sa.

E kestyon 2 i osi tonm anba sa program lo kote devlopman, letan nou koz lo *cultural tourism*, i annan sa laspe nasyonal *through art, lanmizik, bann keksoz koumsa*.

Me bann lezot parti nou kiltir tel ki, nou manze tradisyannel, nou ladans, kekfwa sa i ariv en pe pli pre avek, dan en lakour en dimoun. Kekfwa ki en dimoun i kapab etabli sa.

Anba sa program letan zot pe get *expansion ek growth*, eski zot pe annan Bidze pou zot

gete ki mannyer pou regiliz sa ki kote *cultural tourism* i kapab ganny devlope par Seselwa zot menm? Mersi.

**MR SPEAKER**

Mersi. Mersi pou ou kestyon. Minis ankor en long size. *Summarize please.*

**MINISTER SYLVESTRE RADEGONDE**

Mersi Mr Chair. Mersi Onorab pou ou kestyon. Onorab sa lannen nou'n konmans en seri *meeting* en pti pe avek tou bann partener ki *involve* dan bann *issue*. E nou'n rapel sa nou bann *sectoral meeting* ki nou'n konmanse.

O fet nou annan 2, nou'n kapab fer 2 sa lannen. Pou nou adres zisteman bann *challenge* ki nou war i pli pertinan, pli serye, pli irzan. Nou'n dil avek lisyen eran. Problenm lo lans. Nou'n dil osi avek problenm *trails*, kot dan lasal, reprezantan lapolis, reprezantan Minister Lanvironnman, tou dimoun.

Donk nou en kantite koze nou. Nou koze nou, nou bon lo koze nou. Souvan selman problenm mon krwar se *follow-up*. E sa i pa zis kot *tourism* i konsernen, dan plizyer lezot domenn. E zot menm zot bann Onorab zot konnen bann latet

fermal annandler ou gannyen;- pou pran en desizyon apre ou bezwen fer sir ou menm ou, ou ale ou al fer sir ki i pe marse.

Ouswa ou donn randevou pou zwenn dan 3mwan, 3 mwan ler ou zwenn pa'n fer ouswa pa'n abouti ensidswit. So, asiz i pa en problenm. Nou koz en kantite, nou adres problenm, tou dimoun i konsyan.

En lot keksoz osi ki nou'n fer zisteman kot bann landrwa kot nou trouve dimoun ki *license* pa pe swiv kondisyon son *license*. Nou annan en sou Komite Disipliner avek *licensing* ensidswit, kot nou fer bann rekomandasyon.

E la petet sa enn i enn son Komite ki bezwen *act* en pti pe pli vit. Dan ka kot, mon servi, *taxi driver* pa pou kontan mon servi legzanp, zot legzanp. Mon a servi en lot pti legzanp. *(laughter)*

En operater *guest house* kot tou Onorab ki maltret en touris, sa Komite Disipliner i *act* vit pou demann sa loperater pou vin devan, eksplik son lekor, ou kot i ganny prouve ki i responsab - *license* in swa ganny sispann, ouswa in ganny *warning*. So omwen dan tousala i annan en bon keksoz pe marse. Mersi.



**MR SPEAKER**

Mersi. En fraz silvouple.

**HON FLORY LARUE**

Mersi Mr Chair. Mr Chair mon pa pou kapab dan en fraz, eskiz mwan. Me solman zis pou klarifye osi...

**MR SPEAKER**

Vit!

**HON FLORY LARUE**

... nou napa okenn dimoun kot nou lotel ki'n maltret personn. Mon konnen ou'n servi sa koman en legzanp, selman zis pou fer kler. Akoz ennler sa i ganny tant pou servi.

Me selman lo kote spesifikman Minis, anba program 2, ou'n koz lo *follow-up*. Sa program i egzakteman la, pou sa, pou *follow-up internally* lo kote Minister, Departman Tourizm.

Me parey ou'n dir nou ki solisyon i bezwen ganny trouve si nou anv ariv en *five-star destination*, si nou pe *aim* pou sa.

Mon pe rod solisyon lo kote Gouvernman, nasyonal, ant bann Minis, bann Minister pou fer ki bann keksoz i mars vitman pou reflekte sa ki, sa departman i anv pou nou vin en *five-star destination*.

Prensipalman osi la lisyen eran zot ankor dan lavil *Victoria*. En 20enn zot ki marse toulezour. So bann keksoz koumsa ki mon krwar nou koman dan sekter nou pe rod en solisyon. Eski sa program i kapab *follow-up* atraver bann koze ki zot koze dan lezot sekter? Mersi Minis.

**MR SPEAKER**

Mersi. Minis, terminen silvouple vitman.

**MINISTER SYLVESTRE RADEGONDE**

Mersi Mr Chair, mersi Onorab. Mon le terminen. Nou annan menm obzektif Onorab. Nou tou le de nou oule menm zafer. I en zafer prezan azir. Nou konnen problenm kot i ete. *It's a question of azir*, fer li. Mersi.

**MR SPEAKER**

Mersi. Mon apel bann Manm pou vot lo Bidze *Department of Tourism* pour en total R201milyon940mil. Manm ki an faver lev lanmen silvouple? Mersi. Mon krwar tou Manm in vote. Okenn Manm ki kont? Mersi.

Lo sa Bidze Minister *Department of Tourism*. 29 Manm in vot pour, 0 kont e 0 abstansyon. Bidze in aprouve par Lasanble. Mersi bokou.

Bon i le moman pou mon swet bon depar delegasyon *Tourism* e bonn kontinyasyon pou zot travay. E pou nou kapab pas lo lot size, mersi. Minis i reste avek nou. Nou a pran en poz *sanitizing*, e antretan Madanm raporter a met de lot delegasyon pare pou antre.

*(technical break)*

## **DEPARTMENT OF FOREIGN AFFAIRS**

### **MR SPEAKER**

Byenveni Departman *Foreign Affairs*. Anbasader Vivianne Fock Tave, son PS. Mrs Bessy Banane son *financial controller* e Ms Pamela Payet son Direkter Zeneral pou *Human Resources, Budget Management* and *Administration*.

Bidze pou Departman *Foreign Affairs* i lo paz 411 ziska 418, pou en total R129milyon498mil. Minis, lentrodikeyon.

### **MINISTER SYLVESTRE RADEGONDE**

Mr Chair, mersi bokou. I osi en plezir pou mwan pou poz Bidze pou Departman Zafer Etranzer, ki parey sa Lasanble i konnen i sa Departman ki responsab pou

nou relasyon enternasyonal. Tan ki pa selman avek bann pei me osi bann lorganizasyon enternasyonal.

Nou fer sa travay avek 103 travayer ki baze, anfen an tou 103 travayer. E ladan 90 i baze *headquarters*, 13 i dan nou 9 Lanbasad aletranze. Nou annan osi en *network* ki anviron 80 ekek Konsil Onorer. Me sa i pa konsernen dan Bidze aköz napa okenn kou ki asosye avek travay ki bann Konsil Onorer i fer pour sesel.

Propozisyon Bidze pou Departman Zafer Etranzer pour lannen prosenn, i R129.498milyon, ki en sirplis 34.9milyon ouswa 36.6poursan, konpare ek Bidze lannen pase...sa lannen, (pardon) - ki ti 94.61milyon.

Rezon sa logmantasyon signifikan, se in fer provizyon pour larzan pou peyman trezyenm mwan saler ladan. Larzan pou ogmantasyon saler dapre propozisyon sa program Nasyonal.

Pou *overseas travel* ki prezan pou sorti anba Biro Prezidan e sak Minister Departman pou responsab pour son prop *travel expenses*. Pardon, ti tonm anba Minister Finans o fet avan.

Pou osi pey kontribisyon bann lorganizater

enternasyonal ki relye avek Departman Zafer Etranzer. Avan sa ti santralize kot Minister Finans, e prezan sak departman i responsab e nou, nou annan en lalis.

En gran lalis o fet bann lorganizasyon enternasyonal ki nou sipoze responsab pour peye, ki ariv plis ki R26milyon kotizasyon par an. E apre en poursantaz dan sa logmantasyon, se pou kouver tou lenflasyon dan bann pei kot nou annan Lanbasad.

Mon ava aret la Mr Chair e lezot pwen mon a kouver an repondan bann kestasyon ki Onorab i a oule demann mwan. Mersi.

**MR SPEAKER**

Tre byen, nou a konmans ek kestasyon bann Manm. Onorab Labonte a konmanse.

**HON ANDY LABONTE**

Mersi Mr Chair. Mr Chair mon annan zis de pti leklersisman. Premye anba *program* 1 *regarding* sa renovation pour carport, ki ti annan en alokasyon 2milyon an 2022 e la i annan 2.2milyon pour 2023. Petet si nou kapab ganny en pti lesplikasyon pou kwa sa vremen e kote - ki pe arive? Akoz petet pou konsonmasyon piblik.

Apre dezyenmman se sa renovasyon lo *office building* ki annan en alokasyon ankor 1milyon. E pou terminen...

**MR SPEAKER**

Nou a pran 2 kestasyon Onorab.

**HON ANDY LABONTE**

... zis *program* 2 Mr Chair, dernyen. Pou *international relationship, relation* kot *London High Commission*. Mon war i annan en logmantasyon sibstansyel ki sorti 700mil pou vin...

**MR SPEAKER**

Nou pe pran 2 kestasyon Onorab. Nou pe pran 2 kestasyon.

**HON ANDY LABONTE**

... 2milyon *office building*.

**MR SPEAKER**

Mersi. Minis? Delegasyon? *PS* pou reponn Minis? *Yes PS*.

**PS AMBASSADOR VIVIANNE FOCK TAVE**

Bonzour Chair. Bonzour tou Onorab e tou dimoun ki a lekout. Konsernan ou premye kestasyon Onorab, lo nou *CAPEX* lo sa *carport*;- wi an 2022 nou u ti'n ganny 2milyon, pou sa *carport*. Me selman nou'n ganny retar pou konmans nou *carport*. *Design* i ankor avek *Planning*

*Authority e hopefully Planning Authority* a donn nou en larepons avan lafen lannen.

Me solman nou pa krwar nou pou kapab konmanse sa lannen. Se pou kwa prezan in pran sa larzan in met dan 2023. Akoz in monte pou 2.2milyon, set akoz osi nou'n deside ki anba sa *carport*, sa *carport* pou lo pilye, i konpri osi pou nou aranz *the retaining wall* ki pe tonbe kot sa *carport* i ete.

Nou'n deside pou met li lo pilye e anba la prezan nou pou fer en *storage* pou nou kapab servi pour Minister. E sanmenm sa in ariv 2.2milyon.

Lo kestyon renovasyon *office building* 1.6milyon, sa i annan bann balistrad ki nou bezwen aranze. E osi bann, kot mon kapab dir i annan karya anler kot bann plafon pou nou tire, re aranze. Mersi.

**MR SPEAKER**

Mersi PS. Onorab?

**HON ANDY LABONTE**

Dernyen pti leklersisman Mr Chair.

**MR SPEAKER**

En pti leklersisman, wi.

**HON ANDY LABONTE**

Wi, kot pour *International Relation London High Commission*, sa ogmantasyon?

**MR SPEAKER**

Be, sa en lot kestyon sa! I pa klarifikasyon. PS ou kapab donn li en repons dan en fraz silvouple?

**PS AMBASSADOR VIVIANNE FOCK TAVE**

Wi. Onorab sa i plis pour ... I annan osi ladan lenflasyon ki nou'n enkli, e osi nou 27milyon pour *international contributions*.

**MR SPEAKER**

Mersi. Onorab Gill, wi.

**HON CHURCHILL GILL**

Mersi Mr Chair. Bonzour PS ek ou delegasyon. Mon annan zis 1 kestyon. Dan detay *other goods and services*, i annan en *subscription fee* pou R27milyon. Si nou ti kapab ganny detay silvouple, mersi.

**MR SPEAKER**

*Thank you.* PS i reponn.

**PS AMBASSADOR VIVIANNE FOCK TAVE**

Mersi Onorab. Sa 27milyon i osi, li menm li sa *contribution to international organisations* ki Minis in eksplike. Ki avan ti santralize kot Minister Finans.

Nou ti ganny tou bann *invoice* sorti kot tou bann Minister, ti vin kot nou. Nou ti anvoy kot Minister Finans pou peye.

La prezan Minister Finans in *allocate* ek sak *MDAs* zot Bidze pou zot pey zot international organisations ki zot ladan. E Departman *Foreign Affairs* i annan bann lorganizasyon ki tonm anba nou parey *UN*, *COMESA*, *SADC*, *Commonwealth* eksetera, mersi.

### **MR SPEAKER**

Mersi. Onorab William.

### **HON WAVEN WILLIAM**

Mersi Mr Chairman. Mr Chairman mon anvi demann avek Minis an relasyon avek *strategy*, *bullet point number 9*, kot i konsern '*strengthen collaboration and dialog with Ministries*' mon anvi demann avek Minis, a pran avek en kestasyon ti demande dan Bidze lannen pase.

Mon anvi konnen si sa *Inter Agency Ministerial Committee* in fini ganny formen? Si wi, si i ava *extend* en lenvityasyon pour, avek komite Zafer Etranzer, *just for the sake of nou oversight work*.

Akoz sa ti annan pou fer avek bann *MOUs* ki - epi bann *poor reaction from the line Ministries* lo bann demars pe

ganny fer enternasyonanman. Ou Minis ti dir pou dir ou form sa Komite. So mon anvi konnen si in ganny formen? E si i aktiv, e si ou kapab *extend* en *invitation to the Foreign Affairs committee*?

Dezyenmman, mon vwar anba *new spending*, latap 4. Mon vwar poudir i annan, zot pe al anploy bann nouvo zofisyè;- par egzanp i annan de *first secretary to second secretary* avek *one third secretary*.

Par lefe ki dan letan *Covid*, e sityasyon ekonomik ki Sesel ti pe pas atraver, nou ti vwar ki ti annan difikilte pour ranforsi mendev avek nou bann *overseas mission* e par rapor avek *meeting* ki nou'n gannyen, avek letan bann Anbasader ti isi, i annan serten ki pe eksperyans serten difikilte.

Mon anvi konnen si anba sa bann nouvo *recruitment*, si annan serten bann Lanbasad ki pou ganny ranforsi vizavi bann mendev?

E an relasyon avek sa, eski Bidze osi baze lo lenflasyon ki pe pase globalman, Bidze osi bann Lanbasad pou ganny ranforsi? Mersi.

### **MR SPEAKER**

Mersi. Minis.

**MINISTER SYLVESTRE RADEGONDE**

Mr Chair, Onorab, mersi pou ou kestyon. Konsernan ou premye pwen, wi, sa, *PS* in konmansa sa bann seri *sectoral meetings*. *So far* mon krwar in fer *meeting* avek en douzenn bann diferan *MDAs*, so nou pran ou pwen. Nou ava envit ou Komite pou vin *attend*. Mon krwar i ti a bon ou konpran *bann issues* ki nou pe trete.

An sa ki konsern bann Lanbasad. Ou konnen, nou tou nou ti a voudre *staff*. Ou'n travay dan Lanbasad Onorab, ou konnen, nou ti a voudre *staff*.

Mwan, mon rapel ler mon ti konmansa konman en zenn diplomat, mon premye pos mon ti al Lonn, mon ti mon tousel. E sa letan mon ti pe travay anba en rezim avek en Minis ki ti *tough*. Ou ti bezwen tou le semenn fer bann rapor, *activity report* tou le semenn. Mon ti annan mon tousel, en drayver ek en sekreter. Travay ti ganny fer, ou ti fer.

Se vre ozordi lemonn in evolye, i annan neseseite petet dan serten Lanbasad vir bann *panoply* aktivite ki zot ganny demande pou fer. Sirtou bann ki dan en konteks multilateral, ki i annan en lorganizasyon enternasyonal ki zot okipe.

Neseser pou nou ogmant *staff* kot i posib. So sa legzersis nou'n fini fer. Desizyon in fini ganny pran.

Par egzanp mon a dir ou kot *EU* ki dan en konteks multilateral, i pou toultan en Anbasader avek en lot Diplomat. Sa i lefe. Evantyelman ler nou kapab *afford*, petet i ava annan en trwazyenm, me pou konmela i 2.

*Brussel*, akoz i annan Linyon Eropéen avek, i Anbasader *plus* en lot Diplomat. *Paris*, akoz i annan *UNESCO* ek lezot organizasyon, i en Anbasader *plus a second* Diplomat;- . *UN* son *panoply* aktivite i bokou pli gran. I pe dil ek en kantite bann *issues*. *Small Island States*, lanvironnman, lot, lot, lot, lot. Apre bann plizyer Komite ki zot bezwen swiv.

Nou'n deside ki Lanmerik i ava Anbasader plis 2 Diplomat. Ti annan en letan, ti annan mon krwar 2 Anbasader ki ti mete *New York*. Enn pou okip zafer *UN*, en lot pou okip zis bann zafer *Small Islands States*. Prezan nou'n met tousala anba en Anbasader plis 2 lezot Diplomat.

Vwala, pou lezot, malerezman ziska ler nou dekouver petrol, bann

Anbasader pou bezwen debourye avek mwayen ki zot annan. E sa ki nou demann zot fer se fer priyorite travay. Zot pa pou kapab fer tou keksoz anba soley. Garde kwa ki pli enportan, *focus* lo la, e vwala. Mersi.

**MR SPEAKER**

Mersi. I annan son pti pwen lo si lenflasyon pou ganny reflekte dan Bidze - si ou kapab reponn sa.

**MINISTER SYLVESTRE RADEGONDE**

Wi, in ganny reflekte. Mersi.

**MR SPEAKER**

Mersi. Bon. Klarifikasyon? Vitman Onorab. En fraz.

**HON WAVEN WILLIAM**

Minis, mon anvi konnen osi, akoz i annan serten bann ziridiksyon kot, *well* si sa lager zeopolitik i kontinyen, epi lo kontinan Lafrik osi i annan serten bann diferan konfli;- i annan serten landrwa kot nou misyon i ete kot pri pe vreman sanze toulezour - e mon anvi konnen si par egzantp, si i annan en *contingency* kot si vreman i depas *limit* ki zot in bidzete, zot kapab ede? Akoz i annan ziridiksyon ki vreman zot pe ganny afekte bokou.

**MR SPEAKER**

*Thank you.* Briyevman Minis.

**MINISTER SYLVESTRE RADEGONDE**

Onorab mon kapab asir ou ki nou Minister ki annan en leker, nou pa pou oule ki okenn nou *staff* i dan en pozisyon kot, *you know*, i dan en *tight spot*. So, nou a etidye sak sityasyon ka par ka, e mon kapab garanti ou nou a dil avek. Mersi.

**MR SPEAKER**

Mersi, Onorab Henrie. *Sorry*, Onorab Arissol premye, ti'n lev lanmen avan.

**HON SANDY ARISSOL**

Mersi Mr Chair. Bonzour Minis avek ou lekip. Bonzour tou Manm Lasanble Nasyonal. En kestyon Mr Chair, mon ti a kontan demann Minis si anba son Bidze 129milyon, zot aste bann prodwi lokal bann artis Seselwa;- par egzantp CD?

Eski *Foreign Affairs* i aste sa bann prodwi pou fer kado ek bann *dignitaries* oubyen pou fer kelkonk? Si wi, kantite zot annan? Konbyen artis ki okouran? Ki prosedir pou zot kapab fer sa? Mersi bokou Mr Chair.

**MR SPEAKER**

Mersi Onorab. Minis, ou repons?

**MINISTER SYLVESTRE RADEGONDE**

Mr Chair, Onorab, mersi pou ou kestyon. Wi, tou nou bann *official gifts* i lokal. Napa naryen ki nou enporte. Nou pran avek artis lokal.

Byensir i pa pou nenport kwa. Nou bezwen mezire kwa. Nou ofer kantite bann *CDs*. Nou ofer prezan bann *pen drive* avek lanmizik. Me nou swazir bann artis. Nou pa pou met en ... mon pa oule fer komantr ki pou ofans personn.

Me, ou konpran mwan ki mon oule dir. Me *short answer* se ki wi, nou ofer komantr *official gifts*, lapentir, lanmizik, lezot prodwi labouzi ki fer lokal, savon ki fer lokal, Bann zafer. *So, no problem there*, mersi.

**MR SPEAKER**

Wi?

**HON SANDY ARISSOL**

Mersi Mr Chair, mersi Minis pou larepons. Mon kestyon se eski bann artis i okouran pou dir i annan sa laport, ki zot kapab servi pou promosyon zot prodwi? Mersi Mr Chair.

**MR SPEAKER**

*Thank you*. Minis?

**MINISTER SYLVESTRE RADEGONDE**

Petet sa Onorab, i en travay ki nou bezwen fer pou lezot konnen. Sa ki mon konnen se ki i annan en kantite ki vin devan. E sa problemm avek nou artis, lot zour ler mon ti pe okip mwan mon ti pe ekout en dimoun dan Kiltir *Institute* ti pe dir, kot bann artis osi zot bezwen debourye. Ale al rod biznes.

Vin kot nou, vin propoz zot prodwi ki i annan. E nou toultan konsidere si i sa kalite, i sa nivo ki nou kapab prezante konman en kado ofisyel. Mersi.

**MR SPEAKER**

Mersi. Onorab Cosgrow.

**HON WALLACE COSGROW**

Mersi Mr Chair. Bonzour tou bann nouvo dimoun ki'n zwenn nou lo *panel*. Mr Chair mon annan 2 kestyon lo sa ki konsern *international relations program 2*. Mon kestyon nimer 1, i an sa ki konsern nouvo Polisi, *well* nouvo devlopman dan paspor, en.

Nou'n ganny dir par Departman Imigrasyon ki pou dir dezormen tou bann Seselwa ki reste aletranze ki zot paspor in *expire*. E nou konnen i annan en kantite Seselwa aletranze, sirtou Lostrali, Langleter en pe



Lafrans, bann pei Lerop, e osi Lanmerik.

Zot in ganny dir ki pou dir dezormen zot pou bezwen, swa desann Sesel pou vin refer zot paspor biometrik. E ki evantuelman pou annan en posibilite dan bann Lanbasad deor, pou zot kapab fer zot paspor.

*Now* mon pe gete, eski sa deklarasyon ki Imigrasyon in fer, in ganny anvoy dan sa Bidze ki la devan nou, pou *cater* pou la kantite *emergency travel documents* ki pou posibleman bezwen fer an 2023- 2024, pou dimoun ki paspor in *expire*? Akoz i annan ki reste en pe letan deor in *expire*.

Lontan i ti anvoye i ti fer renouvle, i ti al organize. Be konmela la, la prezan ek sa nouvo laranzman soudan ki'n zis sok tou dimoun – si zot annan kapasite sa Bidze pou *cater* pou sa kantite *emergency document - travel document*?

E osi pou *cater* pou zofisye ekstra pou dil avek sa bann zafer, si an ka zot annan fasilite pour re fer paspor dan bann Lanbasad? Si zot annan dan sa Bidze fasilite pou fer sa? Sa i nimerò 1.

Dezyenm i konsern bann *grants* ki Sesel i gannyen, en? Nou annan bann Lanbasad deor. Akoz nou konnen par

egzanp avek *grant* ki nou'n gannyen avek *India*, nou'n war in sorti preski dir, net dan Bidze. Ti la dan Bidze 2021, 2022, me nou pa war. Nou ganny en konpran ki pou dir sa *grant* ek *India* i pa pou neserman materyalize.

So, eski dan bann Lanbasad deor, mon'n pran *India grant* konman en legzanp - me eski dan bann Lanbasad deor zot annan kapasite pou *follow-up* bann *grant* pou negosye, kontinyen negosye, e fer sir ki Sesel i benefisye avek sa bann lakor ki nou sinyen ek sa bann pei?

E ki finalman sa bann larzan ki nou benefisye i ava anmenn benefis pou bann diferan sekter isi. Par egzanp Lakaz, Ledikasyon, Lasante, pou ki pep Seselwa osi a kapab rezoui.

So, eski zot annan sa kapasite dan bann Lanbasad atraver zot Bidze, pou fer sa travay, pou fer sir ki nou gannyen, e menm osi lokalman dan nou Minister *Foreign Affairs*? Mersi.

**MR SPEAKER**

*Thank you* Onorab. Minis, repons *please*?

**MINISTER SYLVESTRE RADEGONDE**

Mersi Mr Chair. Mersi Onorab pou ou 2 kestyon. An sa ki konsern paspor, ti annan en letan, bon pe letan pase kot ti annan 3 nou Lanbasad deor ki ti *issue passport*. Ti annan Lonn, ti annan *Paris*, ti annan *New York*. E ti fer lo en baz rezyonal. Apre pou en serten... pour mon pa tro konnen ki rezon, ti deside santralize, tou paspor *issue* Sesel.

E serten Lanbasad ti zis *process* dan sans ki, sa letan ti ankor ranpli papye. En dimoun i vin Lanbasad, ou *print* son papye, ou donn li, ed li ranpli, me i anvoy Sesel. Sa ti prosedir avan.

Sa nouvo zafer *biometric passport*, wi mon dakor avek ou. Avek kantite dimoun Seselwa ki atraver lemonn ozordi, i pou annan en pe problem, mon a dir plito kontrent, lo ki mannyer nou *handle* sa.

Pou reponn ou kestyon, dan sa Bidze 2023, napa okenn provizyon ki'n ganny fer dan Bidze *Foreign Affairs* e okenn son Lanbasad pou *cater for that*. Mon krwar Imigrasyon osi ankor pe organiz zot. Ki mannyer sa zafer pou *rollout*, e mon sipoze en desizyon i a ganny pran evantuelman. Be la ler mon pe koz ek ou, non, napa.

An sa ki konsern bann *grant*, i en zafer pe...Ki mannyer mon kapab dir ou sa? Ou'n servi en pei. I vre ki avek sa pei serten *grant* ki nou ti krwar nou ti pou gannnen;- par egzanp, avek konstriksyon biro Gouvernman, nou pa pe gannnen.

E mon pou kapab dir la piblikman ki bann diskisyon i annan. Me asir ou ki napa naryen pou fer avek nou.

I nou responsabilite *Foreign Affairs*, e le mon dir *Foreign Affairs* mon dir *staff* ki baze *headquarters*, be osi nou bann misyon aletranze. I dan nou travay toulezour sa, pou fer sir ki pa selman *grant*. Tou bann lagreman ki nou tonm dakor lo la, ki annan en konponan finansyel ki napa - *scholarship*, ensidswit, i responsabilite nou tou pou nou *follow-up*. E sa i *form* parti.

E nou bann Lanbasad nou'n tir zot en pti pe lo *spot*, nou fer zot prezan *quarterly* anvoy nou en rapor aktivite. E dan zot rapor aktivite i dir nou egzaktaman kwa ki zot in fer, ki progre in fer, si napa progre, akoz ki zot pe fer pou adres bann *bottleneck*. So, vwala, i *form* parti nou travay toulezour. Mersi.

**MR SPEAKER**

Mersi. Onorab Henrie.

**HON GERVAIS HENRIE**

Mersi Mr Chair. Ankor enn fwa bonn apre midi tou dimoun. Lo size paspor Minis, mon pa trakase si napa provizyon dan ou Bidze, akoz mwan personelman koman en Seselwa, mon ti ava prefere war bann Seselwa ki deor, retourn Sesel pou vin *claim* zot paspor - a leksepsyon bann etidyan par egzantp, ki nou nou'n anvoy etidye. Nou fer bann laranzman si zot pa kapab tournen.

Me bann lezot Seselwa de tou fason zot annan en lot paspor, swa Kanadyen, swa Ostralyen. Pou nou kapab konnen zisteman kote nou paspor i ete, lekel ki annan nou paspor?

A en moman sa nouvo ladministrasyon i bezwen konnen lekel sa bann Seselwa, swadizan Seselwa ki annan paspor, kot zot ete? So pa tro trakase pou taye pou al rod larzan met dan Bidze.

Mwan mon annan en sel kestyon Mr Chair, lo kestyon *diaspora*, mon vwar pou dir i annan en program i lo lata 8, setadir nou pe koz 400 paz, 417, e i annan en target la pou langazman avek *diaspora* pou fer bann *meeting* vit, vertyel, e fizik e bann lezot enteraksyon.

Me mon anvi ou dir nou kwa an plis ankor ki sa Bidze i kapab fer provizyon, pou nou annan en enteraksyon avek nou *diaspora*? Parske nou ti anmenn en Mosyon dan sa Lasanble pou ki Gouvernman i reflesir lo maksimiz potansyel nou *diaspora*. Sirtou pou zot kapab investir dan Sesel.

E alor nou bezwen vin avek bann *policies* ki target nou *diaspora*. E zis pou donn detrwa legzanp vitman Mr Chair. Nou pe fer revizyon dan Fon Pansyon. Nou kapab *come up* avek en *Scheme* pansyon pou nou bann *diaspora*.

Nou kapab ankouraz zot pou investir dan serten *bond* spesifik dan Sesel; aste *shares*, ouswa fer bann lesanz program edikasyonnel e *training*.

Kantite Seselwa mon war lo *Facebook* zot pe fer bann gran, gran konferans. Zot pe koze. So, *what else can we do* an term Polisi direk ki anmenn en retonbe. Akoz parey mon pe dir, mon sa ki mon anvi war se Sesel i prospere e nou Nasyon i pli *happy*. E bann dimoun laba deor i donn nou en koudmen pou ogmant nou *happiness*? Mersi.

**MR SPEAKER**

Mersi. Minis?

**MINISTER SYLVESTRE RADEGONDE**

Mersi Onorab. Mon pa oule monopoliz mikro, mon a pas en pti kou avek *PS* en pti moman pou dir nou sa ki nou pe fer lo *in terms of* nou stratezi ki nou pe met an plas.

Pou mon dir ou Onorab, dan Minister Zafer Etranzer, depi 2an ler mon'n vini, nou'n *set up* sa *unit diaspora* avek son *staff*. Mon krwar petet ler mon regard sa seksyon konsiler avek *diaspora*, i petet en *unit* dan Minister Zafer Etranzer ki pli *well-staffed* mon dir, konsider an *volume* travay ki zot annan.

Nou pe kontinyen atraver nou bann misyon aletranze;- bann misyon diplomatik atraver nou bann Konsil Onorer, pou ankouraz zot pou *reach out* avek bann Seselwa ki dan zot ziridiksyon - ankouraz zot pou anrezistre.

Nou annan osi en *website* ki nou ofer lib, bann Lanbasad i annan *website*. Nou ankor remark en serten retisans kot Seselwa i ankor retisan pou vin devan pou donn okenn detay konsernan zot, kot zot ete. Zot ladres, nimerò telefonn, ensidswit.

Mon pa pou al dan sa bann rezon la, me i en bann rezon ki en pe sikatris si oule,

lepase. Nou bezwen aksepte. Me i pa vedir nou pa'n fer *headway*. Nou pe fer. Mon'n ganny dernyen *update* le 24 Novanm, yer. Mon *pleasantly surprised*.

Lafrans par egzantp i annan 300 ekek Seselwa ki'n vin devan pou anrezistre. Mon regard *Italy*, i annan 343 Seselwa ki'n vin devan. *Kenya* mon sirprann i annan 200 ekek. *United Arab Emirates*, 143. *UK can do better* avek 195. I annan bokou plis Seselwa Langleter, Apre lezot, *Belgique* 45, wi. *Bahrain* 31.

So, malgre retisans, i annan serten ti pa ki nou pe fer, i pe vini, i a vini. Pou reponn direkteman ou kestyon lo stratezi ki nou pe fer *PS* mon a pas avek ou pou ou koz lo travay ki nou pe fer avek *International Organisation of Migration*.

**MR SPEAKER**

Mersi *PS*, ou ava azoute.

**PS AMBASSADOR VIVIANNE FOCK TAVE**

Mr Chair, Onorab Henrie, nou *Diaspora Unit* la i pe travay pre avek *IOM* - *International Organisation for Migration*, ki pe ed nou, pou nou devlop en Polisi pou *diaspora*.

Sa *terms of preference* in fini ganny fer pour en Konsiltan

pou vini, ki kapab konmanse Zanbye oubyen Fevriye. E sa *consultancy* pou ale pou apepre 11mwan.

E ki nou anvi fer avek sa Polisi, sa Polisi li menm li nou pe espekte i pou *provide en framework*, ki mannyer nou pou angaz avek nou bann *diaspora*.

E i a fer provizyon ki nou annan en pli lapros striktire e pou kordin e armoniz nou bann zefor pou angaze avek nou bann *diaspora*. Sa, apre pou annan en *action plan* tou ki sa konsiltan pou ed nou pou devlope. Mersi.

### **MR SPEAKER**

Mersi. Bon nou a termin kestyon avek Onorab Pillay.

### **HON SEBASTIEN PILLAY**

Mersi Mr Chairman. Mr Chairman mon pou pran premye kestyon kot nou'n fek fini la lo size *diaspora*. Mon pa ganny en konpran akfer nou vin fer en bann *statement* dan Lasanble ennler ki pa fer sans. Pa ou Minis, Onorab ki'n koz avan.

So mon kestyon pour ou i senp. Vi ki Imigrasyon in entrodwi prosedir pou en paspor biometrik e *Foreign Affairs* i pou enn bann *focal point* pou bann dimoun vini –

swa pou dan en *processing*, eksetera. Nou annan Seselwa ki pe travay dan bann pei, par egzanz dan bann pei Arab, ki zot, zot napa en paspor sa pei Arab. Zot annan en paspor Seselwa e zot i pe enportan ki zot kapab renouvle zot paspor o moman ki zot pe travay laba.

So, sey ed nou konpran ki mezir ou pou pran prezan, prenon kont ki ou pa'n pran konponan bidzeter an konsiderasyon. Ki mezir ou pou sey pran pou *beef up* en pti pe ou bann lofis aletranze, pou ki zot a kapab *accommodate* fer sa travay, e i ava ed ou dan sa lanrezistremant pou *diaspora* zisteman?

Akoz, si en dimoun i prezant son lekor pou refer son paspor Seselwa, *then* otomatikman ou anrezistre li. Akoz i pe rod en paspor Seselwa i bezwen en Seselwa. Sa i mon premye kestyon.

So, eski ou pe fer okenn demars ozordi, oubyen eski nou kapab angaz ou pou fer demars pou bann dimoun ki dan *diaspora* ki pe ekout nou ozordi? I annan ki'n eksprim konsern - vizavi sirtou i annan ki Langleter e *Canada* ki'n eksprim konsern vizavi pou zot refer zot paspor Seselwa. E sa mon pe koz bann Seselwa, mon

bann fanmir ki osi aletranze parey.

Dezyenmman Mr Chairman, mon ti a kontan si Minis i ed nou pou klarifye, i annan provizyon bidzeter anba ou Bidze kot ler mon regard kot *protocol services*, ki si oule ou *frontline* an relasyon avek bann aktivite ki arive Sesel.

E ler mon regard Bidze pou *protocol services* e mon regard son *wages and salaries*, mon ti a kontan demann ou Minis si i dan plan ou Minister;- akoz ozordi ler mon regarde, Mr Chairman zis pou konfirm sa sif avek Lasanble - mon vwar sa sif ki la, *wages and salaries in cash* i 4.9milyon.

Mon ti a kontan konnen konbyen *staff* ou annan anba servis *protocol*? E si ou annan lentansyon, si sa i enkli bann *drivers* - e si ou annan lentansyon pou revwar serten provizyon zot *Scheme*? Akoz, si oule, se zot ki *the backbone of* bann aktivite, bann keksoz ki ou Minister i fer e ki zot bezwen petet...Nou bezwen petet regard dan bann kondisyon ki zot pe travay anba la.

E mon dernyen pwen lo sa size kondisyon travayer, menm pwen lo kondisyon travayer.

**MR SPEAKER**

Lo menm pwen, *ok*.

**HON SEBASTIEN PILLAY**

*Ok*. Mon pou vin anba ou *central administration*. A sa ki mon pe remarke, deplizanpli ou pou ganny bann *staff* ki annan bann konpetans spesifik. Swa bann degre lo nivo, swa *masters*, doktora, ki pou vin travay dan ou Minister, si oule.

Akoz mon krwar ler mon ekout ou, sa ki oule gannye se *quality* dan *output*, me pa dan *quantity of* annan en ta dimoun pe travay. Me plito en *quality*. E pou ou ganny sa *quality* ou bezwen annan *staff* sa nivo.

Lefe ki Gouvernman in *phase out* sa *Recognition of prior learning*. *Basically* ki ti ou *sort of*, ki rekonnet ou kalifikasyon e in *merge* sa avek saler konsolide konmela. *Let's assume* ki ou ganny bann dimoun ki ou anvoy *train* ki vin avek bann degre avanse dan diplomasi, eski ou pou kapab donn zot en *allowance* pou sa degre ki zot ofer? Ki mezir ou pe pran pou regard en pti pe sa kad akademik lo nivo ou *staff*? Mersi Mr Chairman.

**MR SPEAKER**

Mersi. Minis, i annan sa 3 pwen la.

**MINISTER SYLVESTRE RADEGONDE**

Mersi Mr Chair. Mersi Onorab pou ou 3 keston. An sa ki konsern paspor biometrik ou a konpran Onorab ki mon pa pou kapab pronons mwan lo la, la. Nou *Foreign Affairs* nou pou les nou ganny dirize par Minister Zafer Enteryer. *And we'll take it from there* ler nou konmans ganny sa diskisyon.

An sa ki konsern *protocol*, wi bann restriktirasyon ki nou'n fer dan sa Divizyon *Protocol* se ki nou'n met osi *public diplomacy* avek zot. So it's *protocol and public diplomacy*.

Zis pou donn ou en lide *staff*, apart *safe protocol* ki *state*, *Chief of State Protocol* Mr Moumou, i annan li plis ki 9-8 *protocol officers*, diferan grad.

Aprè nou annan 2 dimoun osi *protocol*, me ki dedye pou *public diplomacy*. Aprè nou annan 8 *VIP chauffeurs*. Donk *staff* se 19.

Eski i annan posibilite war kondisyon, ensidswit? Wi toultan i annan posibilite war kondisyon atraver - mon a dir *the whole department*. Nou annan en *Scheme of Service* parey ou konnen ki nou fer anba la, e malerezman koumsa zafer i ete.

Mon kontan bon parol ki ou'n dir konsernan bann larzan *protocol*. Wi zot fer en travay

fantastik. Gro responsabilite. Pa selman isi. Parske ler Prezidan, Vis-Prezidan, ensidswit i deplase, se zot ki akonpanyen pou al fer sir ki bann laranzman *protocol* lo lot kote i marse.

So, nou, nou kontinyen a sak fwa regarde ki mannyer nou kapab *improve welfare* nou *staff*. Kot finansyel ti a byen, me kot napa bann benefis finansyel, garde kwa lezot keksoz ki nou kapab fer. So nou a kontinyen sa legzersis.

An sa ki konsern ou trwazyenm pwen, sa i pou rekonpans bann *staff*, wi. Onorab be, en keston, en problem ki nou annan...An fet, mon'n fek lev sa ankor sa semenn - *Foreign Affairs, you know*, zoli *building* ensidswit, nou annan en *acute shortage* of dimoun avek leksperyans.

Sa ki mon kapab dir *though*, nou annan en tim zenn marmay dedye, dinamik. *There's no doubt about it*. Mon krwar nou *lucky* pou annan sa time *PS* avek mwan, nou ki annan sa tim pou nou travay avek.

Me an menm tan nou realize ki i annan serten - dizon, serten responsabilite. Serten pos ki ou ti a kontan, la kapab tire dan sa *pool* dimoun ki ou annan, met dan en lot pos.

Dizon en pe pli *senior*, i pa neserman posib la.

So, i en travay ki ankore i en lenvestisman plizyer lannen. Malerezman *once upon a time* sa Minister ti annan en bon pe dimoun, ki prezan pou en bann rezon zot in disperse en pe partou. Enn de, nou'n kapab fer retournen. Me i annan ki'n refer zot lavi aryer.

So, wi nou le kalite *rather than quantity*. Me avek sa kalite i annan osi lannen leksperyans ki vin avek. So, nou espere ki avek bann lannen ki vini, nou a kapab osi annan, ganny sa kriter ki al avek sa. Mersi.

### **MR SPEAKER**

*Thank you.* Yes, Onorab Pillay terminen avek klarifikasyon.

### **HON SEBASTIEN PILLAY**

Mersi Minis. Mon premye klarifikasyon i konsern sa laranzman ki Gouvernman in propoze. Ler nou ti *challenge* Minister Zafer Entern lo sa mezir ki in pran e mon ti ganny Seselwa ki reste, detrwa Seselwa ki reste *Italy* ki ti'n isi, zot ti sey profite pou anvoy zot paspor pou fer prosedir.

E nou ti konmans realize poudir pou vin en problem pou sirtou bann Seselwa ki en pe pli aze, dan *diaspora* ki reste aletranze, ki annan *still* en

koneksyon nostalgik avek zot paspor Seselwa. Mon annan mon en tantin ki annan over 82 *years Canada* e i mazin son paspor Seselwa, malgre i annan en paspor Kanadyen.

So mon konsern Mr... - pa ki mon pe koz pou li, mon pe koz pou tou Seselwa - mon konsern se ki mon bezwen *impress* lo Gouvernman ki ou'n pran en desizyon. Mon pa pou dir mal kalkile, me ki ou pa'n ase aziste tou ou bann eleman. E la problem pou tonm lo en Minister ki li, ou pa'n donn li sa notis ki ou pe vin avek sa. E mon santi ou pa'n ganny sa notis Minis, ki sa pe vini.

So, ki mon pe *impress* lo ou, ki bezwen annan en mezir ki ou Gouvernman i pran - Mr Speaker, mersi pou donn mwan loportinite pou fer sa *statement*.

Dezyenmman Minis, an relasyon avek ou bann *Schemes of Service*, reasir mwan ki lefe ki i annan sa provizyon *RBM* e provizyon *Public Service Bureau* pou revwar *Schemes of Service* kad dimoun ki travay dan *Foreign Affairs* zot ganny en *training* spesifik, ki ler ou perdi zot ou bezwen *retrain* en dimoun. E i pran bokou lannen pou *retrain* sa dimoun pou ariv lo sa nivo *protocol* ki Mr Moumou i annan. Lo sa nivo - Menm bann *VIP chauffeur*. I pa



nenport ki ou kapab pran pou vin en *VIP chauffeur*.

So, reasir nou ki ou pou reziste okenn *attempt* pou fer ou, pou pa amelyor *Schemes of Service* ou bann dimoun ki ou annan ozordi. Akoz i annan serten konsern ki zot in eksprimen lo ou ler travay, lo lakantite *outputs* ki zot pe donner. E ki *input* ki zot, zot resevwar, i pa neserman *commensurate* avek sa zefor ki zot pe mete dan zot louvraz.

Mon bezwen reasir ou Minis ki zot kontan zot louvraz, zot kontan travay pou *Departman Foreign Affairs*. E nou tou ki al bann levennman nou kapab war sa. Me i enportan pou nou ki resevwar sa servis osi, koz lo *behalf* sa bann dimoun.

So eski ou kapab reasir nou ki ou pou fer tou sa ki posibil, pou ou kapab regard dan ki mannyer ou kapab ed sa bann travayer, pou resevwar en reminerasyon ki petet pli an liny avek sa ki zot pe panse? Pa neserman sa ki zot ekspekte. Me pli rezonnab avek sa ki zot pe panse. Mersi Mr Chairman.

### **MR SPEAKER**

Mersi. Bon lo size paspor nou kapab les sa pou Zafer Entern. Me Minis lo ou *Scheme of*

*Service*, sirtou pou *protocol*, please.

### **MINISTER SYLVESTRE RADEGONDE**

Mersi Mr Chair. Mersi Onorab. Mon napa problemn donn ou sa lasirans. Pa selman pou zis *protocol*, me pou tou *staff* dan *Foreign Affairs* e *Tourism*. *At least* sa 2 portfey ki mwan mon responsab. *Staff welfare* i tre enportan. *Happy staff* i donn ou en servis ekselan e se sa ki mon oule rode. An tou ka, mon pouse pou travay bokou, me an menm tan nou bezwen vey zot *welfare* osi, mersi.

### **MR SPEAKER**

Mersi. Bon nou pare pou pran vot. Ms Tamatave, mon war nou ti sipoze pran en sel vot lo tou le de sa, me selman nou'n pran enn deza. Swa zis kontinyen avek lot pou nou pa *nil* nou premye vot.

So, vot Bidze pou *Departman Foreign Affairs*, pour en total R129milyon498mil. Manm ki an faver lev lanmen silvouple? Apre nou fer en sel vot, *ok*.

Lo vot pour *Departman Foreign Affairs* pou R129milyon498mil, 30 Manm in vot pour, 0 kont, e 0 abstansyon.

Donk mon krwar Minister Finans in endike ki nou rebran en vot lo total. Vot pour *Minister of Foreign Affairs and Tourism* i pou R331milyon439mil. Manm ki an faver, lev lanmen silvouple? Mersi. Lo sa vot pou Minister antye - 30 Manm in vot pour, 0 kont e 0 Abstansyon. Sa Bidze in aprouve par Lasanble. Mersi.

Mon remersye Minis. Mon krwar Minis pe kit nou osi la. E delegasyon *Foreign Affairs*, mon swet zot bonn kontinyasyon dan zot travay. E mersi pou zot partisipasyon. Nou a pran *lunch break* e nou a rebran 2er apre midi, mersi.

**(BREAK)**

## **MINISTRY OF EDUCATION**

### **MR SPEAKER**

Bonn apre midi tous. Nou kontinyen avek Bidze. Madanm raporter, nou annan en delegasyon ki pe atann? Mersi.

Bonn apre midi Minis Justin Valentin, Minis pou Ledikasyon e bann zofisye ki pe akonpanyou.

Ms Merna Eulentin *PS* pou *Education Services*, Mr John Lesperance *PS* pou *Education Sector Development*, Mr Bernard Arnephy *DG* –

*Institutional Support Services Division*, Mrs Nadia Lauricourt *CEO - Agency for National Human*

*Resources and Development*, Ms Pamela Matombe - *Ag financial controller*.

Byenveni zot tou, e mersi davans pou zot partisipasyon dan Lasanble lo Bidze Minister Ledikasyon, ki lo paz 290 ziska 306, pou en total R1bilyon285milyon588mil. Minis, nou konmans lo ou Bidze avek ou lentrodiksyon. Mersi.

### **MINISTER JUSTIN VALENTIN**

Mersi Mr Speaker. Bonn apre midi Mr Speaker. Bonn apre midi *Leader* Lopozisyon, bonn apre midi *Leader* Zafer Gouvernman, bonn apre midi tou bann Manm Onorab e tou bann dimoun ki pe ekout nou.

Mr Speaker i touzour en plezir pou angaz avek Lasanble dan sa legzersis, avek bi donn en leksplikasyon lo nou Bidze pour 2023.

Mon pou konmanse dabor par souliny bann priyorite Minister Ledikasyon, pour 2023/2025. Nou pou ranforsi bann striktir e mekanizm, pou fer bann lenstitisyon skoler vin otononm. Nou'n konmans bann aktivite konkret dan 11 lekol ki'n ganny swazir pou en proze pilot diran 2023.

Sa 11 lekol kot nou pe pilot sa proze, se Anse Boileau segonder, Beau Vallon segonder, English River, Perseverans segonder, Praslin segonder, Baie Lazare primer, Anse Aux Pins primer, Plaisance primer, Beau Vallon primer, Grand Anse Praslin primer e La Digue.

Nou pou kontinyen ek sa legzersis, pou amelyor kalite *internet* dan bann lenstitisyon, e aste bann lekipman *IT*, promouvwar lilizasyon *IT* dan bann letablisman skoler.

Nou pou aprofondi kapasite bann lenstitisyon pou met an plas en model ledikasyon baze lo valer ki a pli byen adres disiplin e disiplin dan bann letablisman skoler.

Nou pou revwar program skoler an zeneral; met lanfaz lo devlopman spor, lar ek kiltir. An menm tan ki nou entrodwi en program skoler, ki relevan pou konteks Sesel dan 21enm syek. Nou pou met en lanfaz spesyal. Sirtou dan sa bann domenn spesifik tel ki;- lanvironnman, tourizm, ledikasyon teknik e vokasyonnel, ledikasyon finansyel e lantreprenarya.

Nou pou entegre konsepsyon ledikasyon enkliziv dan program skoler.

Mr Speaker, nou rekonnèt ki ledikasyon i en domenn dinamik. Donk priyorite i kapab sanze nenport ler.

Prezan les mwan donn vitman Mr Speaker en pti leksplikasyon lo bann diferan sanzman e logmantasyon dan Bidze ledikasyon;

Par rapor avek 2022 Bidze Minister Ledikasyon, pour 2023 in ogmant par R356milyon499mil, ki reprezant en logmantasyon 38poursan.

Sa logmantasyon Mr Speaker, i zistifyab e i kapab ganny eksplike. I annan en logmantasyon R52milyon dan lapey e saler. Sa logmantasyon i reprezant lapey travayer *tech*;- Travayer *ANHRD* ki'n ganny abzorbe dan Minister Ledikasyon. E enklizyon trezyenm mwan saler dan sa Bidze, e osi sab 10poursan logmantasyon ki Gouvernman in anonse.

In osi annan en logmantasyon R267milyon dan *goods and services*, ki reflekte dabor bann nouvo pri marsandiz e komodite lo marse. E pli prensipalman sa se kou letid. Ledikasyon tersyer ki ti kot *ANHRD*. Kou ledikasyon tersyer Mr Speaker i osi enkli logmantasyon 10poursan dan

*stipend* bann etidyan dan 17 pei.

Touzour pou bann *goods and services*, in annan en logmantasyon R3.17milyon dan alokasyon lakaz pour bann etranze. Logmantasyon dan *goods and services*, in osi en rezilta logmantasyon dan kou *printing*, sa i R1.2milyon.

Logmantasyon dan pri elektrisite dan bann lenstitisyon skoler ki R1.9milyon. In annan provizyon R6.7milyon pou kontiny sa travay, amelyor *WiFi* dan lekol. Epi en sonm \*R399mil. *Sorry*, R399milyon in ganny mete dan Bidze dan sa lespri ankouraz plis diskisyon atraver seminar, konferans.

Par rapor a sa, i annan en logmantasyon R759mil pou kouver depans depasman bann dimoun Praslin e La Digue ki vin partisip dan bann sesyon lo Mahe. In osi annan provizyon R4.008milyon ki'n ganny fer pou aste lekipman *IT*, pou bann ansenyan e travayer Minister Ledikasyon.

An sa ki konsern kou transportasyon, nou'n osi remark en logmantasyon R3.4milyon pou kouver fre voyaz Minis e *PS* ki'n bouze, sorti *State House* pou vin dan bann Minister respektif. In osi annan en sonm R1.6milyon ki'n

ganny bidzete, si zanmen nou kontinyen avek nou proze fer vini ankor etranze pou konplimant sa mankman ansennyen.

Mr Speaker, i annan en logmantasyon R2.1milyon dan reparasyon e *maintenance* bann lenfrastruktir e letablisman skoler. Sa i enkli R1.5milyon pou mentenir bann letablisman, \*280milyon pou mentenir e ranplas *aircon*. Non 280mil plito pou mentenir e ranplas *aircon*, 201mil pou aranz lekipman lofis, prensipalman masin *photocopier*.

Mr Speaker, pou bann repa skoler in ogmante par R24milyon. Parmi i annan R17milyon provizyon pou *breakfast* dan primer e segonder, r6milyon pou logmantasyon pri ki nou pey *pam's catering* e provizyon trezyenm mwan saler bann travayer *Pam's Catering*.

Mr Speaker, i annan en logmantasyon dan kou *allowance* bann etidyan pos-segonder e etidyan ki lo *apprenticeship*. Sa sonm total pou pos-segonder in ogmante par R6.05milyon. E pou bann etidyan ki lo *apprenticeship*, sa in ogmante par R4.6milyon.

*Allowance* pou bann etidyan matir ki dan pos-

segonder in osi ogmante par en total R1.3milyon.

Mr Speaker logmantasyon dan Bidze Ledikasyon i osi reflekte peyman nou partisipasyon dan bann lasosyasyon enternasyonal e rezyonal ki'n aprezan desantralize. Alokasyon lofis ki bann travayer *ANHRD* pe okipe e servis *VIP* kot *Airport* ki'n osi aprezan desantralize e vin anba Minister respektif.

Gouvernman in fer en provizyon *Laptop Scheme* pou bann etidyan Seselwa depi *S1* ziska pos- segonder dan lekol Leta e lekol prive kot Gouvernman pou met R3mil lo zot kou depans.

Enn bann konplent mazer bann ansenyan e enstriker se resours. Minister Ledikasyon in pran sa komanter o serye. Pandan 2022, nou'n aste en bon pe resours ki ansenyan ti'n demande. Sa i osi enkli resours, sirtou pou bann zanfan ki annan bann bezwen spesyal.

Me i annan ankor bokou pou fer, spesyalman resours vizavi bann program teknik e vokasyonnel. Nou pou kontinyen pou nou demars pou aste bann resours ki neser pou fer ki laprantisaz i efektiv. E parey nou'n fer sa lannen, parfwa pandan lannen nou pou

bezwen reprioritiz nou priyorite pou ki nou kapab bouze, bouz devan avek plis efikasite.

Mankman ansennyman i osi reste en defi pou Minister Ledikasyon. Nou'n konmans en travay pou revwar lorganizasyon *timetable* ki a kapab anmenn en soulazman enportan dan nou demars kont sa mankman ansennyman.

Nou model lansennyman e laprantisaz i en model en gran pei. Mon konvenki ki nou kapab fer plis avek sa resours imen ki nou annan. Nou senpleman bezwen revwar nou model; Revwar deplwayman bann ansenyan e revwar la fason ki nou organiz *timetable* sa travay in deza konmans fer.

Mr Speaker, en lot demann enportan ki pe antre dan konversasyon konteks laprantisaz dan lekol, se bann ansennyman ki kapab ansenny dan en latmosfer enkliziv. E an menm tan bann asistan ki akonpany bann zanfan ki annan bann bezwen pli spesyalize.

Pandan 2023, nou pou plito fer bann legzersis pou re klasifye bann pos, pou reponn bann bezwen imedyat. Nou pou osi ranforsi omwen 2 lekol;- Plaisance segonder e Au Cap primer, pou akomod ledikasyon

enkliziv e byensir ranforsi nou program formasyon dan tou son splander. Donk Mr Speaker, pou nou dan ledikasyon tou sou, tou kas i konte.

E prezan Mr Speaker si - mon pa konnen si mon kapab kontinyen vitman - mon ti a pas lo bann alokasyon pou bann *non-financial asset* pou bann lenstitisyon, ouswa mon ti kapab aret la, pou nou kapab konmans enterakte?

**MR SPEAKER**

Mersi, ou pe ofer ki nou konmanse, enterakte. Nou a konmanse. Onorab, mon sipoze bann Manm i annan bann sif dan zot liv. Zot kapab fer referans avek sa ki ou'n dir.

Wi, Manm, nou a gard 2 kestyon par Manm silvouple, pou rezon letan. E apart Onorab Woodcock ki'n fer sir mon war son lanmen premye, leres in vin tou ansanm. Onorab Woodcock ou a konmanse.

**HON WAVEL WOODCOCK**

Mersi Mr Chair. Bonn apre midi Minis, ou delegasyon. Mon kestyon i baze lo - i tonm anba *PSIP* - anefe - mon bezwen felisit ou Minister pou sa bann proze anbisyé.

Sa gro alokasyon R377.8milyon, *foreign financing, local financing and foreign grant financing* pou bann diferan proze nouvo lekol, enkli renovasyon lo plizyer lekol ki lontan ti'n merit ganny fer.

Sa i enkli osi lekol Grand Anse Praslin, ki mon war en alokasyon R2milyon. Mon ti a kontan ganny en pe detay lo ki kalite travay ki pe al ganny antreprann?

Mon lot kestyon i, ou'n mansyonn lo *allowances* ki pou annan en ogmantasyon dan *allowances* pou bann etidyan. Mon ti a kontan ganny en pe plis detay pou bann, sirtou bann etidyan pos- segonder, *first, second, third year*. Mon konnen i annan osi en logmantasyon pou bann etidyan liniversite ki i demann en pe klarite si i posib kouver bann etidyan ki liniversite lokal osi.

Finalman Mr Speaker, mon pou...

**MR SPEAKER**

Ou'n demann 2 deza?

**HON WAVEL WOODCOCK**

Wi. *Bear with me* Mr Speaker. Sa, mon bezwen demande.

**MR SPEAKER**

Ou'n demann 2 deza, annou pran sa 2.

**HON WAVEL WOODCOCK**

Ok. Lo kote...

**MR SPEAKER**

Mon'n dir nou a pran sa 2 Onorab.

**HON WAVEL WOODCOCK**

Ok, ok. Mersi.

**MR SPEAKER**

Mersi. Mon pa oule ou donn move legzanp premye konmansman. Ok, Minis mon'n sezi keston lo renovasyon lekol kot Onorab e osi alokasyon pou etidyan liniversite. Minis ou reponn oubyen ou le endik ou *panel*? An tou ka zis si en manm *panel* i lev lanmen, mon a rekonnèt li.

**MINISTER JUSTIN VALENTIN**

Mersi Mr Speaker. Pou renovasyon lo sa bann keksoz ki'n ganny aprouve, Grand Anse Praslin segonder i annan en renovasyon lo lekol. E sa i pou en valer R2milyon.

An sa ki konsern alokasyon pou bann etidyan, zot *stipend* ki liniversite Sesel, sa logmantasyon osi in ganny aziste ansanm avek sa 17 pei ki kot nou annan bann etidyan pe *study*. Mersi Mr Speaker.

**MR SPEAKER**

Minis, i tre rar ki mon demann Minis pou *expand* aköz... Me selman si mon krwar in demande lo ki kalite renovasyon pou ganny fer. Korek Onorab? So silvouple si *panel* i kapab zis donn li en ti lendikasyon silvouple san ...

Tre byen. Lekl pou ... DG ki la? Yes, mersi.

**DG INSTITUTIONAL SUPPORT SERVICES DIVISION - BERNARD ARNEPHY**

Mersi Mr Chair. Bonn apre midi bann Manm. Sa renovasyon Onorab Woodcock, i pou lo 2 *block*. Sa 2 *block* o bor biro administrasyon ki'n an varye, avek sa *block* ki en pe par kote. So, nou pou al fer *major renovation* lo la. Mersi.

**MR SPEAKER**

Mersi. Wi Onorab, si ou annan lot klarifikasyon.

**HON WAVEL WOODCOCK**

Wi, ankor lo kote renovasyon. I annan sa nouvo blok ki'n ganny fer kot Grand Anse Praslin primer. Me ti annan en *issue* aköz zot it bezwen bouz bann zanfan lakres vitman, aköz Legliz *Anglican*, Lanmisyon ti pe demann zot *building*.

Prezan bann manrmay Grand Anse Praslin primer in bouz dan en blok ki sipoze primer e la zot ansanm lakres avek primer. Ti annan en proze ki ti'n ganny diskite pou fer lakres kot *ex-warehouse STC* i ete, zis o bor sa lekol Grand Anse Praslin primer. Mon kestyon i, eski sa proze i ankor anba konsiderasyon?

E osi angiz pou ede *save* en pe larzan pou bann zanfan ki al etidye *A-Level* Mahe, i annan en propozisyon ki bann paran in fer kot i konsern, si posib pou Minister Ledikasyon, ant en negosyasyon avek *Vijay International School*, ki bann marmay ki kalifye pou *A-Level*, olye vin Mahe, ki kout Minister Ledikasyon en gro sonm larzan, si zot ti kapab, sa marmay olye mont Mahe, vin etidye kot lekol *Vijay International School* *instead?* Mersi.

**MR SPEAKER**

Mersi. 2 klarifikasyon. Enn lo renovasyon e enn lo alokasyon ankor.

**MINISTER JUSTIN VALENTIN**

Mersi Mr Speaker. Mersi Onorab pou ou kestyon. Onorab sa proze lakres kot *ex-STC* ki nou pe koze, pou le moman i pa dan plan. Me selman, i pa dan plan imedya,

me selman sa konversasyon pou kontinyen fer sa lakres i ankor la. Akoz i annan, nou war osi i annan presyon lakres Anse Kerlan.

An sa ki konsern... (Non *A-Level*.) Ou'n koz lo sa group etidyan *A-Level*. Sa i en keksoz ki depi ler mon'n vini mon, mon'n konmans koz lo la. Kot pou gete ki mannyer nou kapab, serten bann pos-segonder reste Praslin ouswa La Digue i vin Praslin.

Sa ki enteresan dan sa demars letan nou pe fer, bann etidyan ou war zot, zot reste silans lo la. E ler ou demann zot plis, i paret zot kontan pou bouze pou vin Mahe. Sa bann etidyan.

Wi bann paran ti a voudre zot zanfan kot zot. Me pou le moman, non nou pa ankor konmanse ofisyelman, en demars pou nou koz avek *Vijay International* - zisteman akoz nou osi pou pran osi...Nou pe ekout osi nide bann etidyan par rapor a sa sizesyon. Mersi Mr Speaker.

**MR SPEAKER**

Mersi. Bon nou a reste lo nou bann zil. Onorab Uranie.

**HON ROCKY URANIE**

Mersi Mr Chair. Bonn apre midi Minis avek ou delegasyon.



Minis i annan sa alokasyon 31milyon pou nouvo konstriksyon lekòl La Digue. Mon ti a kontan ganny en lesplikasyon egzaktaman ki faz ki zot pe al konmans e kote zot pou konmans fer li?

Apre an relasyon avek bann etidyan pos-segonder. Bokou paran in apros mwan, zot pe gete si zot bann zanfan, si sa Bidze pe fer alokasyon pou bann zanfan ganny en logmantasyon dan zot *allowance*? Akoz zot sibir bokou avek pri lavi? Mersi.

**MR SPEAKER**

Mersi. Minis, 2 keston la.

**MINISTER JUSTIN VALENTIN**

Mersi Mr Speaker. Mersi Onorab pou ou keston. Onorab pou konstriksyon lekòl La Digue, parey ou'n kapab vwar, semenn pase ti annan en delegasyon ki zisteman ti mont La Digue pou konkretiz sa demars ki nou pe fer, pour fer en nouvo lekòl pou La Digue.

I annan sa R31milyon byensir ki'n mete pour konmansman sa proze. E si tou keksoz i mars byen pandan sa prosen mwan ki pe vini, nou pou ganny en pe plis konkret lo ki mannyer sa pou ganny fer. E lekel egzaktaman ki pou *sponsor* e ki mannyer sa travay

pou demare. So la pou le moman, nou napa en plan final lo ki mannyer sa travay pou demare.

Me an sa ki konsern bann etidyan pos-segonder lo zot *allowance*, sa ki nou kapab dir a sa pwen se ki Gouvernman i osi donn en tiket. I donn en tiket bann etidyan, omwen 1 tiket tou le mwan pou zot vwayaze. E par rapor a kou lavi, bann etidyan Praslin, La Digue ki isi lo Mahe, zot...

Nou rekonnèt, nou rekonnèt ki wi i annan serten mouvman dan pri lavi, me selman pou le moman noupanse ki sa alokasyon ki zot gannye i zistifye e i kapab satisfè zot bann bezwen imedyat ki zot bezwen. Mersi Mr Speaker.

**MR SPEAKER**

Mersi. Wi, ale vit ek klarifikasyon Onorab.

**HON ROCKY URANIE**

Mersi Minis pou ou lesplikasyon, me selman mon ti a kontan petet ler keksoz i demare La Digue, *MNA* i ganny met okouran osi ki pe pase lo sa proze.

An sa ki konsern bann zanfan pos-segonder, ti a bon petet Minis oubyen ek en komite, ou rezwenn zot byen

pou zot kekfwa asize met vreman zot konsern devan. Akoz zot in met plizyer konsern atraver mwan. Ti annan konsern ki zot ti mete atraver komite NYSCC.

So petet ti a bon ou re al kot zot, eksplik zot serten keksoz pou vwar pou eksplike ki direksyon zot pe ale, pou ki sa bann zanfan i a santi zot rekonforte. Mersi.

### **MR SPEAKER**

Mersi. Mon asire Minis in pran note tou lede rekomandasyon. Mon a pas lo kestyon Onorab Samynadin.

### **HON KELLY SAMYNADIN**

Mersi Mr Chair. Bonn apre midi PS e delegasyon. Mon premye konsern i baze lo zot *current challenges* kot zot pe rankontre difikilte avek lenplimantasyon nouvo model *special needs*, (*SEND*). E la mon'n tann Minis dir ki zot pe al entegre ledikasyon enkliziv dan sistenm skoler.

An vi ki lekol Au Cap i lenstitisyon ki'n ganny swazir pou sa proze pilot pou ledikasyon enkliziv, mon ti a kontan konnen kan ki Minister pe mazin konmans met sa proze dan faz enplimantasyon? Kwa ki pe ganny fer pou bann ansennyan an term

lankadremman, rekritman e sipor?

E osi kwa ki pe ganny fer pou adres bann *issues* enfrastruktir ki deza *ongoing*, pli presizeman sa sityasyon sa bann *power outlets* ki'n okazyonn serten pti lensidan dife kot sa lekol? Mersi.

### **MR SPEAKER**

Mersi. Minis.

### **MINISTER JUSTIN VALENTIN**

Mersi Onorab pou ou kestyon. Onorab an sa ki konsern ledikasyon enkliziv, sa i en keksoz ki - Annefe nou'n deza dan en faz vreman avanse.

E zisteman apre ki ou ti anmenn sa Mosyon dan Lasanble en pe pli boner sa lannen, Minister Ledikasyon nou'n pran sa tre serye. Akoz lefe ki ler nou'n ganny laprouvasyon tou bann Manm Onorab, in donn nou sa lafors politik deryer nou demars.

Donk i deza, ki nou annan la deza an plas? Nou annan nou en - sa ki nou apel en *working group* spesifikman pou *inclusive education*. E sa *working group* pe travay pour

(1), revwar sa Polisi enkliziv e dezyenm se li ki pe *lead* sa devlopman.

Annefe nou ki nou pe fer la pou le moman, annefe sa group

ki zwenn, i zwenn tou le Vandredi e zot fek fini zwenn ozordi la. Sa group i zisteman, i pe fer ki nou fer nou plandaksyon - nou plandaksyon. E si tou keksoz i mars parey nou anvi, sa plandaksyon pou konmans met an plas apartir Zanvye.

Me an atandan, byensir an atandan i annan bann keksoz ki pe ganny fer. Par egzanp bann *head teachers*, sa 2 *headteachers* an kestyon, i lo Komite, zot pe angaze dan zot menm, zot fer bann odit kot zot lekol. Ki bann keksoz ki annan pou fer. Akoz nou anvizaze pran sa byen o serye e fer ki ler nou konmanse an Zanvye, nou konmans li byen.

Wi, ou'n koz lo bann probleminm elektrik ki'n annan. Sa travay i ti'n fini ganny *tender* e ti annan en lakonpanyen ki ti'n deza gannyen. Me selman in ariv en maler dan sa lakonpanyen, ki prezan pe anpes...

Maler i vedir, mon krwar enn zot *Director* in kit nou, e zot in bezwen prezan - Zot pe ganny en pe difikilte pou zot kapab bouze avek sa proze. Me *SIA*, *the new agency* la i okouran sa demars. E zot pe *monitor* ki pe arive pou nou kapab tre byento pran en desizyon pou nou

kapab bouze. Mersi Mr Speaker.

### **MR SPEAKER**

Mersi. Mon apel Onorab Ernesta. Son kestyon?

### **HON PAUL ERNESTA**

Mersi Mr Chair. Minis ek ou delegasyon, bann koleg Onorab e tou dimoun a lekout, bonn apre midi.

Mr Chair mon kestyon i annan pou fer lo program 3, ki annan pou fer lo letan nou pe koz lo *long service allowance* pou nou bann *teachers*. Letan mon'n get program 3 sirtou lo bann lekol, mon'n vwar - mon pou obzerv si oule, en pe rediksyon dan sa laliny.

Mon kestyon, i annan bann dimoun, bann *teachers* ki letan zot letan ti *due* 2an pase, me zot pa'n kapab gannyen. Eski avek sa rediksyon zot pou kapab *entertain* sa bann ansennyan? I annan ansennyan osi bann *supply teachers as well*. E an menm tan kontinyen avek lezot program pou asiste bann lezot dimoun?

Apre petet ti a kontan konnen, konbyen an tou bann ansennyan pou a pe benefisyen anba sa program? Mersi Mr Chair.

**MR SPEAKER**

Mersi. Minis ou'n endik DG oubyen Ms Tamatave?

**MINISTER DR JUSTIN VALENTIN**

Mersi Mr Speaker. Mersi Onorab pou ou kestasyon. Mon ti a les tim Finans reponn kestasyon vizavi *long service allowance*, e please.

**MR SPEAKER**

Mersi. Ms Tamatave.

**COMPTROLLER GENERAL ASTRIDE TAMATAVE**

Mersi Mr Chair, mersi Onorab pou ou kestasyon. Onorab *long service allowance* i en Polisi Gouvernman ki depi 2021 parey nou tou nou okouran, tou travayer Gouvernman pa pe ganny okenn *long service allowance*, *increase in long service allowance*. E sa i aplikab pou bann *teachers as well*.

So, tou bann ki ti *due*, natirelman napa provizyon pou zot. Mersi Mr Chair.

**MR SPEAKER**

*Thank you*. Onorab Monthy.

**HON PHILIP MONTHY**

Mersi Mr Chair. Bonn apre midi Minis ek ou delegasyon. Minis dan dernyen *bullet point* pou *strategic priorities*, ou'n dir ki ou

pou *'ensure access to training to meet the countries human resource needs*. ‘

E nou konnen ki nou annan en gran konstrent resours imen dan pei, e ki la ANHRD i tonm anba Minister Lanplwa, ki bann sinerzi ki pe annan ant ou Minister ek Minister Lanplwa pou kapab al dan sa direksyon pou satisfè demann resours imen dan pei? Mersi.

**MR SPEAKER**

Mersi. Minis.

**MINISTER JUSTIN VALENTIN**

Mersi Mr Speaker. Mersi Onorab pou ou kestasyon. Onorab sa, parey nou ti pe dir, letan ki ANHRD ti dizourd, ti annan en brans ki ti al kot Ledikasyon. Sa brans ki konsern *scholarship* administrasyon. E sa lot bout ki konsern resours imen, li in al kot Minister Lanplwa.

E an sa ki konsern sinerzi; Minister Ledikasyon i ganny reprezante lo sa group ki ozordi pe zisteman travay pou fer sa *manpower plan*. E nou dan sa nouvo divizyon kot ANHRD i ete, nou prodwi lenformasyon lo *careers* osi - bann lentere, bann demann bann etidyan ki pe vini.

E zisteman nou osi prepar bann etidyan, pou zot konpran bann dinamiz ki annan deor dan lemonn travay, pou zot kapab konpran pli byen, ki manner pou zot swazir zot karyer a lavenir.

Donk sa travay pou develop en plan resours imen, i konmans byen boner. Pou nou i konmans byen boner, aköz nou pe konmans li apartir lekol segonder. I annan dimoun ki pe dir nou koumsa, anmenn li menm dan lekol primer - *careers guidance*. Be selman pa tou dimoun ki konvenki ki nou bezwen anmenn li ziska anba laba. Me apartir S4, i en bon landrwa pou sa konmanse.

Donk i annan bon lenerzi e bon sinerzi ant sa 2 Minister pou donn Sesel en bon *manpower plan*. Mersi Mr Speaker.

### **MR SPEAKER**

Mersi Minis. Onorab Gabriel, ou kestyon.

### **HON CONRAD GABRIEL**

Mersi Mr Chair. *Welcome* Minis ek ou delegasyon. Bonn apre midi tou dimoun a lekout. *Minister*, premyerman en Bidze R1.2bilyon en, mon pe regarde pou lekol Pointe Larue an partikilye, segonder - zis ou a dir nou ki zot annan pou

*refurnish*, *maintenance* renovasyon?

An vi ki i annan sa sityasyon kot marmay i pran bis an deor lekol. Nou pe gete ki sityasyon Minister, ki pou fer dan sa demars? Aköz i annan de zour nou kapab ganny en aksidan en pe grav. Sa i mon premye pwen.

Dezyenm pwen i konsernan, lekol primer;- vi ki i annan lekol, kantite marmay pe ogmante, mon krwar ou'n pase ou'n war zot *snack shop*. Mon krwar i en pti pe tro *tight*.

Mon krwar i demann en renovasyon i osi or sanzman lokasyon. Si ou kapab *update* nou petet si dan sa Bidze, zot in fer okenn provizyon pour aranz en pe sa sityasyon? Mersi.

### **MR SPEAKER**

Mersi. *Panel*, 2 kestyon lo lekol Pointe Larue.

### **MINISTER JUSTIN VALENTIN**

Mersi Mr Speaker. Mersi Onorab pou ou kestyon. Parey ou pou gete dan Bidze pou sa lannen. Pou sa lannen ki pe vini - pardon. Pou sa lannen ki pe vini 2023, napa bann travay, napa bann alokasyon signifikan pou lekol Pointe Larue.

Me selman sa ki nou toultan dir, lekol li i osi annan

li en Bidze ki annan pou kapab fer serten keksoz, serten travay.

Wi ler nou ti pas kot lekòl nou ti osi pas kot *tuck shop* e sa 2 dimoun dan *tuck shop* ti eksplik nou zot bezwen. E mesaz ki nou ti dir zot koumsa, pou le moman, letan nou get kot lekòl pou le moman nou, nou pa war en plas pou donn zot.

Me selman ki nou kapab fer, nou kapab konmans idantifye en lokasyon kot lekòl. E byensir ler sa landrwa i a vann ganny idantifye, i ava annan bann proze ki a ganny fer e la i ava ganny bidzete an konsekans.

Me selman la parey la, pou le moman nou napa pou lannen 2023 dan sa *non-financial asset*. Me sa ki mon tim pe les mon konnen wi. E sa lannen 2022 in annan keksoz dan pou Pointe Larue 2022.

E *DG Institutional Support* i annan serten leksplikasyon ki kapab donnen lo la. Mersi Mr Speaker.

### **MR SPEAKER**

Mersi. *DG* ou ava azoute?

### **DG INSTITUTIONAL SUPPORT SERVICES DIVISION - BERNARD ARNEPHY**

Mersi Mr Chair. Onorab pou sa lannen ler nou ti'n fer nou

*forecast* ansanm avek *SIA*, nou ti vwar poudir i annan serten larzan ki nou pa ti pe depanse, akòz zisteman avek serten retar dan serten proze kapital.

E serten sa bann larzan ki ti pou dan *loan*, ti ganny transfer dan *local component*. E Pointe Larue segonder ti enn bann lekòl ki nou ti met vitman priyorite. E anba la nou ti anvi fer reparasyon mazer lo serten laboratwar ek zot *technical block*, enkli refer zot sistenm elektrik.

Pou lenformasyon se ki sa proze in fini ganny anvoy kot *Tender Board*. Me nou problemm aprezan se ki nou pe negosye avek Minister Finans pou ki sa larzan i kapab ganny met dan en *Suspense Account*. E mon'n ganny enformen par *project officer* kot *SIA*, ki proze in fini pas lo staz evalyasyon.

*So, once the approval is given then the project will kick-start.* Savedir nou annan serten travay ase konsekan pou fer kot lekòl Pointe Larue segonder. I pou tou depan lo Minister Finans si zot dakor pou zot gard sa larzan dan sa *Suspense Account* kot nou kapab konmans sa travay. I pou *spillover* dan lannen 2023. Mersi bokou Mr Chair.

### **MR SPEAKER**

Mersi. Wi, klarifikasyon Onorab.

**HON CONRAD GABRIEL**

Yes, Mr Chair. Zis petet Minis sa pti bout kot marmay i pran bis. Sanz en pe son lokasyon. En *point of time* ti dir pou antre anndan dan baro pou zot kapab ganny akse ek bis, akoz i deor lo semen. So, *it's very inconvenient*. Mersi.

**MR SPEAKER**

Mersi. Minis in note. Si ou anv donn en pti mo lo la.

**MINISTER JUSTIN VALENTIN**

Non. Wi mon'n note. Ou pe koz la lekòl segonder - Pointe Larue segonder? Wi, pou le moman, personnelman la mon napa sa lenformasyon, sa problemn pa dan...Mon napa sa problemn la dan mon lanmen. Nou ava etidye sa. Nou ava gete ki nou kapab fer.

**MR SPEAKER**

Thank you Minis. Onorab Henrie.

**HON GERVAIS HENRIE**

Mersi Mr Chair. Bonn apre midi tou dimoun. Mon pran la parol ozordi akoz mon le ki *panel* i koz spesifikman avek bann dimoun Mont Buxton lo bann proze lekòl La Rosière.

So, anba *non-financial assets*, mon'n vwar i annan 4 eleman ki konsern lekòl La Rosière. Dabor i annan konstriksyon *new block*, i annan *renovation old block*, i osi annan en konponan pou La Rosière at Belonie secondary.

E finalman anba *Early Childhood Care Education*, i annan La Rosière *Crèche*, *Crèche English River*. So, 4 konponan. Dir avek bann dimoun Mont Buxton ki si sa ki Minister pe organize pou zot dan Bidze 2023? Mersi.

**MR SPEAKER**

Mersi. Minis?

**MINISTER JUSTIN VALENTIN**

Mersi Mr Speaker, mersi Onorab pou ou kestyon. Onorab mon pou koz, donn sa leksplikasyon an zeneral ki pe arive. E apre i annan bann detay ki mon pou les *DG* pou *Institutional Support*, pou kapab donnen.

Dabor parey nou'n deza vin dir la dan Lasanble, ki nou anv ki lekòl La Rosière i ganny son lekòl e bann zanfan ki en pe partou, partou eparpiye, i retourn kot lekòl La Rosière. Me sa pa pou kapab ganny fer en sel kou. I bezwen fer an faz.

Me en lot keksoz enportan ki mon anv dir a sa pwen.

Mwan mon pa tro kontan, aköz ou konnen in annan en kantite keksoz ki'n arive ant lekol, avek lekol La Rosière. En ta promes ki'n arive dan le pase.

E mon'n santi mwan toultan en pe enkonfortab letan mon pa ancor ganny en lasirans pou mwan ale devan, pou al fer bann prononsman avek bann paran.

Alor mon'n les plito bann keksoz arive e apre - nou annan nou plan, me selman ou les li konmans arive apre ou konmans dir.

Par egzanp la, in annan bann travay ki'n konmans arive lo sa vye *block*. E lefe ki sa pe konmans arive la, i donn nou sa sinyal ki pou pare parey nou'n dir - si tou keksoz i mars byen - i ava pare lafen premye term. E kot la nou kapab akey en group etidyan. E sa group etidyan ki nou pe mazin akey zot la, i ava etidyan P1 e P2.

Apre byensir, nou annan en sonm larzan ki'n ganny mete, pou konmans konstrir sa nouvo blok lo sa lespas par anba. E sa i osi letan i a vann ganny konmans fer. Bann demars pe fer. Me letan i a vann konmanse, nou pou dan en pli bon pozisyon pou vin kot bann paran, pou dir zot egzakteman ki pe arive.

Me la pou le moman an Zanvye letan nou pou konmanse, nou pou kontinyen pratikman ek preski menm laranzman ki annan la konmela. Kot bann zanfan ki Belonie, i reste Belonie. E i pou annan en mouvman aköz i annan bann zanfan ki Mont Fleuri, i P3-P4 - P3-P4 i Mont Fleuri... Non, zot kontinyen al Mont Fleuri.

So, nou pou kontinyen ek sa laranzman parey i ete la. Me ler dezyenm term i arive, la ki bann mouvman, nou pou kapab eksplik byen bann mouvman ki pou arive.

Donk ki mon anvi dir avek bann dimoun La Rosière a sa pwen, manm Mont Buxton, La Rosière, sa pwen se ki demars pou annan en lekol i la e pe progresse.

E bann dimoun Mont Buxton ki annan zanfan ki pou al dan lekol Belonie, nou kapab dir zot la a sa pwen ki an Zanvye zot bann etidyan - bann zanfan pou sorti lekol Bel Ombre. Bel Ombre pou nepli en lekol Belonie. E Belonie, tou sa bann zanfan ki Bel Ombre, dapre nou kalkilasyon ki nou pe fer, pou kapab antre dan sa nouvo lespas ki'n pratikman preski fini fer. Dakor.

Mr Speaker prezan mon ava pas laparol avek *DG* pou



*Institutional Support* pou li petet donn bann detay teknik lo bann diferan renovasyon, sirtou lo lakres. Mersi.

**MR SPEAKER**

Mersi. Tre byen. *DG*, la parol in pas kot ou.

**DG INSTITUTIONAL SUPPORT SERVICES DIVISION - BERNARD ARNEPHY**

Mersi Mr Chair. Mr Chair parey Minister in eksplike, ti nou lentansyon ki konmansman Zanbye lannen prosenn, *at least* en group marmay ki deza kot lekol Belonie la - marmay La Rosière ti pou bouz anba kot lekol, *existing* lekol La Rosiere i ete, an vi ki serten travay renovasyon mazer ti'n ganny *planned*.

Me an konsiltasyon avek *SIA*, zot in war pou dir ti annan serten *further assessment geotechnical* ki'n bezwen ganny fer e sa in met serten retar. Me la fason ki nou'n organize, parey Minister in dir, nou'n *plan* ki, vi ki sa nouvo *block* lekol Belonie in fini pare, i annan serten pti azisteman ki nou bezwen fer avek, so lannen prosenn bann zanfan lekol Belonie ki pe al Bel Ombre, zot pou retourn kot lekol Belonie. Si tou keksoz i mars byen, i nou target ki zot retournen.

Bann zanfan ki kot lekol Belonie *existing*, marmay La Rosière, zot pou kontinyen reste kot sa lekol la. E ler nou'n get popilasyon, i pou kapab *accommodate*. E bann marmay P3-P4 ki ti sipoze lekol La Rosière zot, zot pou al kot lekol Mont Fleuri.

So, *SIA* in donn nou garanti ki travay i dan en staz byen avanse. So, parey nou pe dir, i annan 10milyon pou re konstruksyon nouvo lekol, so ki'n ganny prozekte pou 2023. E si tou keksoz i al byen, *SIA* in dir ek nou pou dir sa proze pou ganny *tender* pou premye *quarter 2023 – 2<sup>nd</sup> quarter 2023*, e i pou pran apepre 12mwan akoz sa lespas i deza kler kot sa lekol i pou ganny fer, so travay i pou fer dan en fason vit.

So, kot zanfan i pou kapab ganny *at least 2024*, dezyenm *quarter 2024*, bann zanfan i kapab *move* dan zot nouvo lekol. Primer. E kot primer swa i retourn... So sa i en desizyon ki nou ava fer ansanm avek kominote, *whether* tou sa zanfan La Rosière i reste anler, ouswa zot retourn dan zot nouvo *block* anba.

So, sa i bann diskisyon ki nou a kapab ganny fer. Me selman nou lo *target* ki larzan ki pe ganny bidzete pou *the renovation of the existing block*

at La Rosière, i pou *kick-start early next year*.

So, vwala bann lenformasyon ki nou'n gannyen an konsiltasyon avek SIA, ki pe asiste Minister Ledikasyon pou revwar *the concept of La Rosière new school* ek La Rosière *existing facilities*. E ki mannyer nou kapab *amalgamate bann facilities* pou ki zanfan i ganny sa pli bon servis posibil. Mersi Mr Chair.

### **MR SPEAKER**

Mersi DG. Onorab Cosgrow.

### **HON WALLACE COSGROW**

Mersi Mr Chair. Bonn apre midi tou dimoun. Mr Chair, apre midi la mon kestyon i santre lo 2 keksoz spesifik. Premye i konsern re nimerasyon pou bann travayer dan ledikasyon an zeneral.

Mon premye i lo *teacher assistants*, en? Bokou fwa mon zwenn ek bann dimoun ki *teacher assistants* e zot konplent en kantite zot saler, en. Mon war i annan bokou logmantasyon dan Bidze an sa ki konsern saler, *wages and salaries* li menm.

So, Minis eski ou kapab dir nou si annan okenn logmantasyon pour *teacher assistants* dan sa Bidze or si zot pe *plan* pou revwar saler

*teacher assistants* apard sa 10poursan *increase* dan Bidze an zeneral?

Dezyenm i lo, konmsi menm kestyon, selman dezyenm konsern i lo sa *long service allowance* aköz mon krwar i pa'n ganny ase eksplike. Mon a donn ou en legzanp, par egzanp ou annan ou 2 dimoun ki ti lo petet - enn ki lo 5an apre enn ki lo 10an servis.

So petet sa enn ki lo 5an in fini ganny son R500, sa enn ki lo 10an in ganny son R500, me selman in akimil son 10an apre ki zot in met sa *moratorium* en pe lo *long service allowance*. Selman zot pe fer menm louvraz. I 2 diferan larzan, menm louvraz.

Kan mannyer ou aziste sa bann dimoun ki enn, aköz sa Polisi ki zot in vin avek, i pa war li dezavantaze konpare avek sa lot? Zot in fer menm zafer, zis en pti letan diferans an term tann servis ki prezan i pa pe ganny sa dezyenm R500, ou konpran mwan?

So, kan mannyer zot aziste, si zot pou al aziste zot, sa bann dimoun lo *grid*, pou ki zot a kapab *at least* sa ki pe fer menm louvraz, ganny menm saler? Yer PS Baker ti koz lo *equal remuneration for equal work* ki ganny fer. Sa i mon premye kestyon.

Mon dezyenm kestyon i an sa ki konsern sa ki ou'n koz lo la, an term sa transformasyon dan ledikasyon. Annefe dan mon repons Bidze, mon ti koz lo nesosite pou transform ledikasyon Sesel pou *meet* bann bezwen ki 5an, 10an menm 15an le fitir.

So ler ou'n dir zot pe al fer sa bann transformasyon, par egzanp *entrepreneurship*, par egzanp lanvironnman, *tourism* e tou. Zot pe al konmanse la, ouswa i annan bann keksoz konkret - zot in fini konmans devlop *curriculum*. Zot in fini konmans devlop bann striktir, ki mannyer sa pou ganny aplike dan lekol, e nou pe al konmans li 2023? Ouswa nou pe al konmans prepare?

Sa mon ti ava kontan konnen Minis an sa ki konsern sa 2 pwen. Si i annan okenn siplemanter mon ava antre Mr Speaker. Mersi.

### **MR SPEAKER**

Mersi. Minis ou repons.

### **MINISTER JUSTIN VALENTIN**

Mersi Mr Speaker. Annefe i annan 3 pwen. Premye pwen i koz lo bann *teacher assistant*. Pou le moman, Mr Speaker, apart ki sa 10poursan - 10poursan ki zeneral logmantasyon, nou pa'n fer

provizyon pou ogmant saler bann *teacher assistant*. Me touzour nou pran kont ki letan pei pou re donn nou sa *go ahead* pou nou re konmans re vwar bann diferan *Scheme*, tousala i ava ganny pran an konsiderasyon.

An sa ki konsern *long service allowance*, *long service payment* ki Onorab pe avanse, Mr Speaker, mwan mon krwar sa i pa en deba ki Minister Ledikasyon i kapab antre ladan li tousel. Akoz sa i en konversasyon byensir ki pou pran kont Minister Lanplwa, *PSB*, Minister Finans li menm.

E byensir, nou letan sa diskisyon i konmanse, koman en Minister ki annan travayer *long service*, nou pou anvi la, akoz parey en bann legzanp ki ou pe donner, nou kapab ilistre sa bann legzanp, pou nou kapab zistifye bann largiman kot nou panse i zistifyab.

An sa ki konsern transformasyon dan ledikasyon - Mr Speaker, i annan keksoz ki'n ganny fer. I annan ki pe ganny fer, e i annan ki pou ganny fer. Par egzanp, sa nide vokasyonnel. Nou annan en plan vokasyonnel ki nou'n fini fer, ki nou annan pou met li an pratik.

Nou annan plan ledikasyon finansyel. I annan

en travay ki lo en vreman nivo avanse, e kot la a ler aktyel, bann dimoun pe gete ki manner nou pou enkli li dan bann size. Akoz i annan 2 model - en model i debout li tousel, ouwa i en model ki i enkli dan bann size.

Zis parey pou tourizm e lanvironnman. Lanvironnman li dan en faz avanse. I annan bann laklas ki'n deza pe konmans antreprann bann *curriculum* lo lanvironnman. Me ankore nou pou gete kot napa, nou pou gete si nou pou fer li en model li tousel, ouwa en model kot i entegre dan bann size.

Donk, serten sa bann nouvo program ki nou anvizaze fer, i annan ki'n deza konmans e i annan ki dan faz konseptyalizasyon ki ... Ler mon dir nou pou konmans byensir, akoz sa i pou en nouvo lannen. Lannen prosen letan nou demare, nou konmans avek nou plan pou re moderniz program skoler. Mersi Mr Speaker.

### **MR SPEAKER**

Mersi. Wi, ou klarifikasyon Onorab?

### **HON WALLACE COSGROW**

Yes, Mr Chair. Mersi pou klarifikasyon. Zis mon ti a kontan *press* avek Minister

Finans pour kapab donn nou sa lenforma ... Akoz dan Minister Ledikasyon i annan en *significant amount of staff*, sirtou *teachers* ki annan sa *issue long service allowance*, mon ti a kontan *press* Minister Finans si zot kapab donn nou sa lenformasyon, lo ki kantite sa bann dimoun, ki petet pa pe benefisye *or* ki pa'n benefisye ki nou pou bezwen war en fason ki manner nou pou aranz zot lo *grid*?

Akoz nou konnen i annan en kantite petet ki la, petet pe al *retire* e si nou kapab konnen osi konbyen ki pe al *retire* ki pou petet perdi, akoz zot pa'n ganny sa *long service allowance* aziste? So nou ti a kontan konnen.

E apre si Mr Chair i kapab zis *indulge* en pti pe mon sa ... Si Minis i kapab dir nou son pozisyon lo trezyenm mwan saler, si zot pare pou donn *maximum, full* trezyenm mwan saler pou tou bann *teachers*? mersi.

### **MR SPEAKER**

Pozisyon lo trezyenm mwan saler in ganny eksplike plizyer fwa. Minister Finans in deza eksprim pozisyon lo *long service allowance*. Ler zot annan plis lenformasyon, mon ava envit Minister Finans pou kominik

avek Manm e Lasanble. Nou a pas lo kestyon Onorab Arissol.

**HON SANDY ARISSOL**

Mersi Mr Chair.

*(Off-Mic)*

**MR SPEAKER**

Ou kestyon in ganny reponn. Minister Finans in deza adrese. Minister Finans in deza adrese. Nou a kontinyen. Onorab.

**HON SANDY ARISSOL**

Mersi Mr Chair. Minister Finans plizyer fwa Ms Tamatave in eksplike sa ...

**MR SPEAKER**

Mersi, Onorab Arissol, ou kestyon.

**HON SANDY ARISSOL**

... e toultan i repet ankor. Mon ti a kontan dir letan Gouvernman pe fer le nesese pou ki i aziste bann *allowances*, ek bann saler bann ansennyan ki nou pe koz lo la, zisteman anba Ledikasyon, i enportan osi pou nou revwar bann *school councillors* la. Pou nou konnen ki vreman zot fer dan bann lekòl? Akòz zot la? Lekòl zot? Konbyen fwa zot zwenn?

Mon krwar sa osi i enportan dan sa bann revizyon ki nou pe fer. Pou nou balans

tousala. Pou nou ganny sa bann larzan pou nou asiste, zisteman bann *teachers* ki nou pe koz lo la.

De pti kestyon Mr Speaker, mon kontan ki mon'n vwar dan Bidze i annan en pti larzan *maintenance* pou lekòl Beau Vallon avek lekòl Bel Ombre ki tonm dan mon distrik - byen apresye sa.

Mon premye kestyon ki mon ti a kontan demande, *stipend* pou bann etidyan. Mon'n tann Minis ou'n koz lo 17 pei. Eski logmantasyon pou *stipend* i pou vèdir pou tou etidyan Seselwa ki pe lekòl aletranze, ki Minister Ledikasyon in anvoy zot, prenon kont si i fek monte?

Si i annan 2an i laba, si 3an i laba parske i annan en pe konsern avek sa. Si pou annan preferans dan lekòl ki gannyan lo la kantite letan oubyen ki pei zot ladan. Mon ti a kontan en klarifikasyon lo la.

Mon dezyenm e mon dernyen kestyon e ki en pe trakas mwan, i annan sa *Charlie, Charlie* la ki'n ariv kot lekòl Anse Boileau. Mon ti a kontan demann Minister Ledikasyon, sa zwe ki bann zanfan pe zwe la, ki pe anvoy ater la, kreyon lo en bout papye.

Parske i annan en sirkiler ki'n sorti kot Minister

Ledikasyon, in ariv kot bann paran Anse Boileau. E mwan koman en paran ki annan zanfan dan lekol primer, mon konsernen avek sa.

Parske mon ti a kontan konnen ki zot pe fer an relasyon pou nou edik nou bann zanfan, pou nou edik bann ansenyan, pou nou edik bann paran, an relasyon avek zwe sorselri ki pe antre dan lekol Leta? Mersi bokou.

**MR SPEAKER**

Mersi. Minis ou annan 2 kestyon la.

**MINISTER JUSTIN VALENTIN**

Mersi Mr Speaker. Mersi Onorab pou ou kestyon. Mr Speaker, an sa ki konsern ... Ou konnen, mon anv i a sa pwen pou reasir bann Manm Lasanble ek tou, e osi reasir bann ansenyan, bann travayer Minister Ledikasyon, si dan sa peryod letan ki zot in travay dan Minister Ledikasyon, i annan en group dimoun ki pli konpran zot, i sa group dimoun la, la konmela.

Nou konpran zot, nou avek zot, nou partisip avek zot. E mwan koman Minis dan sa Minister, mwan an vi ki bann travayer - mon dir sa senser, en.

Mon anv i ki bann travayer Ledikasyon i kontan zot profesyon. I kontan sa landrwa kot zot pe travay e letan in arive zot ganny byen re renimere. So pa doute ki sa group dimoun ki pe *lead* Ledikasyon la, pa pran zot lentere dan tou konteks. Alor ...

E se pou se la ki zot pou war tanzantan i annan bann keksoz ki nou pe fer avek bann ansenyan. Nou pe fer avek bann diferan group.

La par egzanz Mr Speaker, 2 semenn pase nou'n pran 16 *school counsellors*, nou'n pou premye fwa, 16 *group counsellors* pe ganny en formasyon bi *bachelor level, psychology with counselling*. Ki pou fer ki zot konpran byen zot profesyon.

E sa o fir amezir - o fir amezir nou progresse fir amezir, mwayen i gannyen. Bann lezot group dan Minister Ledikasyon pou benefisyé.

An sa ki konsern *stipend*. Ler Gouvernman dizon i mont *stipend* pou bann etidyan byensir, nou pa gete kan ou'n vini. *Stipend* i ganny monte e si i ganny monte pandan sa lannen, ou premye lannen, ou premye zour, sa nouvo *stipend* i ganny aplike pou sa bann etidyan.

E pli tar petet, akoz sa legzersis ogmant *stipend* ti en legzersis ki, wi Minister Ledikasyon, e ANHRD sa lepok, e osi byen Minister Finans ti fer ansanm. E Minister Finans petet i kapab donn en detay lo ki bann *formula* zot servi pou ariv lo sa valer.

Me selman nou ti fer sir ki nou pa kit okenn etidyan deryer. Nou pa kit okenn pei deryer. Me selman byensir, dinamiz dan pei - dan en pei i sanze tanzantan. E nou, nou pe *monitor* sa nou osi. Nou pa anvi anvoy en zanfan deor, e letan sa zanfan i deor, i santi li enkapab pou li kapab fonksyonnen, pou li kapab fer son letid avek efikasite.

Me an menm tan ki mon pe dir sa Mr Speaker, koman en *ex scholar* mwan osi ki'n pran par dan bann letid *overseas*. Mon anvi osi dir avek bann etidyan ki *overseas*, i annan bann lezot loportinite.

Annandler wi zot santi petet zot *allowance* pa ase. Me nou ki nou dir nou, *allowance* ki nou donn etidyan - annandler ou tann etidyan pe koze, ou santi ondire - ou santi ondire, zot anvi fer en pti *saving*.

Be nou, nou pe dir ek etidyan, *allowance* pa pou donn ou pou fer *saving*. *Allowance* i

pou donn ou pou fer sir ki ou kapab pey ou bann *utilities*, ganny ou manze e an menm tan, ou kapab ganny ou transpor pou ariv kot ou lekol.

Sa ki enteresan Mr Speaker, e sa mon bezwen dir, i annan bann paran ki wi i war pou dir petet sa pei ki son zanfan i ladan, i pa pe neserman ase. Ou war bann paran, ou'n konmans war bann paran Mr Speaker ki pe *top-up*, ki pe anvoy larzan pou zot zanfan, e sa Minister Ledikasyon i ankouraz sa tre byen.

Mon bezwen dir ek bann etidyan osi, i annan en moman osi ki zot osi zot kapab fer bann lezot keksoz, ki bann lezot etidyan Seselwa ki'n al *study* avan zot in fer. I annan etidyan ki'n al fer *part time*. I annan bann etidyan ki letan i pe *study* - sa i pa pou konpromi ou *study*. Pa bezwen krwar sa i pou konpromi ou *study*.

I annan etidyan ki'n al swiy latab dan bann restoran, pou li ganny en *stipend*, pou li ganny en pti *allowance*. I annan etidyan Seselwa ki'n al anmas fri dan bann gran laferm, dan bann zarden e sa in ed li kapab soutenir son lekor osi. E ganny en pti pe an plis pou sa ki i pe fer.

Donk ki nou pe dir ek bann zanfan, i osi, i en *form internship*. Letan ou partisip. Bann etidyan, annou anpes nou ganny *brainwashed* ek bann nide ki pa neseserman lo sa size, ki pa neseserman entelizan, ler ou tann bann dimoun pe dir ou ki ou pa laba, e sa pou afekte ou letid. Non.

I annan en ta etidyan Seselwa ki'n fer sa. Nou pa pou zis dir etidyan lezot pei. Seselwa ki'n fer sa e ki'n fer sa tre byen. In kapab fer en lesanz, en balans, akoz se sa lavi, se sa lavi. En balans ant sa ki gannyen ek sa ki i anvi plis.

La nou pe koz sa ki ou gannyen, sa ki ou bezwen e bann ki bezwen en pe plis. E i annan ki anvi en pe plis, e i annan bann mwayen ki zot kapab ganny fer.

Alors pa santi zot anbarase, anbarase si zot war zot petet koman *internship*, zot *involve* dan bann *internship*, pou kapab *top-up* zot *allowance*, zot *stipend*.

E Mr speaker, Onorab in koz lo en topik ki mon pa'n tande pou le moman. Nou pa'n tande lo sa *Charlie, Charlie*. Nou pa'n tande sa pou le moman. Napa sirkiler ki'n sorti *headquarters* pou le moman, me ou'n donn nou en sinyal ki

nou ava al gete ki pe arive egzaktaman. Mersi Mr Speaker.

### **MR SPEAKER**

Minis a note. Onorab Lemiel, ou kestyon.

### **HON SYLVANNE LEMIEL**

Mersi Mr Chair. Bonn apre midi Minis avek ou delegasyon. Mr Chair mon kestyon i konsern en pti pe osi dan *allowance*. Minis ou'n deza vin isi, nou ti'n diskite e mon rapel ti annan zofisye tou ki ti la, mon pa sir si SS Payet selman - dan en kestyon ki nou ti demande, mon menm partikilyerman, lo kote *allowance*, nou pe koz marmay *SITE, SIT*.

Sa bann la, pos-segonder, i annan pos-segonder ki'n nonmen. Me selman mon santi Minis petet in tous parey en pti pe petet bann ki *either* i al *youth hostel*. Mon pa santi nou'n al pou sa bann etidyan ki mon pe nonmen la.

So, mon ti ganny dir pou dir i annan en diskisyon ki ti pe ganny fer ant Minister Ledikasyon avek Minister Finans, pou zot vwar si i annan posibilite or zot pe get ladan pou zot kapab ogmant sa pti *allowance* ki sa bann marmay ki premye lannen i annan i ganny tan, dezyenm lannen ziska trwazyenm lannen.



So, mwan mon ti a kontan konnen Minis, wi, in napa dan Bidze sa lannen. Ki zistans nou ete avek sa diskisyon? Eski i ankor *still ongoing*? Pou zot vwar ki mannyer zot kapab kantmenm lannen prosen, *Mid-year Review, i don't know* - donn en pti logmantasyon, si pei nou dir i pe fer byen, tou keksoz i *ok*.

So annou gete ki mannyer nou kapab aranz en pti pe osi sa bann zanfan pos-segonder, aköz Minis vre, kaye in monte, kreyon *whatever* ki zot servi. Annou regard ladan.

Lakres Anse Royale, R1.89milyon, Minis eski sa larzan pou ase pou fini sa travay an antye konplet e ki nou war son louvertir 2023? Si non, petet mon ti a kontan konnen ki lezot demars ki pe ganny fer pou *top-up* ek sa larzan pou zot kapab fini sa proze net?

*A-Level* mon war pe al aranze i osi, R1.2milyon. Petet ti a bon nou konnen egzaktman ki bann travay ki pe al ganny fer kot leköl *A-Level*? Mersi Mr Chair.

### **MR SPEAKER**

Mersi. Minis i annan 3 pwen la. Ou pran, oubleyen *panel*?

### **MINISTER JUSTIN VALENTIN**

Mersi Mr Speaker. Mersi Onorab pou ou kestyon. Onorab nou retourn ankor lo sa zafer *allowance*. Parey mon'n dir lo ansennyan, nou osi nou pran bann lentere bann etidyan aker. Bann diskisyon parey lo zot kondisyon leköl, lo zot *stipend*, lo menm bann diferan, zot bann program.

Par egzanzp yer menm mon ti kot leköl *Academy* Maritim. Nou pe rod bann solisyon pou fer ki etidyan osi i konfortab. Donk wi, nou pa zanmen aret koze lo sa bann keksoz.

Byensir, par egzanzp la sa lannen in annan bokou logmantasyon en pe partou, partou, me mwan mon pou en dimoun lannen prosen, ki pou sizere petet, lo lefe ki la nou pa'n tous bann etidyan. Annou gete ki mannyer nou kapab tous bann etidyan pou 2024. Donk konversasyon pa zanmen arete.

Me sa lannen nou'n dir be annou fer logmantasyon en lot bor e apre ... Aköz bann etidyan pa dan kritik, zot pa dan staz kritik. Alor vwala ki petet sa logmantasyon ki nou ti a swete war pa'n neserman arive. Wi, me selman pou annan sa a lavenir.

Dezyenm pwen, Lakres Anse Royale, sa larzan ki'n ganny mete la, nou swete i

kapab konplet sa travay. Nou anvi konplet sa travay. Fodre sa travay i ganny konplete e nou anvi sa travay i ganny konplete. Me selman ankor parey nou ti dir, si depi *day 1*, si depi *day 1*, sa bann...

Ou konnen, si tou bann dimoun ti'n pran son responsabilite parey ti'n devret pran, ozordi nou pa ti pou dan sa zafer ki nou ladan. Pe sey gete ki mannyer pou aziste la, pou aziste la. Me nou anvi konplet sa lakres. Sa lakres pou ganny konplete.

**MR SPEAKER**

Batiman *A-Level*?

**MINISTER JUSTIN VALENTIN**

E, *A-Level* ki pe arive kot *A-Level* mon a dir ou en pti moman ki pe arive kot *A-Level*. Sa larzan pou refer zot twalet e apre zot lab. Mersi Mr Speaker.

**MR SPEAKER**

Wi, klarifikasyon lo enn sa 3 pwen?

**HON SYLVANNE LEMIEL**

Mr Chair, mersi bokou. I pa zis enn lo sa 3 pwen. I en pwen lo sa zafer *allowance* ki mon'n manke avek Minis. Minis ti'n nonm etidyan matir pou ganny en ogmantasyon dan zot larzan ki zot gannyen. Mon panse ki sa

bann etidyan bann dimoun ki pe travay, ki pe...

Akoz ou'n nonm etidyan matir osi pou ganny en ogmantasyon. Petet ti a bon nou konnen dan sa Bidze, konmsi la zot pe ganny tan, par konbyen ou pe ogmant sa bann etidyan matir? Mersi.

**MR SPEAKER**

Anfen mon a les Minis adrese.

**MINISTER JUSTIN VALENTIN**

Wi. Mon a les Astride aköz mon panse petet in annan en *misconception* letan mon'n fer sa lanons. Letan mon'n dir sa sonm. Mon a les Ms Astride koze, apre mon ava elabore.

**MR SPEAKER**

*Yeah. DG.*

**COMPTROLLER GENERAL  
ASTRIDE TAMATAVE**

Mersi Mr Chair. Onorab, pou bann etidyan *mature*, 2023 zot *allowance* pou reste parey. Napa provizyon pou okenn logmantasyon pou bann etidyan *mature*, me par kont dan sa 17 pei ki enkli logmantasyon 10poursan i enkli marmay Liniversite Sesel. Mersi.

**MR SPEAKER**

Mersi. Minis ou pou azout keksoz?

**MINISTER JUSTIN VALENTIN**

Wi. Mersi Mr Speaker. Sanmenm mon dir mon krwar in annan en malantandi. Mon a eksplike ki mon ti pe sey dir. Sonm total in ogmante. Pa *allowance* endividyel ki'n ogmante me sonm total.

I posibleman i annan plis etidyan ki tonm dan sa kategori. Wi. I annan plis etidyan ki tonm dan sa kategori. Sa sonm total ki'n ogmante. Mersi Mr Speaker.

**MR SPEAKER**

Kestyon Onorab Bastienne.

**HON DESHEILA BASTIENNE**

Mersi Mr Chair. Bonn apre midi Mr Chair, bonn apre midi Minis ek ou delegasyon, bonn apre midi tou Manm Onorab.

*PS* mon pou dir ou en gro mersi pou ou sipor ki ou ti apote pou lekol primer Perseverance konsernan lalimyer. E ou konnen. E ankore vi ki lekol i gran, mon krwar ou okouran ki i annan ankore en pti mankman. *Ok?*

E Minis, vi ki lekol Perseverance primer ti sibir Vandaliz ek vol, eski dan Bidze 2023 i fer provizyon pou arive lev nivo sekirite kot sa lekol?

E apre, eski i annan en posibilite ki 2023 lekol primer Perseverance ti a kapab arive ganny en *photocopier* an kouler silvouple? Mersi.

**MR SPEAKER**

Mersi. Minis, ler ou pare.

**MINISTER JUSTIN VALENTIN**

Mersi Mr Speaker. Mersi Onorab pou ou kestyon. Onorab, Minister Ledikasyon... I annan bann landrwa kot Minister Ledikasyon pa neseserman satisfè avek nivo sekirite ki i pe gannnen. Avek nivo e kalite sekirite ki i pe gannnen.

Nou, nou pe fer en legzersis, e nou pe demann lekol, bann lekol pou dir nou, kote zot pa pe satisfè e ki bann group ki pe vey kot zot lekol, sekirite kot zot lekol, ki pa pe donn zot sa servis kalite? E letan nou pou'n fini konn tousala, nou pou pran bann desizyon ki mon krwar pou dan benefis lekol.

Pour *photocopy*, kekfwa nou ava ed lekol get dan zot Bidze kot zot kapab gannnen. E si napa nou ava get dan Bidze Minister Ledikasyon santral kote nou kapab ganny en *photocopy*. En *photocopy* kouler pou lekol Perseverance. Mersi.

**MR SPEAKER**

Mersi Minis. Onorab Vidot?

**HON AUDREY VIDOT**

Mersi Mr Chair. Bonn apre midi Minis ek ou delegasyon e tou dimoun ki a lekout. Avan mon demann mon kestyon, mon ti oule zis profite pou swet bann etidyan ki pe fer zot legzanmen bonn sans e osi dir mersi bann *teachers, management* pou sa parkour lannen ki zot in dedye avek nou bann etidyan dan lekol.

Mon kestyon mon pou konmans avek sa enn ki ou'n donn repons avek Onorab Bastienne. Lo size sekirite lekol. Dan sa konsiltasyon ki ou dir zot pe fer, ki zot anvizaze adrese pou 2023, avek sipor Bidze ki la, eski zot kapab annan osi en dyalog, petet mon pa konnen si avek bann Konsey, lo baz bann lekol espesyalman, ki'n ganny afekte, swa resaman oubyen detrwa letan pase, an referans kot nou pe koz sekirite bann zanfan ki swa lekol primer avek segonder?

Akoz mon annan 2 lekol ki'n pas dan bann serten sityasyon, kot nou paran avek ansennyan i annan lenkyetid. So, pe demann lanfaz lo sekirite zanfan ler pe al lekol e apre lekol. Petet zot bann *networking*

ki zot fer osi avek bann lezot partener. Sa i enn.

Dan sa sekirite la, nou osi oule adres sa *issue* bann *warden*. Ki Bidze pe regard osi pou donn zot sa sipor? Akoz zot osi zot lavi it at *risk* letan zot lo semen pou fer, okip nou bann zanfan pou al lekol.

Lo size miray lekol Plaisance primer osi, zot anvi konn keksoz. E finalman, Minis, mon'n tann ou donn plizyer repons lo bann *incentive* pour ansennyan, espesyalman lo ... I annan sa presyon ki pe ganny mete an referans avek zot *long service allowance*.

Mwan, mon en pti pe dezapwente me an menm tan mon oule petet e trakase plito. Ki ou Minister, baze lo bann defi ki ou'n dir pou zot kapab tenir zot bann *teachers* ki petet pa neserman kapab pran *retirement* boner, zot kapab kontinyelman donn sa servis. Be osi bann ki nouvo, ki la. Konmsi pou retenir zot.

Mon konnen i annan en mankman dan *PSE*. Nou'n fer sorti Lasanble lo la for. Nou konnen poudir lo kote Lekol Eksepsyonnèl ou annan dimoun, ansennyan ki lontan i la, i bezwen sa sipor.

E ou Bidze, menm si Finans in dir en Polisi Gouvernman. Me kwa ki pou ed

ou ek sa Bidze 2023 vremen, pou ou kapab aport sipor, soutyen ki ou bann *teachers'* pa santi zot, war zot pe anvoy lavwa?

Me, *it's as if* ou a krwar zot pos, eskize si mon servi sa term - zot pos i ranpli avek koze me sa finansman pa vini. Mersi.

### **MR SPEAKER**

Mersi. Onorab in adres plizyer pwen ki'n link ansanm. Mon pa konnen si fer 2 kestyon oubyen si fer 3. Minis si ou'n sezi, nou a sey pas lo tou en pe vitman.

### **MINISTER JUSTIN VALENTIN**

Mersi Mr Speaker. Mon'n sey sezi en bon pe ki Onorab in dir. Onorab i koz lo sa dyalog pou sekirite. Mr Speaker, wi sekirite parey nou pe war, i annan sekirite parey mon'n dir pa pe donn lekol sa *good deal* parey lekol pe ekspekte. E nou, nou pou demande ki enn;- nou revwar rol sekirite kot lekol.

Par egzanp, nou pran en legzanp konkret kot in annan landrwa kot zanfan pe fer vandaliz e sekirite pe war. E zot dir koumsa zot pa ganny drwa fer naryen. In annan sa ka. E nou, nou bezwen prezan, pa zis travay avek lekol, me osi travay avek lapolis e Lakour e Zidisyer dizon. Ek zidisyer pou nou gete ki rol sekirite kot lekol?

Ki mannyer i kapab entervenir, byensir san ki i abiz okenn zanfan? Me ki i la pou konman en *figure* ki met lord e lape. E la nou pa pe koz zis pou etidyan. Nou osi nou bann ansennyan ki pe travay, zot santi zot dan en landrwa an sekirite.

Donk sa konversasyon sekirite kot lekol, i pou *extend* pou depi son bann zanfan osi byen ki bann travayer. Nou kontinyen sa diskisyon. E byensir la rol *warden* dan sa zwe - i ava byen ganny eksplike. *Warden* osi i ava annan en plas.

Me lekol osi i bezwen realize ki zot osi zot annan en lavwa zot. Zot kapab, zot annan en group dimoun, en group *management* e en group *Council* ki zot kapab koze, anmenn bann sizesyon. Sa ki annandler nou santi i manke avek bann lekol. Bann lekol i annan serten lekol i fer sa byen, me i annan serten i krwaz lanmen.

Me selman sa nou kapab konpran, i en kiltir dan le pase ki'n devlope, kot zot krwar zot napa en lavwa, zot pa kapab koze e zot pe esper tou keksoz sorti *from headquarters*, pou *headquarters* donn zot gidans. Zot bezwen kapab osi fer en refleksyon e anmenn bann solisyon.

Mr Speaker, an sa ki konsern lekòl Plaisance, i annan larzan dan Bidze, lekòl primer pou fer en miray otour lekòl, ki ava separ lekòl avek sa bazar ki nou war. E an term bann *teachers* par egzans, letan nou ti pe selebre lafet bann ansennyan, en keksoz ki mwan, mon ti demann bann ansennyan ki ti pe kite, e nou konnen akòz...

Nou konnen sirtou nou bann ansennyan ki ti pe ganny 60an, nou konnen akòz zot ti pe kite. Nou konnen. Byensir i annan ki pa ti pe anvi perdi zot pti granm konmdir zot menm. Me, nou'n fer lapel pou bann ansennyan ki santi zot for e zot anvi retournen, nou ava gete ki sa nouvo relasyon e lo sa nouvo Kontra ki nou kapab travay avek zot, pou zot kapab kontinyen.

Mon pa'n tro byen sir konpran ou kestyon lo Lekòl Eksepsyonnel Mr Speaker.

### **MR SPEAKER**

Mon krwar ti lo sekirite osi, si mon pa tronpe. Klarifye Onorab - ou'n fer...?

### **HON AUDREY VIDOT**

Mon ti pe dir ki parey bann *teachers* kot Lekòl *Exceptional* i annan en bon pe letan zot la ansennyan, zot pe al lo laz zot,

pou enspir bann ki nouvo, apre bann ki mankman parey *PSE*. Konmsi menm si ou'n...Ms Tamatave in dir konsernan *allowance* Gouvernman i annan en Polisi lo la.

Me konmsi mon pa pe war - mon trakase akòz mon pa pe war kwa ki pou kapab garanti zot, ki zot pou kontinyelman ganny sa bann *teachers* ki pou manke letan sa bann i ale.

### **MR SPEAKER**

Bon, *ok*. Pwen lo *allowance* e ki pou fer pou *teachers*, Minis in adrese deza. Alor mon pou demann li pou pa tarde lo la. Si oule donn en lasirans ankor Onorab Vidot.

### **MINISTER JUSTIN VALENTIN**

Mr Speaker, vitman mon kapab dir - mon kapab dir ki Lekòl Eksepsyonnel i sa lekòl ki nou group ki la nou'n al 6 fwa kot zot. Nou pe rod en fason byensir pou kontinyen donn zot bann formasyon, pou ankouraz lezot bann etidyan ki pe antre pou bann nouvo *trainee*. Pou zot osi vwar Lekòl Eksepsyonnel koman en landrwa, en *potential* landrwa pou zot travay.

E en keksoz mazer ki nou pe fer pou ankouraz bann etidyan pou swazir Lekòl Eksepsyonnel, nou pe menm mazin si nou pa devret

*rebrand* sa lekol. Get son rezondet akoz i la e gete ki nou kapab fer avek li, pou nou kapab menm re organiz son bann popilasyon etidyan ki vin kot sa lekol.

Donk i annan en kantite travay ki pe fer avek Lekol Eksepsyonnel - En kantite travay. E bann ansennyan e *management* Lekol Eksepsyonnel i ansanm avek nou, nou pe koze, nou pe dyaloge ansanm avek. Mersi Mr Speaker.

### **MR SPEAKER**

Mersi. Onorab Mondon.

### **HON TERENCE MONDON**

Mersi Mr Chairman. Mr Chairman mon kestyon; premyerman mon oule dir ki mon apresye vwar ki Gouvernman a pe fer en gran lenvestisman pou moderniz nou sistenm ledikasyon. E sa provizyon 6.8milyon dan Bidze pou donn akse servis *internet* tou zanfan, i enn ki remarkab.

Me mon kestyon i reste, eski Minis i kapab dir nou kwa ki enkli dan sa *package* 6.8milyon? E eski i annan lezot provizyon dan Bidze pou siport lenplimantasyon sa servis *internet* kot nou bann lekol - nou bann letablisman skoler? Mersi Mr Chairman.

### **MR SPEAKER**

Mersi. Minis.

### **MINISTER JUSTIN VALENTIN**

Mersi Mr Speaker. Mersi Onorab pou ou kestyon. Mr Speaker, sa R6milyon la dabor i sa Kontra ki nou'n sinyen pou enn;- pou sa lakonpanni refer en pe bann *networking* ki annan. Re aranz en pe bann lenfrastruktir kot lekol pou fer ki enn, sa...

Ou konnen akoz letan ou pas kot lekol ennler bann lenfrastruktir, sirtou lo bann *computer*, i vye, i vye en kantite. Donk sa i osi enkli bann lekipman ki pou mete e apre sa servis *internet* li menm lo en baz *monthly*.

Apre ki annan osi ankor pou moderniz sa ledikasyon ki nou pe koze. I annan en sonm ki'n ganny mete la. Mon pa pe war li egzaktaman kot i ete, me selman i annan ki'n ganny mete pou *IT*. Pou lekipman *IT*, pou bann ansennyan e osi bann travayer Minister Ledikasyon.

E apre, nou dan nou bann lezot program skoler, nou pe osi...Parey nou'n fer avek en program avek en group aletranze Renesans, nou pe osi rod bann *online learning facilities, online program*, ki nou kapab anmenn dan lekol pou

zisteman moderniz la fason ki bann zanfan, bann etidyan i ganny *access* avek *curriculum*. Mersi Mr Speaker.

**MR SPEAKER**

*Thank you.* Onorab Aglae.

**HON EGBERT AGLAE**

Mersi Mr Chair. Bonn apre midi Minis e *PS* ek ou *panel* antye. Minis mon ti a kontan demann ou premyerman, anliny avek ou Bidze, konbyen *teachers* ki pe *retire* pou sa lannen? *Ok.*

An vi ki i annan mankman *teachers* dan lekol, e ki sa lannen menm dan ou Bidze *supplementary* ti annan en *copy* 20milyon ki'n reflekte lo inabilite pou fer *recruitment*. So ki sa lenpak i pou anmennen?

Dezyenmman Minis, sa size *allowance* i en size ki tou la zournen pe monte Minis. Eski ou Minister pe asize pe fer en lodit lo tou kalite *allowance*, depi *teachers*, zanfan lekol ki pe gannyen, an vi ki kou lavi in ogmante.

E sirtou i annan sa bann etidyan *STA* ki zot paran pe rod larzan an plis pou kapab donn zot pou bann lekipman, pou fer revi e prezant ek ou Gouvernman pou vwar bann nesosite pou annan nou bann logmantasyon kot i nesaser. E dernyen Minis...

**MR SPEAKER**

Ou'n demann 2 deza Onorab?

**HON EGBERT AGLAE**

I *blend* dan kanmarad sa Mr Speaker.

**MR SPEAKER**

I ansanm? *Ok.*

**HON EGBERT AGLAE**

Dernyen Minis se ki i annan en *group teachers* ki ti fer *advance diploma* dan *blended mode* e ou ti dir zot poudir napa larzan, zot pe espere. Zot anvi konnen si sa Bidze pou *cater* pou zot ganny sa pti mwenza? Mersi.

**MR SPEAKER**

Mersi. Minis mon al les ou dil avek sa bann.

**MINISTER JUSTIN VALENTIN**

Mersi Mr Speaker. Mersi Onorab pou ou kestyon. Mr Speaker, data ki nou annan la pou le moman, i annan 29 *teacher* primer ki pe *retire*. E i annan 11 *teachers* segonder ki'n ariv ler *retire*. E zot pe *retire*.

E parey mon dir *retirement* i en faz natirel. Letan annandler bann dimoun i ganny sa bann sif, zot panse pou dir *teachers* pe kite, *teachers* pe *retire*. E sa i en prosedir natirel.



Me sa ki malere se ki nou pa pe... Sa pei, zanfan par leksperyans e par osi par lafason leksperyans, par lafason ki zot in vwar ansennyan pe ganny trete, zot in ganny dekouraze petet pou zwenn sa profesyon.

E la i responsabilite prezan la, sa group dimoun ki la, rod mwayen pou fer ki zanfan i ganny atrakte avek sa profesyon. E mwan, mon'n pran sa koman en latas. En latas avek nou group ki la.

Byensir osi bann ki pa la, ler mon dir nou group, group ki la dan Minister Ledikasyon, nou war li i nou devwar prezan pou re *build* konfidans bann zanfan, bann zenn dimoun, bann zenn etidyan pou zot kapab zwenn sa profesyon.

Logmantasyon parey nou dir, Mr Speaker mon repete, mon repete. Minister Ledikasyon bann dimoun ki travay avek ansennyan. Nou pa travay kont ansennyan, nou travay pour ansennyan, e pou zanfan.

Donk sa bann panse, ogmant larzan, ogmant *allowance*, tir presyon lo bann ansennyan, i keksoz ki nou kontinyelman pe rod solisyon pou nou fer. E nou'n *go as far* - 2 semenn pase, pa 2 semenn pase. -lannen pase nou ti kree

en group dimoun ki nou apel zot bann *teacher voice*. Lavwa bann ansennyan, pou zot anmenn sa bann keksoz devan kot nou. Pou nou koze, pou nou diskite, pou nou rod solisyon ansanm.

E 2 semenn pase nou ti fer en Konvansyon, kot nou ti rod bann mwayen pou nou kapab tir en pe sa ki nou apel bann *teacher load* pou zot zisteman ...

Akoz annandler la, ou pa kapab siplemant ek larzan. Ou rod bann lezot mwayen ki ou kapab fer. E nou annan bann zoli travay ki nou pe fer dan sa laliny.

An sa ki konsern bann *teachers* ki lo *Scheme* fer sa program *blended learning*. Mr Speaker mon napa detay lo la, la a ler aktyel, me selman sa i en keksoz ki mon ava rod leklersisman.

Me selman mon pa pe tann okenn mirmirasyon la pou le moman. E normalman ler ou pa tann sa i vedir in annan en solisyon.

### **MR SPEAKER**

Ok, mersi. Ki klarifikasyon Onorab?

### **HON EGBERT AGLAE**

Mersi Minis. Minis si mon'n kalkile la ou'n dir mwan pou dir

sa lannen, lannen prosen ou pou napa 40 *teachers* dan lekol. Ou annan en sonm dan Bidze 2.5milyon pou *part time lecturer*.

Eski en konversasyon petet pou re vwar si i annan dan sa 40 ki pare pour...? Vi ki ou'n sanz en pti pe ou formel *timetable curriculum* dan lekol, si ou kapab ganny zot servis, petet ki ava ed ou en pti git? Mersi.

**MR SPEAKER**

Ok Minis, nou a donn sa klarifikasyon vitman.

**MINISTER JUSTIN VALENTIN**

Mersi Mr Speaker, mersi Onorab. Mr Speaker, *PS* i anvi koz en pe lo bann travay ki pe fer direktman avek bann ansennyan.

**MR SPEAKER**

*PS?*

**PS MERNA EULENTIN**

Bonn apre midi Mr Speaker. Bonn apre midi tou bann Manm Onorab. *In fact*, malgre nou pe ganny sa bann nonm *teachers* ki pe *retire*, Onorab Aglae. Malgre i pa bokou, me selman pou lannen 2023, nou pou annan 10 ansennyan ki pou antre dan nou bann lekol segonder.

E apre nou pou annan 14 ki pou antre o nivo primer. E aktyelman in annan bann ansennyan ki'n vin devan, ki'n montre zot lentansyon pou zot vin *teach part time*, me pa on a *full-time basis*. E la nou pou asize ansanm avek *DG HRA* pou nou fer sa laranzman pou vwar ki mannyer zot kapab ed en pti pe nou sistenm. So, wi.

**MR SPEAKER**

Mersi. Minis, wi, terminen.

**MINISTER JUSTIN VALENTIN**

Mersi Mr Speaker. E mon a osi azoute kwa ki dan konversasyon a ler aktyel Mr Speaker. Sa i dan konversasyon depi 2020. Me selman, ou santi i annan bann ezitasyon petet pou bann lekol al dan sa direksyon. E nou pe travay ek zot pou fer zot bouz dan sa direksyon.

Par egzanp, nou pe menm demann bann *teachers* - bann lekol, letan zot gete i annan bann mankman kot lekol menm, get en kou zot bann lafors zot bann ansennyan e demann zot pou zot gete si zot pa kapab donn lanmen degaz lasasen.

E ansennyan nou pe demann zot, bann ki anvi *teach* en dezyenm size, zot annan sa lafors e sa konpetans. E nou pe

demann zot pou zot fer sa. E si zot fer sa, zot pou ganny peye an par rapor a sa ki zot per fer. Mersi Mr Speaker.

**MR SPEAKER**

Mersi. Onorab Roucou.

**HON MICHEL ROUCOU**

Mersi Mr Chair. Bonn apre midi a tous. Minis mon kestyon i osi pou al ver renovasyon. Mon war poudir anba *PSIP* i annan pou lakres, 1milyon ki pou al pou lakres Mont Fleuri. Si ou kapab eksplik nou en pe lo la?

E osi lo kote Mont Fleuri segonder, nou war poudir i annan apepre 2milyon. Si ou kapab donn en pti pe plis detay lo la? Mersi.

**MR SPEAKER**

*Thank you. Panel, renovasyon?*

**MINISTER JUSTIN VALENTIN**

Mersi Mr Speaker, mon a les *DG* reponn please. Mersi.

**MR SPEAKER**

*DG, ou annan la parol.*

**DG INSTITUTIONAL SUPPORT SERVICES DIVISION - BERNARD ARNEPHY**

Mersi Mr Chair. Onorab pou lekol Mont Fleuri segonder, wi i annan serten alokasyon ki'n ganny fer, e sa i pour...i annan

2milyon spesifikman. I annan sa vye *T-Block*. E nou, nou'n... Ler nou'n fer *visit*, en *visit* nou ti fer ansanm avek lotorite distrik, nou'n santi pou dir sa *block* i kapab ganny *salvage* e kot nou kapab met *additional classroom facilities*. So,

Me selman letan nou ti fer *estimate cost* avek *SIA* - Lenfrastriktir Lazans, zot in vwar pou dir pou kout apepre en 4.5 a R5milyon. So, nou kontan ki Minister Finans in donn nou 2milyon pou lannen prosenn, kot nou kapab konmans en premye faz sa proze. E nou ava vwar ki manner i ale.

E si travay i mars byen, petet menm dan *Mid-year Review*, nou kapab revwar nou Bidze. E vwar ki manner nou kapab reprioritiz nou alokasyon ki nou'n gannye. E *if not*, demann larzan adisyonnal kot nou kapab fer sa dezyenn faz osi. Me selman nou garanti pou dir pou annan en premye faz ki pou ganny fer.

E lot *good news* ki nou annan se ki anba *second chunk*, sa *Indian grant*, so zisteman semenn prosenn nou pe al siny *MOU*, Minister Ledikasyon, Lendi, nou pe al siny *MOU* avek *Indian High Commission*. So, ki pou annan en lot alokasyon R900mil kot lekol Mont Fleuri

segonder pou benefisye, pou serten travay mazer renovasyon lo sa *block* laklas ki en pe pli pre avek sa *T-Block*. So sa i annan pou...

E pou lakres osi, nou annan serten travay renovasyon pou nou fer lo zot *block*. E sa i enkli lekol primer osi, kot nou'n met serten larzan pou nou kapab fer serten travay lo lekol primer. So, savedir i annan en sonm ase konsiderab pou lekol Mont Fleuri, *both* primer avek segonder pou lannen prosenn. Mersi.

### **MR SPEAKER**

Mersi DG. Onorab Pillay.

### **HON SEBASTIEN PILLAY**

Mersi Mr Chairman. Bonn apre midi Minis avek ou delegasyon sorti kot Minister Ledikasyon. E bonn apre midi tou bann ansennyan - bann etidyan. Mon konnen bokou in antre dan legzanmen nasyonal. I annan pe antre dan bann legzanmen enternasyonal. Mon swet zot tou bonn sans. E pou bann ansennyan, mon swet zot bonn kontinyasyon. E mon swete ki zot bann etidyan i kapab perform alaoter ki zot pe prezimen. E ki sa i ava anmenn zot bokou satisfaksyon.

Mr Chairman, mon en pti pe konsernan aköz, ou konnen

i annan en dikton ki dir, ennler pos dimoun i ranpli for avek koze. Aköz mon dir sa Mr Chairman, aköz mon bezwen ganny en klarifikasyon lo serten keksoz ki pe ganny propoze dan Bidze, pou mwan kler.

Premyerman Mr Chairman i annan sa size *long service allowance* ki annan 77 fwa ki'n ganny nonmen dan Bidze Minister Ledikasyon - 77 fwa. E dan sa 77 fwa ki'n ganny nonmen, a plizyer repriz, sa *amount* i desann.

Par egzanp si mon pran enn la, mon regard par egzanp anba ladministrasyon avek *procurement*, i desann sorti 808 pou li vin 582mil. Savedir i montre ou poudir dimoun pe sorti, aköz ou pe nepli pey sa *long service allowance*. E i desann *across* tou bann lekol.

So ler Minis i dir mwan i annan 29 *teachers* ki pe *retire* e 11 ki dan segonder, 29 dan primer e 11 segonder. Minis eski ou kapab azoute pou dir nou, konbyen *teachers* ki pe sorti dan Ledikasyon, an plis ki sa bann ki pe *retire*? E prezan donn nou konbyen *vacancies* ou annan dan Minister Ledikasyon? Zisteman pou mwan kapab pran en pwen ki Onorab Aglae in *raise*.

Lannen pase dan *supplementary budget* e bann

Manm *FPAC* ki la, Onorab Arissol, Onorab Mondon i kapab ateste sa, Onorab Romain - nou ti vwar pou dir ti annan en *copy* bidzeter to the *tune of almost* R20milyon ki ti arive aköz *delays in recruitment*.

So, konbyen *vacancies* ou annan, e si ou'n nobou adres ou sityasyon problenm ki ou annan pou en *recruitment*, pou ranplas bann *teachers* ki pe sorti?

40 *teachers* Mr Chairman, pou en dimoun ki'n deza dan ledikasyon, i en kantite *teachers*. Aköz si sak *teachers* i fer 30 peryod par semenn, Mr Chairman, 40 par 30 i fer 1200 peryod ki pou napa *teachers* pou *teach*. So, nou bezwen kantifye li koumsa.

Prezan Mr Chairman lo sa size *long service*, eski enn fwa pou tou Minister Finans i kapab dir nou - nou'n demann sa lenformasyon mon krwar plizyer repriz. Dir nou konbyen ansennyan ki ti sipoze kalifye pou en *long service allowance* ki pa'n kalifye, e lo bann grad ki zot in monte?

Par egzanp, pou en ansennyan ki ti ganny 20an dan servis, lannen pase, i pa'n kalifye pou li ganny R2mil, i ankor pe ganny zis R1500. So, sanmenm sa ki nou pe rod sa lenformasyon pou nou kapab

konpran en pti pe en pe pli byen Bidze.

Mon dezyenm kestyon Mr Chairman, Minis in mansyonn 16 *counsellors* ki pe fer en *training* e mon krwar i en bon linisyativ Minister Ledikasyon in pran pou donn *training* sa bann *counsellors*. Me kestyon ki mon annan, ler sa bann *counsellors* pou retournen avek en *B.Ed* - vi ki *marketable skill allowance* in ganny retire, ki mannyer Minister Ledikasyon pou *go about increase* re nimerasyon ki zot pe donn sa bann *counsellors*? Eski zot pou reste lo menm saler, oubyen eski pou sanze?

E si Minister Ledikasyon in *ok* avek *removal marketable skills allowance*, ki ti en *driver*, zisteman pou anmenn *professional development* dan ledikasyon - Minis i konn sa tre byen. Sak fwa en *teacher* i fer en kalifikasyon i nobou ganny en keksoz an plis e sa i ed li dan son lavi.

Eski Minis i kapab dir nou si in *entame* okenn diskisyon avek Minister Finans pour Sekter Ledikasyon e kad Ledikasyon, spesifikman, an sa ki konsern *marketable skills allowance* ki bann *teachers* pou gannyen, *as they go along their professional development*? Mersi Mr Chairman.

**MR SPEAKER**

Mersi. Minis?

**MINISTER JUSTIN VALENTIN**

Mersi Mr Speaker. Mersi Onorab pou ou kestyon. Mr Speaker, premye kestyon pe demann *vacancies* dan bann lekòl. Lo lalis ki mon annan, dan primer an total i annan 49 *vacancies* dan primer.

E apre dan segonder, i annan 52 *vacancies*. Me selman nou bezwen realize ki i annan...Nou bezwen fer en pti matematik la - i annan 25 lekòl primer. Si ou pran 49 ou diviz an 25,

i annan zis 2 *teachers* ki manke par lekòl. I pa-

Letan ou pe get sa sonm ou pou dir "manman be en kantite *teachers* i manke." Fodre nou kapab enterpret sa bann sif e donn sa zimaz ki devret donnen.

E apre ankor, mon'n dir lo mon lentrodiksyon, nou'n kree en model lekòl, ki en model en gran pei. Pti pei, i annan - bann *small states* pe rod bann lezot solisyon pou zot kapab adres bann mankman *teachers*.

Eski... ? E ler mon'n vin la dan Lasanble, mon'n deza koz lo la osi. Eski nou pou toultan kontinyen sa 8er-2er edmi? Tou

dimoun, tou lekòl, tou kou? Nou bezwen...

E dan mon lentrodiksyon, nou pe revwar *timetable*, re vwar deplwayman. Savedir mon krwar petet la, Mr Speaker, donn Minister Ledikasyon en sans propoz e anmenn en model. E akòz si nou toultan pe dir i mankman, i mankman, nou pa pe bouz sa largiman.

Alor nou bezwen la, nou vin ek sa model, apre nou ava kontinyen diskite. Akòz la largiman pa pe bouze, i pe reste. Nou vir an ron. Lenformasyon ki mon annan, *marketable skills*, mon pa rapel kan in tire.

(Off-Mic)

**MINISTER JUSTIN VALENTIN**

Be letan ou entegre i pa vedir ou tire. Mon *arithmetic*, mon *arithmetic* i dir mwan ler ou *add*, ou *add*.

(Off-Mic)

**MINISTER JUSTIN VALENTIN**

Ya. Mon pa pe konpran, mon pa pe konpran. Donk, vwala. So, Mr Speaker, e sa bann dimoun byensir, la nou pe koz lo ... Nou pa devret.

Ou konnen sa komantr pe fer per bann *counsellors* ki pe etidye. Mon krwar fodre nou les

bann dimoun, ankouraz zot petet pou kontinyen bouz devan, akoz mwan mon pe dir ek bann *counsellors* kontinyen etidye, e zot pou fer sa dan 3an. Konversasyon ozordi - 3an. Konmsi. Mr Speaker mon krwar bann *counsellors* i konpran mwan. Mersi Mr Speaker.

**MR SPEAKER**

Mersi.

**HON SEBASTIEN PILLAY**

*(Off-mic)*

Mr Speaker, mon'n demann lenformasyon Minister Finans i bezwen reponn mon kestyon...mon kestyon lo Bidze...

**MR SPEAKER**

*Lo long service allowance, lakantite. Well, yeah.*

**HON SEBASTIEN PILLAY**

*(Off-mic)*

Akoz dan Bidze, Minister Finans...

**MR SPEAKER**

Minister Finans, son kestyon se konbyen *teachers* ki lo *long service allowance* dan ou lalis? Si ou annan sa lenformasyon nou a donn li? Si napa ou a kapab kominik sa apre si i annan. Mersi.

**HON SEBASTIEN PILLAY**

Minis in fini reponn la...

**MR SPEAKER**

Ah wi, be ou'n fini donn en klarifikasyon la. Minister Finans, Ms Tamatave, *please*.

**COMPTROLLER GENERAL  
ASTRIDE TAMATAVE**

Mr Chair, mon ti anvi... Mon ti'n lev mon lanmen presedan pou reponn kestyon lo *marketable allowance* ki Onorab in dir pou *phase out*. Malgre i annan sa lentegrasyon *marketable allowance* dan saler from Avril 2023, *Scheme of Service* ki egziste *currently* pou *still* ganny servi konman sa gid ki pou gid saler bann travayer.

So si en travayer letan i ti pou konplet, par egzanp en *master*, son *marketable skill let's say* pou sorti, *let's say* R2mil pou vin R2mil500, i pou bouze. Son *basic pay* pou bouze lo *grid* saler par sa R500.

So, pou annan sa logmantasyon, me selman i pou dan son *basic pay rather than* dan *allowance*, akoz sa *marketable* pou'n deza ganny entegre dan *basic pay*. Me selman sa *Scheme of Service* pou ganny servi *still* konman sa gid ki pou donn sa travayer sa *increase* dan son *basic pay*.

*In regards to long service allowance* Mr Chair, parey mon'n dir, *long service allowance* i afekte tou travayer piblik, Leta. Se pa zis *teachers* an partikilye. So, tou travayer ki from 2021 zot ti sipoze pe ganny sa R500 an plis, *long servic*,. personn pa'n gannyen.

E parey Onorab Cosgrow taler in mansyonnen in fer en pwen ki valab. In dir, 2 dimoun pe fer menm louvraz, me selman enn pe ganny R500 e enn pe ganny R1000. E sa pwen i valab e *this is why* en *reason* akoz sa *long service allowance* i pa'n ganny entegre dan saler e ki an 2023 Gouvernman pou regard sa *allowance* en pe pli pros. E nou ava kapab *come up* avek ken desizyon *in terms of*, ki manner sa *allowance* dan le fitir pou ganny trete. Mersi Mr Chair.

**MR SPEAKER**

Mersi. Mon'n tann menm leksplikasyon lo *long service allowance* omwen 5 fwa. Mersi. Silvouple wi...?

**HON SEBASTIEN PILLAY**

Mersi Mr Chairman.

**MR SPEAKER**

Mon ti krwar ou'n fini demann ou klarifikasyon mwan.

**HON SEBASTIEN PILLAY**

Sorry, non Mr Chairman. Mon krwar i annan en keksoz ki pa pe ganny anrezistre la.

**MR SPEAKER**

Ale, donn nou en pwen silvouple.

**HON SEBASTIEN PILLAY**

Annou fer li kler.

**MR SPEAKER**

Nou bezwen bouze.

**HON SEBASTIEN PILLAY**

Mon pa konnen akoz ki Minister Finans pa pe kapab donn nou la kantite dimoun ki ti sipoze kalifye pou en *long service allowance*. I sipoze annan sa *data*.

Prezan dezyenmman Mr Chairman, dezyenmman - e la nou bezwen ganny en keksoz kler vizavi sa bann *Schemes of Service*. Nou'n tann 3 versyon lo bann *Scheme of Service* depi ler nou dan Lasanble. Nou'n tann en versyon sorti kot Minis Finans dan son diskour Bidze, nou'n tann en versyon *PSB* sorti kot son diskour e la nou'n tann en versyon sorti kot Minister Ledikasyon.

Mr Speaker, nou, nou oule *remind* Minis, annefe dan sa Lasanble ozordi, malgre nou ki pe kritike, i pli byen ki ou ekout



sa ki nou pe dir ou an kritik, ki ou ekout sa ki pe dir ou tou keksoz i byen ou kontinyen krwar tou keksoz i byen. Akoz a lafen dizour pa pou anmenn ni en rezilta.

So, Mr Chairman, mon ensiste - mon ensiste ki Minister Finans i devret kapab donn nou lenformasyon ki nou pe rode.

E dernyerman Mr Chairman, Minis i konn mon tre byen, si mon pe demann sa kestasyon, mon'n nobou reasir bann *counsellors*...

**MR SPEAKER**

Ase Onorab.

**HON SEBASTIEN PILLAY**

E bann *counsellors* la zot leker i kler. Zot konnen ki mannyer sityasyon i ete. Mersi Mr Chairman.

**MR SPEAKER**

Mersi. *Ok*. Kestyon lo *long service allowance* mon'n tann omwen 5 fwa parey mon'n dir. Mon pou zis demann Minister Finans la, si pou annan lalis *teachers* ki lo *long service allowance*, ki devret pe gannyen, ki pa ankor gannyen. Zis dir sa si ou annan oubyen si ou pou kapab donner pli tar, se tou. Nou a fini. Minister Finans.

**COMPTROLLER GENERAL  
ASTRIDE TAMATAVE**

Mersi Mr Chair. Mr Chair, mon a kapab mansyonn la kantite *teachers*, me selman nou ti anvi sansir sa lenformasyon pou nou fer sa avan ler nou kominik en lenformasyon avek Lasanble, sa lenformasyon ki nou pe donner i konplet.

**MR SPEAKER**

Tre byen. Si ou pa ankor pare.

**COMPTROLLER GENERAL  
ASTRIDE TAMATAVE**

So, mon kapab zis dir preliminar sa sif, me selman nou avan ler nou ti anvi donn sa Lasanble, nou ti anvi konfirm nou lenformasyon. Me selman an 2021ti annan 67 *teachers*, 2022 - 99 *teachers*;- *I mean* pa *teachers*, travayer Minister Ledikasyon. *And then* an 2023, 288 travayer Minister Ledikasyon. Mersi Mr Chair.

**MR SPEAKER**

Mersi. Bon. Ou annan klarifikasyon, wi?

**HON SANDY ARISSOL**

Mon ti a kontan ganny en klarifikasyon avek ou, anba *Order* 8, parske en keksoz mon'n realize avek ou as nou Chair, toultan ou donn Onorab

Pillay dernyen dimoun pou koze dan Lasanble Nasyonal.

*(Interruption)*

**MR SPEAKER**

Non, non. I pa dernyen.

**HON SANDY ARISSOL**

Mon kapab fini mon pwen silvouple?

**MR SPEAKER**

*Hold on, hold on* Onorab. Annou aret la.

**HON SANDY ARISSOL**

Mon kapab fini mon pwen. Non, non. Si oule mon tir sa...

**MR SPEAKER**

Annou aret la, annou aret la.

**HON SANDY ARISSOL**

Non, non, mon bezwen dir mon kestyon Mr Chair.

**MR SPEAKER**

Yes.

**HON SANDY ARISSOL**

Dezyenmman, toultan ou *allow* Onorab Pillay pou demann plis ki 2, 3 kestyon. Mwan - mon bann Manm - ou dir ek mon bann Manm dan en laliny, dan en fraz, annou dir. E li i ganny tou privez pou li demann tou kestyon e zot repet

menm kestyon tou lazournen. E Ms Tamatave i reponn menm larepons e ou menm ou'n aksepte ozordi.

**MR SPEAKER**

Yes.

*(Interruption)*

**MR SPEAKER**

Lo kan Onorab Pillay in ganny demann son kestyon, se akoz in lev son lanmen an dernyen. Mon'n pran tou dimoun ki'n al avan.

*(Interruption)*

**MR SPEAKER**

Me selman, i annan plizyer dimoun ki'n lev lanmen apre li osi. E lo mon lalis mon annan Onorab William.

*(Interruption)*

**MR SPEAKER**

Silvouple. *Order! Order! Order!*

**MR SPEAKER**

Mon annan zis pou klarifye. *Order* Onorab Pillay!

**HON SEBASTIEN PILLAY**

*(Off-Mic)*

Non...personn pa...

**MR SPEAKER**

Mon pe koze! Mon annan Onorab William, Onorab Esparon e apre mon'n war Onorab Poris, Adelaide ek Naidu. In lev lanmen. Mon sipoze zot ti'n lev lanmen avan akoz mon pa ti'n remark zot, me selman si zot ti'n lev lanmen, mon a bezwen azout zot. Apre i annan Onorab Loze.

Bon, vi ler ki'n arive nou pou pran poz, e nou a pran lezot Manm ki reste apre poz. Mersi.

**(BREAK)**

**MINISTRY OF EDUCATION**  
**(cont)**

**MR SPEAKER**

Bon mon a pran kestyon Onorab William.

**HON WAVEN WILLIAM**

Mersi Mr Chairman. Bonn apre midi Minis avek ou delegasyon. Mr Chairman, mwan anvi demann avek Minis. Lo *current challenges bullet point 3*, kot i pe koz lo atrakte, retenir bann profesyonnel kalifye Seselwa dan profesyon laprantisaz.

Mr Speaker mon anvi demann avek Minis, par lefe ki nou pe koz ansennyan etranze avek ansennyan Seselwa, eski ou Minister i ava konsidere, letan nouvo *Scheme* i ganny re-entrodwir, sa eleman *part time*

*rental* - rezon ki mon pe dir sa se ki bann ansennyan etranze zot ganny asiste avek dan zot *package* pou pey lakaz.

So dan bi pour rezourd en pe sa problem la kot sa *bullet point 3*, mon pe demande si zot kapab konsider sa, akoz mon krwar poudir petet sa i kapab en size ki kapab ganny diskite letan zot pe konsidere.

Mon dezyenm pwen, se ki mon vwar anba latab 6 - latab 6 kot '*approved*', (*hold on* Mr Chairman la mon pe rod sa latab la, sa latab 6) wi latab 6, letan nou pe koz lo '*percentage of school recording an improvement in attainment in national and international examination* -'

Mr Chairman mon vwar poudir 2021, *actual was* 32poursan. E 2022 nou pa vwar *actual*, me nou vwar target an menm tan nou vwar target an 2023. So pour koman en Manm Lasanble, pour nou mezire performans, avek sa 1.3bilyon ki nou pe donn Minister pour nou vot lo la.

Mon pe vwar poudir nou pa vreman vwar ki bor ou pe komanse ki bor ou anvi ale, baze ki lafason sa bann lenformasyon i ganny detaye dan sa latab.

E menm tan ou pe koz lo *digitalized* bann *program*, ou

vwar bann, ou koz 900 *teachers* ki pe servi bann *gadgets*. Me nou pa vreman konnen dan konbyen *total teachers* ki sa 900 i sorti, pour nou kapab vwar progresyon e *target* ki ou pe set. Mersi.

**MR SPEAKER**

Mersi. Minis eski *part-time rental* i en size Bidze Minister Ledikasyon, oubyen i Minister Finans e Gouvernman? Si i konsern ou Minister, ou kapab reponn si non nou kapab zis *pass*, e nou a pran lot *kestyon*. Minis?

**MINISTER JUSTIN VALENTIN**

Mersi Mr Speaker. I pa neserman zis pour Minister Ledikasyon, me selman petet i bann *incentives* ki nou kapab - akoz i annan plizyer *incentives* ki dimoun i met lo latib, letan nou pe koz lo lafason pour nou atrakte *teachers*. So sa i kapab kekfwa en *incentive*.

Be selman nou'n mazine osi letan nou nou'n met sa i annan bann lezot, i annan bann lezot profesyon ki *critical*. Zot poudir zot osi zot *critical* e apre zot pou vin avek, avek osi sa bann kalite largiman.

Donk me selman i en topik konversasyon. Mersi Mr Speaker.

Me apre pou - i vre, mon konpran sa lozik ki Onorab pe dir dan prezantasyon bann target. Annefe i riske pa tou dimoun ki pou konpran letan lafason ki ti a ganny eksprimen.

E sanmenm sa annandler i bon annan osi bann *qualitative description*, pour kapab ed dimoun konpran kot nou pe ale, kot nou sorti, kot nou pe ale. Be mon a revwar.

Me la vitman mon napa en repons final. Me selman nou kapab revwar sa latib, revwar sa latib e prezant li dan en fason ki letan tou dimoun i gete *element* pour konpran byen, ki mannyer kwa ki pe arive. Mersi Mr Speaker.

**MR SPEAKER**

Mersi. Onorab Esparon?

**HON REGINA ESPARON**

Mersi Mr Chairman. Mr Chairman mon premye *kestyon*, i al lo kote *current challenges*, pwen 5 – ‘*delay in implementation of capital project for the Ministry.*’ Ki mon ti ava anv konnen a sa pwen la Minis, i ti deza annan en konversasyon pou fer en *playground*, pour Lekol Glacis e i ti'n fini ganny en landrwa, ki ti'n ganny *earmarked* akote lekol, par deryer Kordgard, kot sa landrwa ti ganny *earmarked*

pou fer sa *playground*. Mon anvi konnen si sa proze i ankor lo ou radar?

E ki alokasyon ki annan pou kapab fer sa. Parske dan lepase ti annan en alokasyon 2.4milyon, ki ti ganny mete pour sa. Me selman apre proze pa'n ganny materyaliz. Si sa i ankor pe ganny konsidere, anvi ki Lekol Glacis bann zanfan pe fer byen dan spor.

Me selman landrwa pour zot servi, pour zot *practice* zot spor i limite. Sa mon premye kestyon.

Dezyenmman, letan mon pe regard *bullet 9' implementation of new special education needs and disabilities'* - mon ti ava anvi konnen anvi ki VTC, pour tonm mon'n aprann pou aprann pou tonm direkteman anba Minister Ledikasyon. E kot Lekol Eksepsyonnel, zot annan en *exit criteria* letan zanfan i ganny 16an, ki zot *exit*, ki zot al kot VTC.

Mon konnen i annan enn pti pe komosyon la an se moman, parske letan VTC in fermen, pandan sa 2 lannen ki i pa'n an operasyonnel, i annan en komosyon kot Lekol Eksepsyonnel.

Apre nou vizit bann *headteacher* avek *Management* ti fer nou, ti met nou okouran

poudir ti annan sa *challenge* la an se moman. Parske zot napa en *curriculum* pour sa bann zanfan laba kot Lekol Eksepsyonnel. Parski zot annan sa *exit criteria* 16an pour anvoy li dan VTC.

Me prezan kot VTC Minis, ler ou pou antre kot VTC ou annan en *entrance criteria*. Me selman kot VTC ki nou'n remarke napa en *exit criteria*. Zanfan i antre 16an, 48an i annan ki ankor laba. Napa en *exit criteria* laba. Ki kalite revizyon ki pour ganny fer avek *curriculum Vocational Training Center*, pou fer ki bann zanfan i santi zot en pe pli - zot kapab en pe pli epanouir? Enn.

I a ed zot pou pli byen ankadre sa bann zanfan, e os i pour osi annan en *career path* pour zot. Ki fer zot pa ava antre VTC 16an, e zot ava vwar zot kale laba pa pe ganny en landrwa pour anploy zot, ziske 40an an montan. Mersi.

### **MR SPEAKER**

Mersi Onorab. Minis.

### **MINISTER JUSTIN VALENTIN**

Mersi Mr Speaker. Mersi Onorab pour ou kestyon. Mr Speaker mon, mon ti a kontan les *DG* reponn sa kestyon lo *playground* Glacis e *PS* i pou reponn lo VTC. Mersi.

**MR SPEAKER**

*Thank you. DG i a komanse.*

**DG INSTITUTIONAL SUPPORT SERVICES DIVISION - BERNARD ARNEPHY**

Mersi Mr Chair. Mersi Onorab pour keston. Parey Onorab i konnen poudir sa proze *playground* i reste en proze priyoriter lo nou plan Minister Ledikasyon.

Me malerezman nou ti bezwen *at one point salvage* sa enn proze, pour nou donn priyorite sa proze lafnet ek laport kot ti'n ganny enfeste avek karya. So mon byen kontan pour note ki sa Kontra in ganny *awarded*. Kontrakter son materyo i ekspekte fini antre dan pei la lafen Novanm la. So proze pour komanse dek ki vakans i donner.

So mon krwar *it's a plus for the school*. Me dek ki Bidze i vin *available* e i reste enn nou priyorite lo nou proze, so nou pou donn priyorite ou, sa *playground* Onorab.

**MR SPEAKER**

*Thank you. Next point VTC.*

**PS MERNA EULENTIN**

*Thank you* Mr Chair. E mersi Onorab pour ou keston. Anfet an sa ki konsern VTC, ti annan

en *proposal* ki ti ganny fer par Minister Lafanmir ki zot in anmenn devan Ledikasyon.

Mon'n rankontre PS e answit avek son DG Morin, ki sa *proposal* i sipoze prezant dan Egzekitiv. In ganny en pti *delay* de semenn. Me ki nou pe fer dan limedya, nou an konsiltasyon avek bann diferan partener konsernen;- par egzant bann kot Lekol Eksepsyonnell.

E mon'n ganny enformen ki lot semenn pou annan en miting avek tou sa bann lazans ansanm. E apartir Zanvye nou pou kapab *accommodate* sa bann zantfan, sa bann etidyan dan 2 laklas, deryer kot Lekol Eksepsyonnell, ki *vacant* pour lemoman. E la zot ava komans travay lo enn pti program pour nou anmas sa bann zantfan.

Akoz nou konnen en bann i se zot, pa pe fer nanryen en plasman, dan bann landrwa travay i enn pti pe limite pour zot tou. Selman Zanvye nou pou *accommodate* zot kot Lekol Eksepsyonnell dan sa 2 laklas.

**MR SPEAKER**

Mersi. Klarifikasyon Onorab?

**HON REGINA ESPARON**

De klarifikasyon Mr Chair. Enn *curriculum* pour zot, sa bann zantfan si i pou annan en

revizyon. E dezyenm, mon ti ava kontan pran en pwen ki Mr Arnephy in fer, lo kote sa larzan in ganny mete pour lafnet.

Mr Arnephy mon pa konnen ki kantite larzan ki nou'n depanse ek Lekol Glacis, pour a bann defayans ki'n annan. Parski in annan en volim larzan 2.7milyon ki nou'n depanse pour resanz bann *tiles*, lannen avan 2021.

La ou dir mwan poudir larzan *playground* i al dan sanz lafnet. Konmsi enn ler ou demann ou lekor nou'n erit en kado anpwazonnen, piske sa kantite larzan ki mon gete Gouvernman in depanse avek sa lekol, avek bann defayans, mon vwar li i bokou.

Me zis an pasan mon ti ava kontan fer enn pti remark. Mon remarke, mon realize osi ki lo kote *basic pay* anba *wages and salary* pou Lekol Glacis, i annan en rediksyon R500mil, petet enn pti klarifikasyon lo la. Mersi.

### **MR SPEAKER**

Ou'n azout en nouvo kestyon la. E Onorab *Chief Whip* i a remarke, mon pe les li la pour lemoman. Minis lekel ki ...? *Yes go ahead* Minis.

### **MINISTER JUSTIN VALENTIN**

Mersi. Mersi Mr Speaker. Mersi Onorab. Onorab pour kapab klarifikasyon. Mon krwar plito i en komanter sa analozi ki ou'n dir lo *playground* e lafnet. Mon krwar plito en komanter.

An sa ki konsern *curriculum*, pour *VTC*, ou konnen tou sa bann keksoz, sirtou parey letan nou pe koz lo ledikasyon *inclusive*. Nou bezwen osi re-pozisyonn nou, parey mon ti dir lo komansman taler Lekol Eksepsyonnèl osi i annan, nou bezwen revwar Lekol Eksepsyonnèl dan sa totalite, dan sa nouvo *landscape* ledikasyon ki nou pe vwar. E Lekol *VTC* osi, i pour bezwen ganny revwar dan sa menm laliny.

Konnen, akòz nou'n kontinyelman, nou'n kontinyelman kree - konnen separ sa bann etidyan ki dizon ki otreman kapab, nou'n toultan pe met zot, zot tousel ansanm.

Be dan lespri ledikasyon *inclusive*, i annan bann lezot model ki nou bezwen komans eksplòre. Donk pour lemoman zot ava ganny plase - parey *PS* in dir - kot Lekol Eksepsyonnèl akòz i annan lespas. Me o firamezir ki nou devlop nou program *inclusive*, sa pour ganny amelyore. Mersi Mr Speaker.

**MR SPEAKER**

Byen. Ti annan son kestyon lo - Yes, Minister Finans i pare pour adrese?

**COMPTROLLER GENERAL  
ASTRIDE TAMATAVE**

Mersi Mr Chair. Mr Chair sa rediksyon anba *basic pay* ki Onorab in fer referans avek i anba, *programme 3*. E parkont si ou pour regard anba *programme 4* so i zis en re-alokasyon *of programme 4* in ogmante par 1.8milyon.

Me program 4 savedir, bann mis ki dan lekol primer *from P3 onwards*. Me dan *ECCE* ki ou vwar sa rediksyon. I pa vedir tan, i zis en re-alokasyon *from programme 3 to programme 4*. Mersi.

**MR SPEAKER**

Mersi Onorab Loze.

**HON JOHAN LOZE**

Mersi Mr Speaker. Mr Speaker Minis mon'n tann li boner, dir ki zenn in ganny dekouraze pour zwenn sa profesyon. Minis premye keksoz, i annan en group zenn, *SITE* mon krwar i apele Lekol Ledikasyon. Detanzantan zot pas kot mon lofis.

E pour dir pou dekouraze, wi mon krwar zot dekouraze e i

annan pe *dropout*, i annan mon konnen pe fel. E zot annan *issues allowances*. Akoz *from zot allowance zot pey photocopy*, zot depans lo proze, zot fer depans letan zot al kot bann lekol. Sa mon konnen i enn bann *issues* ki zot gannyen.

E i annan enn an partikilye, ofet ou kapab asize fer en konversasyon en erdtan ek li trwa, kat fwa i dir nou pe ganny tousala zis pour nou al ganny R8500 apre.

So ou annan rezon, sa dekourazman i la. Be i pa neserman ki zot in ganny dekouraze. Be mon ti pe gete si i ti pou posib *at some point* pour ou sey asize ek sa bann etidyan *SITE* la. Asize ekout zot en kou. Akoz mwan mon'n asize mon'n ekout zot mon konnen, posibleman i annan zot pour tann mwan la pour koz lo zot *behalf*.

Mon'n asize mon'n ekout zot, e i annan en kantite ki monte, lo zot sor e sityasyon *just by listening to them*, petet ou a konpran akoz petet *SITE* pe ganny en difikilte pour *retain* en pe sa bann etidyan, ki pe limit lakantite *teachers* ki ou pou gannyen.

E an retour zot ale zot koz ek lezot zenn zot, zot eksplike ki zot, zot pe pas ladan. So mon



kapab konpran kote sa dekourazman pe vini. Sa i en pwen.

Minis apre osi bann *teachers*, zot in pas lo sa *blended learning mode* la, in enform nou ki zot in trouv zis R300 pour 3an pandan ki zot ti lo sa *course*. Zot pa ankor ganny nanryen ankor. So petet ou a get sa.

Apre Minis mon annan en kestyon, ou'n mansyonn ledikasyon finansyel. I en size ki mon kontan tous lo la, mon ti menm tous lo la dan mon *speech* Bidze.

Menm si Minis Finans ti ekstropye, ti dir mon'n al dir dimoun aprann *economist* lo *Google*, *but it was financial literacy* ki mon ti pe koz lo la. Ki mon anvi konnen Minis, eski zot pe plan donn *just the basics*;- parey sa *Basic Home Economics*, la fer ou Bidze, plan ou Bidze.

Ouswa si Minister Ledikasyon pour plan donn *financial literacy up to the level of* ler ou komans travay, ou *save*, ou investir, ou bann keksoz parey *compounding interest*.

Ki manner en dimoun i investir, ki i en fason nou a kapab komans ganny nou en zenerasyon mon kapab dir, ki komans viz *towards building*

lendepandans finansyel pour zot lekor. So mon anvi konnen, si zot *aim* zot Minister Ledikasyon *is to go that far?* Apre Mr Speaker...

### **MR SPEAKER**

E *hold* - i fer trwa pwen ou'n fer Onorab, *sorry- sorry ...*

### **HON JOHAN LOZE**

Non-Mr Speaker, zis enn pti pwen mon le fer. Mon napa ankor kestyon. Mon ti annan zis de kestyon ofet.

### **MR SPEAKER**

Wi ou a fer enn pti pwen ankor e nou a pran ou kestyon apre.

### **HON JOHAN LOZE**

Mon pwen ki mon le fer Mr Speaker. Mon konnen nou'n en pe annwi ou avek sa zafer *long service allowance*, mon ti zis anvi. *In fact*, mon pwen pour ou. Mon ti zis anvi dir ou ki nou'n fer li koman en bonn fwa. E ou koman en *teacher*, ou devret konnen kwa ki'n *motivate* nou.

*Teachers, nurses* zot de kad spesyal, kot ou *value* leksperyans *above all else*. Ou kapab annan ou *freshly minted teachers*, i pour napa sa lensten ki en *experience teacher* i annan.

Sete - nou konsern sete pour prezerv sa kad ki Minis i

deza annan. Sa kad leksperyans ki Minis i deza annan pou travay avek dan bann lekòl. Mersi.

**MR SPEAKER**

Mersi. Mersi pour sa pwèn ekstra. Minis i annan de rekomandasyon, ki mon en remark. Mon asire ki ou a note. Me selman i annan de kesyon, apre sa.

**MINISTER JUSTIN VALENTIN**

Mersi Mr Speaker. Mersi Onorab pour ou kesyon e komantr. Mr Speaker lo vitman lo sa lespri ansenyan i dekouraze. Wi me selman, fodre pa dimoun i krwar en sel kou lapey ansenyan in ganny koupe.

E la ansenyan pe mal ganny peye, akòz nou an term peyman, wi nou pa'n tous okenn lapey, konmsi pou fer lapey desann ki akòz nou'n la lapey in desann prezan *teachers* in dekouraze.

Non-mon pa krwar. Nou pa bezwen pas sa mesaz koumsa. Non- non...

*(Off-Mic)*

**MR SPEAKER**

Les Minis reponn silvouple. Ou'n demann ou kesyon.

**MINISTER JUSTIN VALENTIN**

Annandler i annan bann keksoz ki nou apel *sous entendue mais bien etendue*. Me ki nou pe vwar, nou pe vwar poudir, i annan bann etidyan osi la mon dir bann etidyan ki pe anvì dyalog.

Wi mon pas kot bann etidyan mon koze ek bann etidyan tou kou. Me sa ki nou bezwen osi dir avek bann etidyan, si ozordi, si i annan en Minis Ledikasyon ki pe fonksyonn lo zot oter, ki zot kapab vini vin koz avek, i pour mwan pour lemoman la. Donk vini nou a koze.

Donk i enportan ki zot koz avek - I byen zot partaz zot bann nide en pe partou, partou. Me i osi enportan ki zot vin zot osi kot sa dimoun direk ki zot anvì tann zot nide, pour nou antre dan en konversasyon dan en dyalog.

Mon laport i ouver, mon'n pas kot bann lekòl, bann lenstitisyon i enportan ki bann etidyan i tann sa. E nou fer bann randevou, nou fer bann randevou nou koze. Mon koz byen ek bann etidyan.

Mr Speaker lo sa zafer *blended mode*, mon pou al *investigate* e mon bezwen - nou bezwen donn en solisyon e en konklizyon bann *issues* ki otour sa *package* ki mon krwar i

annan serten konfizyon. Nou bezwen donn en solisyon.

Onorab in demann mwan kestyon lo ledikasyon finansyel e wi lo ledikasyon finansyel i pou annan plizyer letap, plizyer moman.

Byensir dan bann pti laklas, akoz sa dan bann konversasyon pour lemoman la bann dimoun pe travay lo *curriculum*, pe edik lo bann pti laklas, i ava annan son metod.

Me o firamezir ki etidyan i grandi, e o firamezir ki sa bann konseps i antre dan *curriculum*, byensir i pou progrese, son topik, son *cognitive demand* byensir i pour ogmante o firamezir nou monte dan *cycle*.

E ankor lo *service allowance*, *long service allowance* Mr Speaker, i en keksoz ki nou'n koz ase lo la. Mersi bokou.

### **MR SPEAKER**

Mon krwar nou kapab pase lo sa enn. Mersi. Nou a pran, wi klarifikasyon Onorab. Zis klarifikasyon silvouple.

### **HON JOHAN LOZE**

Mr Speaker mon pe klarifye ki mwan, mon pa'n a okenn moman sizere ki okenn dimoun in koup lapey mwan. Sityasyon lapey, okenn Seselwa dan sa pei *right now*, i an relasyon avek

*cost of living*, i an relasyon avek sa ki pei ladan.

Mon pa'n koz pou fer *score* okenn pwen politik. Mon pa konnen akoz Minis i sitan defansiv mwan! Mersi Mr Speaker.

### **MR SPEAKER**

Mersi. Minis in donn son repons, mon krwar in sezi ou kestyon. So nou a pran kestyon Onorab Adelaide.

### **HON FRANCOIS ADELAIDE**

Mersi Mr Chair. Bonswar Minis avek ou delegasyon, tou dimoun a lekout. Dabor Minis mwan, mon le felisit ou pour sa bon travay ki ou pe fer akoz nou trouve poudir, i annan en transformasyon ki ou pe anmennen. E parey ou dir, si ou ekout zot laba, plito ou pa ekout zot.

Akoz ou pour deroute lo ou semen kontinyen *focus* e byensir ou pou ganny rezilta. Mon dezyenm pti pwen Mr Speaker avan mon demann mon kestyon;

Mon le dabor felisit Lekol Baie Lazare Primer, akoz sa lannen Baie Lazare in ganny nonmen apepre 25 fwa lo radyo e televizyon e zot *management* pe fer vreman byen.

E la tou dernyerman Mrs Umarji, dan Bonzour Sesel, in

dir zot bezwen pran legzanp lo Baie Lazare pour zot fer sa *road show*. Sa *road show* pour bann manrmay desann dan zot mas anvil e le petet i ava en lokazyon pour zot osi desann dan zot mas e nou a manifeste dan sa aktivite.

Mon premye kestyon Mr Speaker, i in regards to en Bidze pour Lakres Baie Lazare. Mon vwar R1.1milyon. So petet mon kapab ganny enn pti detay ki zot pe al fer ek sa larzan? E si nou pe al fer renovasyon, sa i pour terminen.

Aprè mon dezyenm pti pwen, i *in regards* to Lekol Lagrikiltir, ki lekol *SIAH* ki Minister Lagrikiltir in dir, zot pe pran en bout. Me selman sa konponan ledikasyon, i pou reste avek Minister Ledikasyon.

So Minis ki nou anvi vwar nou, nou anvi vwar en, nou anvi vwar petet en motivasyon pli serye. Pour ki nou ava vwar bann syantis laba kot Lagrikiltir, agronomis e bann lezot keksoz.

Konmsi annou maksimiz tou sa bann *course* ki nou gannyen, met a dispozisyon bann etidyan kot Lekol Lagrikiltir akòz mon asire zot pa bann dimoun ki pli dernyen, me o kontrè zot ki ansar z nou vant. E politik vant i en keksoz ki marse.

Nou bezwen fer sir ki nou envestir dan zot pour ki nou sekirite alimenter pa zanmen ganny konpromize. Mersi Mr Speaker.

### **MR SPEAKER**

Mersi Minis i annan son de pwen. Lakres ek lagrikiltir.

### **MINISTER JUSTIN VALENTIN**

Mersi Mr Speaker. Mersi Onorab pour ou kestyon. Mr Speaker, mon pou pran dezyenm kestyon avan, aprè *DG* ava pran sa konstriksyon Lekol Baie Lazare.

Zisteman sa bouze, sorti pour pran Lekol Lenstiti Lagrikiltir Ortikiltir. Sa bouze pour sorti antyerman anba Minister Ledikasyon, pour al Minister Lagrikiltir, e partaz, nou ti apel sa *co-management*. Byensir sa *curriculum* i reste anba nou - si oule anba nou *watch* - zisteman pour fer sa.

Pour fer ki lekol sa lenstitisyon, i re-pozisyon li dan sa *new landscape* akademik. Akòz lo parey lanplè ki nou vwar, parey nou vwar, nou vwar zis i annan serten group manrmay, etidyan ki ganny atrakte ek sa lekol. Me nou, nou anvi enn - ki i annan bokou plis etidyan ki osi doue akademikman ki vwar li annan en plas dan sa lekol.

E pour sa arive byensir, se sa lekol li menm li menm, sa lenstitisyon, i bezwen met bann program pou atrakte bann etidyan avek sa bann oriyantasyon. Donk i en bon *move* ki'n ganny fer. E nou ekspekte i annan prodwi ki ganny sorti apartir sa. Mersi Mr Speaker.

**MR SPEAKER**

*Thank you. DG ou tour.*

**DG INSTITUTIONAL SUPPORT SERVICES DIVISION - BERNARD ARNEPHY**

Mersi Mr Chair. Onorab zis pou en koreksyon 2023, napa larzan ki *feature* pou Lakres Baie Lazare. An term *PSIP* sa larzan, i plito 2024.

Me Lakres Baie Lazare i pou ganny son pti sonm *maintenance* parey lezot lakres ki gannyen. So an sa ki konsern, Lekol *SIAH*. Lekol *SIAH* i annan serten travay ki pe ganny fer, ki'n ganny *tender* e i pe al komanse *anytime soon* la.

So sa i en premye faz, pou reabilit serten lenfrastruktir lo sa site kot lekol i sipoze. E sa se son blok administrative. E nou ti annan en rankont avek Lazans Lenfrastruktir *early this week*.

E nou'n ganny konfirmasyon pou ki travay, travay *scoping* lo sa dezyenm faz ki pou konstruksyon 4 nouvo blok laklas. I pou ganny *tender* boner lannen prosenn. E nou ekspekte ki *by - hopefully by the end of next year or early 2024*, laklas ava pare e kot zanfani i ava gradyelman bouz lo zot nouvo sit.

E mon krwar mon ti ganny, mon ti antann dan Lasanble kot ler Minis pou Lagrikiltir, kot *PS* ti eksplike poudir i annan en sonm larzan osi, vi ki dezormen loperasyon *SIAH*, i pou en *co-management* ant Minister Ledikasyon ek Minister Lagrikiltir.

I annan serten larzan ki'n ganny Bidze dan Minister Lagrikiltir, pou lannen prosenn pou *machineries and equipment*. Akoz zot anvi mwens *building, bricks and mortar around*. Zot anvi plis *machineries* pou ki zanfani i kapab ganny ekspoze avek plis bann teknolozi, *when it comes to agriculture*.

So vwala lenformasyon ki nou annan pou sa de lekol pou lemoman. Mersi.

**MR SPEAKER**

*Thank you. Tre byen. Klarifikasyon Onorab - yes?*

**HON FRANCOIS ADELAIDE**

Wi zis en *follow-up* Minis, petet eski ou kapab dir nou. Akoz sa i sorti kot bann *teacher* kot *SIAH* laba. Eski ler ou pe dir, i annan sa logmantasyon 10poursan, eski zot pou ganny plis larzan ki zot ti pe gannyen la, ouswa zot pe ganny pli mwens? Mersi.

**MR SPEAKER**

Minis. I annan en repons?

**MINISTER JUSTIN VALENTIN**

Mersi Mr Speaker. Onorab mon, Mr Speaker mon pa tro konpran sa kestyon.

**MR SPEAKER**

E mon osi mon pa tro konpran. Wi ki manner ou pe dir i ganny larzan?

**HON FRANCOIS ADELAIDE**

Non-Mr Speaker akoz bann *teacher* laba zot pe, *anyway* zot in anvoy mwan en mesaz. Zot ti sipoze annan en 10poursan lo zot lapey, ki pour ler pou ganny enkorpoze dan zot lapey, zot pe ganny 10poursan.

Eski sa 10poursan i pour plis larzan ouswa i pou mwens larzan parey Lopozisyon pe dir? Mersi.

**MR SPEAKER**

Minis. Eski ...*Panel?* Minis, si ou'n konpran ou kapab reponn si non nou a pas. Mersi.

**MINISTER JUSTIN VALENTIN**

Byen, Mr Speaker okenn logmantasyon i pour vedir bokou plis larzan. Mersi Mr Speaker.

**MR SPEAKER**

*Thank you.* Onorab Naidu kestyon.

**HON SATHYA NAIDU**

Mersi Mr Chair. Bonn apre midi Minis ek ou delegasyon e tou koleg Onorab. Minis mon le felisit ou pour sa bon travay ki ou pe fer.

*Moral management* Lekol Belonie i vremen o. Mon ti'n ganny sans vizit Lekol Belonie pa tro bokou letan pase, batiman i lo en bon nivo. E *Management* Lekol La Rosière osi i bezwen konforte par lenformasyon ki'n ganny prezante. Pour plizyer lannen nou'n koze lo Lekol La Rosière, so ou finalman vwar nou annan en plan kler lo lafason devlopman pe al ganny fer. Se en soulazman pour non-selman *Management*, paran ki osi sorti dan distrik Saint Louis.

An relasyon avek *breakfast*, avek *lunch*. Mon le konnen ki kantite zelev, pe

resevwar sa benefis, dan primer avek segonder. Mon vwar sa mezir, koman en mezir ki pour adres pri lavi malgre ki Lopozisyon i le vwar sa koman le kontrer.

Vizavi lenplimantasyon, priyorite stratezik zot pe koz lo, *Value based education model for effective behavior management*. An relasyon avek sa, mon le demande si bann size tel ki larelizyon, avek *PSE*, si zot anvizaze revwar *curriculum*?

Rezon mon pe met sa devan, se aköz mon osi mon'n lekol dan Lekol Leta, e mon osi mon'n lekol dan Lekol prive. E mon'n vwar en gran diferans lo kote lansennyman dan lekol Leta 2010 4erdtan tou le semenn ti pe zis ganny gaspiye.

Alors mon pa konnen si sityasyon i ankor parey, i aparet i ankor parey. Ler nou tann bann ansennyman ki pa dan en pozisyon, swa zot pa konfortab pour *teach* sa size, i klerman annan en problem.

Alors mon le konnen ki sa model ki zot anvizaze travay lo la? E si sa de size zot anvizaze revwar *curriculum* e lapros ki zot anvizaze servi. Aköz sa osi i en eleman ki ekskremen enportan vizavi konportman. Mersi.

### **MR SPEAKER**

Mersi onorab. Minis de kestyon.

### **MINISTER JUSTIN VALENTIN**

Mersi Mr Speaker. Mersi Onorab pour ou kestyon e komanter. Mr Speaker zis lo kote Belonie. Mon kontan Onorab in remark sa moral, kot i o, e i vre.

E Belonie Lekol i en lekol ki zot donn nou lanmen reflexir en pe lo ki mannyer nou pou adres sa mouvman, mouvman bann zelev an letan in ariv ler pour bouze. E sa Minister Ledikasyon i vremen, vremen rekonesan pour sa.

Dezyenm kestyon, dezyenm pwen ki Onorab in fer, in adres lakantite. I anvi mon adres *statistics* pour *breakfast*.

Data ki mon annan la, *breakfast* dan Lekol Primer i annan 7600 etidyan ki pe pran *breakfast* dan lekol primer. E pour *lunch* i annan 7563 etidyan ki pe pran *lunch*. E dan lekol segonder, i annan 1173 etidyan ki pe pran *breakfast*. Ki fer ki Mr Speaker, dan lekol primer i annan 71poursan - environ 71poursan zanf an ki pe pran *breakfast* e *lunch*.

E parkont dan lekol segonder, i annan zis 18poursan bann etidyan segonder ki pe *access breakfast*. Mersi Mr Speaker.

**MR SPEAKER**

*Thank you.* Nou ti annan en dernyen pwen lo *curriculum PSE* – *yes?*

**MINISTER JUSTIN VALENTIN**

I annan sa dernyen pwen. Annefe wi nou osi dan Ledikasyon, nou santi poudir petet lafason ki serten size par egzanp, lafason ki *PSE* nou ti koz lo la dernyen fwa, mon ti vin dan Lasanble. E osi, byen la size larelizyon, ki petet i devret ganny revwar.

E la zisteman i annan en nouvo - en nouvo term ki pe antre dan ledikasyon konteks Sesel, i annan *ethics education* ki pe ganny en pe prominans ki byensir - akòz nou annan en group zofisye ki'n komans serten swivi serten kour avek *UNESCO* lo sa topik.

E i annan zoli, zoli travay ki pe fer. Byento ler lemoman i a apropiye, nou ava donn bann nouvo direksyon dan ki nou pe ale. Mersi Mr Speaker.

**MR SPEAKER**

E wi sa ti mon dernyen entervenans lo lalis. Donk nou'n pare pour nou vote lo Bidze pour *Ministry of Education* pour en total. Mon kapab ganny latansyon bann Manm silvouple. Nou pe vot lo Bidze Minister Ledikasyon pour en

total R1bilyon285milyon588mil - bokou sif. Manm ki an faver lev lanmen silvouple?

Tre byen mersi. Madanm Deputy mon vwar tou dimoun in vote. Mon pa rapel sa ki pa'n vote. Lo sa Bidze pour Minister Ledikasyon 26 Manm 0 kont e 0 abstansyon. Donk Bidze - ou Bidze in aprouve an inanimite. Minis mon sipoze sa i ava en siny lankourazman pour ou travay.

La mon pou bezwen dir, mersi, orevwar bann zofisye pour Ledikasyon e mon swet zot bon depar. I reste enn pti antite - nou annan *Institute of Early Childhood Development* pour nou pran. Nou a fer, delegasyon i a fer zot depar e nou a fer enn pti poz *sanitizing*, apre nou ava apel lezot zofisye.

*(technical break)*

**INSTITUTE OF EARLY CHILDHOOD DEVELOPMENT****MR SPEAKER**

Bon byenveni avek nou Mrs Shirley Choppy *CEO* pour *Institute of Early Childhood Development* e Mrs Laurette Lebon son *Human Resource and Budget Management Officer*. Minis en pti lentrodiksyon silvouple.



**MINISTER JUSTIN VALENTIN**

Mersi Mr Speaker.

**MR SPEAKER**

Yes, Minis *sorry*. Mon'n mank en pti soz ki mon abitye fer. E sa zis pour mansyonn son Bidze, ki lo paz 313 ziska 320 pour R41milyon865mil. Mersi. Minis *sorry* pour sa. Kontinyen silvouple.

**MINISTER JUSTIN VALENTIN**

Mersi Mr Speaker. Mr Speaker *IECD* i enn ant sa de antite ki tonm direkteman, anba Minister Ledikasyon. E kot li i annan en kantite bann mouvman ki pe arive, pour fer sir zanfan bann Pti Anfans, i ganny en bon komansman dan zot lavi.

Donk mon annan plezir, si ou permet mwan, les *CEO* Mrs Choppy, angaz nou dan son deba. Mersi Mr Speaker.

**MR SPEAKER**

Mersi ou le dir i pou kontinyen lentrodikeyon, oubyen i pou reponn kestyon. I pour reponn kestyon.

**MINISTER JUSTIN VALENTIN**

Mr Speaker, nou pare pour angaz nou dan diskisyon.

**MR SPEAKER**

Dan kestyon. Mersi tre byen. Mon annan de Manm ki'n lev lanmen Onorab Esparon e Onorab Labonte. Mon ti a kontan ganny non bann Manm ki annan kestyon la.

Akoz mon ti a kontan fer mon lalis, pour konnen ki mannyer letan pour ale. Onorab Lemiel, bon nou annan 3 Manm ki pou demann kestyon. 4 mersi 5. Tre byen nou ava al avek sa.

Kot mon'n komanse? Onorab Esparon ki ti lev lanmen premye.

**HON REGINA ESPARON**

Mersi Mr Chairman. Mr Chairman, mon ti ava demann avek Minis anvi kontrent pou ganny later pour konstrir *daycare centers*.

Eski *IECD* pe konsidere pour al ver bann *storey house daycare*? Si wi eski sa i vedir bann *Daycare Centers* ki dan lepase zot plan ti ganny rezete, i kapab reganny konsidere?

En legzanp mon kapab dir, parey *Butterfly Daycare* kot Kouvan *Ste Elizabeth*.

Dezyenmman eski *IECD*, pe osi mazine pour konsider asiste bann *Daycare* avek en asistan? Zis parey bann *childminders* i gannyen, pour ed zot avek *accommodate* zot depans? Mersi.

**MR SPEAKER**

Mersi de kestasyon. Minis oubyen ou *CEO*. Yes.

**CEO SHIRLEY CHOPPY**

Bonn apre midi Mr Speaker. Bonn apre midi Manm Onorab. Mersi pour ou kestasyon, dan nou plan stratezik ki nou'n devlope pour 2023. Pour sa prosen 5an, enn nou bann stratezi se pour ogmant lakantite *child care facilities* ki annan dan kominote. *Ok?*

E i vre mon dakor avek ou Onorab, i annan en gran demann pour *daycare*. E osi tou later i pa neserman *available* pour bann dimoun ganny akse avek, pour zot fer.

Ki nou'n mete dan nou plan stratezik se ki nou pe tap enn pti pe lo bann landrwa travay, kot i annan en kantite dimoun. Par egzanp *PUC*, *SCAA*, *IOT* bann gran lorganizasyon pour nou ankouraz zot, pou zot kapab annan en *child care center on site*.

E sa i ava ede tir en pe sa presyon lo Gouvernman pour donn plis later e osi tou kekfwa donn plis larzan ouswa *subsidy*, pour bann dimoun kapab benefisye avek bann resours pour zot kapab fer *daycare*.

E si mon konpran byen, dan nou plan pour *Daycare*, byento nou pou annan en nouvo *daycare* dan distrik Les Mamelles. E osi tou dan plan *Local Government*, mon konnen poudir zot pe met bokou lanfaz sa lannen ki pe vini avek lannen prosenn, pour *refurbish* bann *Daycare* Gouvernman ki deza egziste dan kominote partou.

Sa i par egzanp *Daycare* Baie Lazare, *Daycare* La Digue. I annan enn de *daycare* ki'n enn pti pe avarye. E Gouvernman in pare olye pou al *construct new daycare*, zot bezwen al revwar sa bann nouvo. Sa fasilite pour met zot lo nivo standar. Akoz *IECD* pe vin *regulate* bann *daycare* byento.

So avek Lalwa ki Lasanble aprouve pour nou, nou byen kontan ki i ava ed nou, pour nou kapab finaliz nou bann standar. E osi tou i ava ede pour bann dimoun kapab sa bann *daycare* kapab *meet* sa bann standar. Akoz an se moman la, serten bann *daycare* i pa lo standar. Mersi.

**MR SPEAKER**

Mersi. Wi enn pti klarifikasyon Onorab silvouple.

**HON REGINA ESPARON**

Mersi Mr Chairman. Mr Chairman, i pa'n tous mon kestyon orizinal. Annefe, dan mon kestyon orizinal, mon ti anvi konnen *CEO*, dan lepase in en Polisi, avek *IECD* ki zot pa pe aksepte pou annan *Daycare* letaz.

E mon'n donn legzanp parey *Butterfly Daycare* kot Kouvan *Ste Elizabeth*, kot *Caucus* Madanm fek al vizite semenn pase. Enn zot plan ti ganny *turned out*. E zot ti perdi zot donasyon parski, *IECD* li menm li pa ti aksepte ki zot konstrir en *Daycare* letaz.

Mon kestyon se ki, eski zot anvi zot pe reviz zot Polisi pou *allow* sa? E si sa i ganny revize pour ganny *allowed*, eski bann ki'n ganny *turned down* dan lepase i kapab reganny konsidere?

E mon dezyenm kestyon sete lo *allowance* pou bann *Daycare* parey bann *childminding* i gannyen? Mersi.

### **MR SPEAKER**

Mersi *CEO* ou a rebran sa de pwen.

### **CEO SHIRLEY CHOPPY**

Wi mersi. *Sorry* Onorab, mon'n mank sa de. Mon ti'n note pou mwan al reponn, lo kote par egzanp ou'n pran sa legzanp *Butterfly Daycare* - an realite, i

pa tro neserman *IECD* ki pa'n oule.

Akoz pour nou kapab devlop standar, met *Daycare* lo nivo bann standar, i vin en zefor kordinen avek tou bann Lazans. Nou annan *Public Health Authority*, nou annan *Planning Authority*, nou annan *SFRSA*, nou annan *Local Government* menm, nou annan Minister Ledikasyon, nou annan diferan Lazans *Social Affairs* ki vin an *jeux*.

Spesifikman pou *Butterfly Daycare*, mon konpran ki *Planning Authority* ki pa ti oule, aköz mon krwar *Soroptimist*, ti'n *come up* avek en proze pour *refurbished* sa *Daycare*. So *Planning* pa'n tro an faver, aköz in dir sa batiman i annan plis ki 50an.

So zot in demande si pou fer en *Daycare*, fodre met li ater net, konstrir en nouvo *Daycare*. So *going forward* avek nouvo standar, nou pour permet anvi kontrent later lo *first floor*. I parey bann *childminders* osi ki dan bann *flat*. Nou les zot, nou permet zot kapab vey zanfán, lo *first floor* avek *ground floor*. Sa i anliny avek standar *SFRSA* kot i konsern sekirite avek *safety*.

*Second floor*, *third floor* definitivman nou pa aksepte, aköz in deza ariv dan lepase zanfán kot in sorti anler *third*

*floor, fourth floor* kot in tonbe in ganny gran dimal.

Lo kote *allowance* pour *Daycare*, wi mon kapab konfirman poudir pou bann *childminders* dan lakour, bann asistan, Gouvernman i pey zot saler. Akoz *the cost of childcare it's quite high*. So Gouvernman i antre pour *subsidy* enn pti pe, pour ki sa dimoun ki pe vey zanfan i napa sa gro kou ki sorti lo li.

Pour *Daycare*, nou anvizaze fer en demann avek Gouvernman an 2023, pour zot osi nou bezwen fer si nou pe fer li nou bezwen fer li ekitab pour tou dimoun, pour zot osi kapab benefisye. Selman nou pa ankor ale avek sa Polisi *Paper* kot *Cabinet*, pour nou kapab demann zot.

So nou pe finaliz standar la an term son regilasyon pour nou prezant devan *Cabinet*, lannen prosenn. So ler nou pou al ek *Cabinet* nou pou al ek sa Polisi osi, pour nou fer en demann pour *subsidize Daycare* osi tou. Mersi.

**MR SPEAKER**

*Thank you*. Onorab Labonte?

**HON ANDY LABONTE**

Mersi Mr Chair. Bonn apre midi Minis avek *panel*. Mon annan zis enn pti leklersisman. Mon'n

tann Mrs Choppy koz bokou lo standar, standar. I vre ki nou bezwen standar e mon konnen poudir sa i en keksoz ki bann *childminders* bann *Daycare operators*, zot toultan annan en problem kont sa.

Petet i annan serten travay ki demann fer lo la pour amelyore. Me pour al lo mon kestyon direkteman li menm li, an relasyon avek standard, i annan sa 1.6milyon ki'n ganny mete anba *Educational Support Trust Fund* anba *programme 2*.

I annan bokou bann *childminders* ki sa i sipoze pou ed zot pour zot kapab, *upgrade zot Daycare in term of zouzou or whatsoever*, ki ankor enn fwa pour met li lo sa standar.

I annan bokou zot ki zot pa vreman konnen ki mannyer pour akse avek sa - dapre zot lenformasyon ki nou, nou pe gannyen. Akoz zot ganny bokou difikilte ki ler pour zot akse avek sa finansman. Eski petet ou kapab donn nou en - Si ou annan sa *figure* avek ou. Konbyen bann *childminders* ki pe ganny akse avek sa?

E ki zot pe fer pour vreman enform bann *childminders* ki mannyer pour ganny akse avek sa servis? Mersi.

**MR SPEAKER**

Mersi. *CEO*.

### **CEO SHIRLEY CHOPPY**

Mersi Mr Onorab. Pour sa lannen i annan 2 *Daycare Center* ki'n benefisye. I annan 3 *childminders* ki'n benefisye anba sa fon, apre i annan 4 lezot lorganizasyon ki relye avek *Early Childhood*. I kapab Lasante, Sosyal, Ledikasyon.

E sa 3 *childminder* zot in ganny zot sakenn R10mil, en *one-off Grant* ki zot gannyen letan zot anrezistre avek *IECD* ki pou ed zot kapab aste bann resours edikasyonnel pour zot kapab travay avek zot bann zanfan.

E osi tou i annan proze, i annan detrwa proze ki *Trust Fund* in *fund* sa lannen. I bann proze nasyonal, parey the *readiness assessment* ki *IECD* pe fer pour teste bann zanfan avan ler zot antre *preschool*. E la an se moman nou annan trwa proze ki *pending*, ki *actually* Lendi, *Board* pour fer son dernyen miting pour sa lannen pour nou regarde bann nouvo laplikasyon ki vini pour nou fer li.

Mon ava agree avek ou Onorab, konsernan sansibilizasyon e osi tou donn en pe plis lenformasyon bann *childminders* ouswa bann lezot dimoun ki pe ofer servis vey

zanfan, pour zot kapab akse sa fon.

*Unfortunately*, sa lannen manda ti'n ekspire depi Desanm 2021. E i pa tro bokou letan pase ki nou'n ganny re-apwente. *So body* i pa'n tro aktiv pour en pe letan sa lannen. Me selman nou pe sey *try* nou *best*, pour nou kapab fini sa bann larzan ki nou'n gannyen sa lannen pour nou kapab ed bann lezot laplikasyon ki a pe vini.

*So basically*, en dimoun i kapab *apply Grant* anba *Trust Fund* up to R100mil. E ladan zot pour bezwen fer en 25poursan kontribisyon personnel. E *Trust Fund* i donn 75poursan an term sa *cost* sa proze ki zot sipoze pe fer.

Apre osi tou apard ki bann endividi, si i annan bann lezot Lazans ki annan en proze nasyonal dan en gran lanpler nasyonal ki pou tous en kantite zanfan, *so Trust Fund* osi tou i konsidere, pour ou *fund* sa proze.

Mon ava *take note*, ou pwen Manm Onorab. Ler nou pou zwenn Lendi mon ava met devan Komite ki nou bezwen *come up* avek en plan, pour anmenn en pe plis sansibilizasyon lo sa fon e ki mannyer bann dimoun i kapab akse li. Mersi Mr Speaker.

**MR SPEAKER**

Mersi. Onorab Lemiel ou ti'n lev lanmen? Onorab.

**HON SYLVANNE LEMIEL**

Mersi Mr Chair. Bonn apre midi Mrs Choppy avek Ms Lebon. Mon keston i se ki *IECD* li menm, zot in annan zot nouvo Lalwa, kot zot anba sa *UNESCO Agreement*. Zot *IECD* zot pe al *operate as* en kategori 2 *center for ECCE*.

Mon vwar i annan R1.99milyon, kot zot pe al fer rekritman. Mon ti a kontan konnen si dan Bidze 2023 pour *IECD*, eski i annan lezot konponan dan sa Bidze ki pou ed zot - akoz dan sa Lagreman i bezwen annan diferan keksoz ki zot pou bezwen fer, pour zot ariv - pour zot *meet* bann kriter sa Lagreman.

Eski dan ou Bidze i annan ase larzan ou ou kapab 2023, *fully fledge* arive pour enplimant tou sa bann keksoz ki dan sa Lagreman ki pe demann ou? Mersi.

**MR SPEAKER**

Mersi. *CEO*.

**CEO SHIRLEY CHOPPY**

Mersi Mr Speaker. Mersi Manm Onorab, an realite pli gran *increase* dan nou Bidze pour

2023, se zisteman, relye avek lenplimantasyon *setting up* son *governance structure* e lenplimantasyon bann program, avek bann aktivite ki annan pou fer avek *the Category 2 Centers*.

So si mon kapab donn briyevman enn pti git - en pti pe plis detay lo la. Nou'n ganny nou 3 pos, ki annan pou fer avek loperasyon e fonksyonman sa *center*. *Obviously* i nouvo - i en nouvo leksperyans. Nou'n ganny sa post ki ava ed nou pour nou kapab komanse. E sa i en *director* zisteman pour sa *secretariat* ki pou fer bann lyezon avek bann lorganizasyon enternasyonal e osi tou *UNESCO*.

Nou osi tou pe avek nou nouvo Lalwa pe antisipe ki avek Lagreman ki nou'n sinyen avek, *UNESCO* ki *IECD* i ganny son *operational and functional autonomy*. So nou Bidze, tou nou bann loperasyon, so nou pou annan en *financial controller* ki nou anvizaze rekrite.

E osi tou en *Director* ki pou get enn pti pe lo kote bann laspe sipor ek ladministrasyon. Kot nou pou annan bokou plis dimoun ki pe vin kot nou. An term, sa i an term saler, i pou ariv apepre R963mil.

E lo kote *goods and services*, pour *category 2 centers* nou pou annan bokou ki annan pou fer avek bann *printing*. Ok *printing stationary*, nou pou annan nouvo logo, nou pou annan nouvo *brochure*, nou pou annan bokou keksoz. So sa nou'n Bidze R265mil.

Lo kote transportasyon e travel cost i R352mil, sa i anliny avek bann *exchange programs* ek bann *trips*, ki Sesel pou fer aletranze avek bann *member state UNESCO*, bann lezot lorganizasyon ki nou afilye avek.

E osi *vice versa* pour bann dimoun ki pe vin isi;- par egzantp nou kapab organiz *capacity building sessions* pour nou bann *teachers*, pour nou bann *childminders*, pour bann *professionals* ki dan *ECCE*.

I osi annan pou fer avek *other use of goods and services*, *other service agreements*. R190mil kot i annan pou fer avek nou *marketing strategy*, *position of Seychelles Category 2 Centers*, pe viz ver lemonn, montre nou bann bon pratik ki nou annan isi, pour zot kapab *emulate from* e aprann from Sesel. Si i enportan ki nou fer en pe *marketing* tou lo la.

I annan *rebranding* ki nou pou bezwen regarde - tou sa ki annan pou fer avek *UNESCO*.

So avek logo *IECD*, *IECD - alongside* logo *IECD* pour bezwen pe dan tou nou bann piblikasyon, *letterhead* eksetera, i pou annan logo *UNESCO* osi tou. E tousala i annan tou son bann *guidelines* ki *UNESCO* anvoy kot nou, pour nou kapab swiv lo la.

I annan osi tou pour fer avek *other honorarium and awards*. E parey nou striktir i dikte, *category 2 Centers* pour ganny govern *by a governing Board*. E lo la pou annan *representant 2 member state*, *representant UNESCO*, *representant Sesel*.

So nou pe anvizaze - akoz premye fwa nou lanse, premye fwa nou fer li, nou pa'n le tro anbisyè - nou pe anvizaze annan en miting pour 2023, pour nou kapab *set li up*, pour nou kapab komanse. So i pou annan, bann *members* ki pour lo sa *Board* kot nou pou fer bann laranzman deplasman pour zot.

E tousala nou'n kapab fer li, e kalkil li mon kapab dir an detay e *the exact cost* konbyen pour arive atraver *zero based budgeting*, ki *IECD* in fer li - parey nou dir an Francais - *à la lettre*. E sa in ed nou pour nou kapab, konnen egzaktaman ki kantite larzan nou pour bezwen pour sakenn sa bann diferan

aktivite, ki nou pa le demann Gouvernman en kantite larzan, apre *at the end of the day* nou pa kapab depanse. So nou'n fer li anliny avek sa ki Minister Finans ti pe propoze.

Apre osi tou nou'n ganny nou en, nou pou ganny nou en nouvo *van* - en bis, akoz nou loto i annan plis ki 10an depi ler nou pe servi. So nou pou annan nouvo dimoun ki pou vin Sesel, bann *exchange*, nou bezwen transpor pour nou kapab fasilite deplasman bann dimoun.

Sa osi tou nou pou osi tou konsider li koman sa. So vwala enn pti pe an gro, ki nou pou fer pour *category 2 center*. Mersi.

### **MR SPEAKER**

*Thank you.* Mon krwar i ase detay. Mersi. Onorab Pillay - Onorab Pillay ou a reste lo de kestyon silvouple.

### **HON SEBASTIEN PILLAY**

Mersi Mr Chairman. Mon note mon'n lev lanmen dernyen, ou bezwen demann mwan, pangar ou ganny problemm avek lot kote laba. Napa problemm ou. Zot pe dispit ek ou depi taler, mon pa konnen akoz.

Mr Chairman mon vin lo *other uses of goods and services*. E la mon vin lo sa *allowance to students Daycare Scheme*. Ki pli gro konponan

bidzeter apre ki annan bann lezot konponan operasyonnel.

Mon ti a kontan petet ganny en leksplikasyon atraver Minister Finans, ki mannyer nou *compute* sa *allowance* ki ganny *provided*? Saverdir sa sonm ki ganny mete dan Bidze, ki mannyer i ganny *computed*? Konmsi lo ki baz ki nou *come up* avek sa *figure* R27milyon?

E prezan, petet en kestyon pertinan ki mon le demande, ler sa larzan pe ganny depanse - par egzanp pour 2021 in ganny depanse 202,2 la nou 2023, nou pe met 27mil610, i enn pti rediksyon apepre R300mil.

Petet si mon kapab ganny eksplike, akoz i annan sa rediksyon? E ki arive ek balans sa larzan ler in pa'n ganny *exhausted*? Mersi Mr Chairman.

### **MR SPEAKER**

Fini? *Yes CEO*, ou'n pare?

### **CEO SHIRLEY CHOPPY**

Pour nou kapab kalkile ki kantite larzan nou bidzete pour sa, *basically*, nou get enn pti git popilasyon bann zanfan. Akoz sa lasistans i pour 0-3an popilasyon, ki dan bann - akoz bann ki dan bann *registered child care center* ki gannyen.

Nou get enn pti pe popilasyon ki annan, apre nou



kalkil enn pti git *trends* tou lez-an. E se sa ki nou fer. E sa larzan osi i pa zis kouver 750, i osi tou kouver parey Onorab Esparon ti pe dir o komansman, sa *subsidy* pour bann asistan osi tou.

E sa pti git larzan ki'n tire apepre R300mil, in ede kouver *goods and services* anba program 3 e program 4. E zisteman parey mon'n dir taler, ler nou'n fer sa *zero-based budgeting* ki Minister Finans in demann nou pour fer.

In demann nou pour komans nou Bidze *on a clean slate*, fer krwar nou pa'n ganny okenn larzan - lala nou manda e prezan pour sak sa bann nou bann manda ek nou bann aktivite, *cost* nou bann aktivite pour nou kapab konnen konbyen nou Bidze i arive.

So nou'n fer li, nou'n *cost* ziska en pake dite, dan en pake dite *SeyTé* 100, konbyen pour arive, konbyen i koute e konbyen dimoun i vin training e konbyen dite nou pour donn zot.

So ou vwar nou'n fer en travay ase konpreansiv lo la ki *anyway* mon konnen Minister Finans in kontan, in servi *IECD zero based budgeting* koman en model, koman en legzanp pour bann lezot departman ek pti lorganizasyon ki'n fer li.

*Basically*, ler nou'n fer sa *zero-based budgeting*, nou'n vwar poudir *programme 3 e programme 4* i ti *severely under budget*, kot i konsern son program, bann devlopman bann program, lenplimantasyon bann program.

So ler Minister Finans in fer enn pti azisteman, relayman, aköz ti annan enn pti pe *saving* ki ti reste dan sa larzan lannen pase. So zot in tir sa R300ekek mil, so R262mil in al pour *programme 3* e R84mil in al pour *programme 4*.

So vwala sa pti larzan, ki'n ede pour kouver enn pti lo aktivite ki nou bann program i sipoze fer. Mersi Mr Speaker.

### **MR SPEAKER**

Mersi *CEO*. Ou annan klarifikasyon? Kourt silvouple.

### **HON SEBASTIEN PILLAY**

Mersi Mr Chairman i pour kourt. Yer nou ti idantifye ki apre ki *Welfare* ti'n depans 8milyon, i ti pou reste li *around* 32milyon pour fini lannen avek. E prezan sa larzan ki reste, ti ti'n kapab al ver lasistans ki ti'n kapab ganny donner. Me kestyon petet ki mon annan pour Minister Finans, an relasyon avek sa bann Bidze, ki

nou mete pour serten laspe sosyal.

Par egzanp sa enn ki la i en laspe sosyal akòz i pe kouver depans bann *childminders*. Me mon kestyon i adres plis pour Minister Finans, mon klarifikasyon.

Eski i retourn dan Bidze, e nou *re-appropriate* li lannen prosenn *as a fresh line - as a fresh budget*, me i pa reste dan okenn kont? Mersi Mr Chairman.

**MR SPEAKER**

*Thank you.* Minister Finans, Ms Tamatave.

**COMPTROLLER GENERAL  
ASTRIDE TAMATAVE**

Mersi Mr Chair. Mr Chair si larzan ki nou'n mete pour en lannen, pour bann *Daycare assistants* avèk *Daycare parent assistants* pa ganny depanse, so sa larzan i reste dan Bidze.

Savedir sa departman i perdi sa larzan e lannen prosenn nou refer provizyon *afresh*. Mersi.

**MR SPEAKER**

*Thank you.* Onorab Henrie.

**HON GERVAIS HENRIE**

Mersi Mr Chair. Bonn apre midi tou dimoun. Mr Chair en senp kestyon, baze lo priyorite

stratezik, parske lefet osi ki nou'n fek pas sa Lalwa *Childcare*, ki refleksyon ki pe annan an se moman, partikilyerman *CEO* in mansyonnen ki lannen prosenn zot pou annan en Papye ki pou al devan *Cabinet*.

Pour ki sa sekter i a vin *compulsory education*, pour nou kapab vreman - ouswa kontinyen donn plis dinamiz nou sistenm ledikasyon. Pour ki nou ava annan en pep bokou pli edike, pli for, me pli ere? Mersi.

**MR SPEAKER**

Mersi. *CEO*?

**CEO SHIRLEY CHOPPY**

Wi. Mersi Mr Onorab pour ou kestyon. I vre nou Lalwa i pe fer provizyon pour *IECD, quality assure from zero to five-years-old*.

*So IECD i the main regulator, for pour four months - basically* letan bann manman i sorti *maternity leave to three years old*.

*E four and five years old, currently* in napa en *body* ki *quality assure* li, *say four to five* se *preschool* ouswa lakres. So prezan *regulatory role IECD* in ganny *extended* pour kouver lakres tou, ki mon krwar i fer byen.

Konmsi i napa parey ou pe dir, i ava anmenn sa dinamiz, i ava anmenn sa kontinyite kot nou, nou arete e nou kontinyen akoz sa bout, zisteman parey ou'n dir Onorab, i *non-compulsory education*.

So nou pe anvizaze lannen prosenn, pour nou fer en letid dan bann *preschool*, pour nou regarde kote zot ete par aport a bann nouvo Polisi, nouvo prensip, devlopman ledikasyon Pti Anfans.

E *following* sa prezan nou a ganny sa rezilta sa levidans, nou a kapab devlop bann standar pour nou kapab met an plas pour lakres. Akoz pour lemoman lakres napa standar – *ok?* Dan lakour i annan standar, dan *Daycare* pe vini pou annan standar, so nou ava antisipe ki petet ankor dan 2an koumsa, nou ava kapab devlop standar pour lakres.

E nou pe vwar avek standar ki nou'n mete, avek rezilta *readiness assessment* ki nou fer ek bann zanfan, nou pe vwar *over 80percent of* bann zanfan ki partisip dan sa *test* zot *either* pare, *or* plis ki pare pour zot al lakres.

So si nou pe vwar kalite rezilta koumsa *at a very early age. So the future in education is very promising.* E nou swete ki nou ava kontinyen, travay dir

dan sa laliny ki ler zanfan i kit *preschool* i antre dan *P1*, in pare pour *embrace primary education*, ki *in 6years time*, in *11years time* nou ava kapab ganny bon rezilta dan *P6* e bon rezilta dan segonder. Mersi Onorab.

### **MR SPEAKER**

Mersi. Wi Minis?

### **MINISTER JUSTIN VALENTIN**

Mersi Mr Speaker. Mr Speaker mon anvi azoute lo sa pwen ki, Gouvernman i vwar sa *practice* vey zanfan, koman en *practice* ekonomi dan pei. E tou sa bann keksoz ki nou pe fer avek *IECD* nou pour asire ki bann paran ki vey zanfan, bann landrwa kot i vey zanfan i byen ankadre.

E ler bann paran i swazir en landrwa pour li kapab met son zanfan, i fer li dan tout konfidans, dan tout konfyans ki son zanfan pour ganny veye byen. E nou, nou fer sir - e nou, nou rol la prezan se pour fer sir ki nou protez - protez sa metye, protez si oule sa pti, sa servis pour fer ki i devlope e vin pli ekonomik pour bann dimoun ki al travay e osi bann dimoun ki swazir pour vey zanfan. Mersi Mr Speaker.

### **MR SPEAKER**

Mersi. Avek sa mon apel bann Manm pour vot lo sa Bidze pour *Institute of Early Childhood Development* pour R41milyon865mil - Manm ki an faver lev lanmen silvouple? Mersi. Madanm Clerk mon vwar tou Manm in vote.

Lo Bidze pour *Institute of Early Childhood Development*, 26 Manm in vot pour 0 kont, 0 abstansyon. Donk ankor enn fwa, nou'n ganny en lot vot inanim. E mon mazine sa i ava en lankourazman pour bann antite.

### **SEYCHELLES** **QUALIFICATION AUTHORITY**

#### **MR SPEAKER**

Nou pour osi pran vot, lo vot, lo *Seychelles Qualification Authority* ki lo paz 307 ziska 312 pour en total R9milyon627mil - Manm ki an faver lev lanmen silvouple? *Thank you.* Tou Manm in vote.

Lo Bidze *Seychelles Qualification Authority* - 25 Manm in vot pour, *sorry*- 0 kont e 1 in *abstain*. Mon pa ti'n apele si i vot kont. In *abstain ok*. 25 *yes* 0 kont, e enn *abstain*. Lo - wi.

Bon zis enn pti regar lo program Lendi, nou pour pran bann antite ki konsernen avek Minister Ledikasyon, Bidze

Minister li menm e apre *Public Health Authority* e *Health Care Agency*.

Mon a remersye Minis ek zot delegasyon. *Sorry?*

#### **HON BERNARD GEORGES**

Ou'n dir Ledikasyon Mr Chair e mon krwar i Lasante.

#### **MR SPEAKER**

*Ministry of Health*. Yes. Mon'n dir Ledikasyon, *so sorry*. Vandredi apre 5er, ou konnen mon derobe. Mersi bokou. Minister Ledikasyon, *Public Health Authority* e *Health Care Agency*. Remersye, remersiman osi remersiman osi pour bann Manm pour zot partisipasyon e pour bann zofisye ki'n akonpany nou dan sa long semenn. E pour nou piblik ki'n swiv nou.

Mon swet tou dimoun bon *weekend* e nou a repas dan Staz Lasanble, pour nou *adjourn*. E nou a rebran travay Lendi 9er. *Adjourn*.

#### **(ADJOURNMENT)**

